

董誥齋所
普齋
詩州

楊昭燾題



浦 竺


居士

心 景

戊 子 三

月 攝
時 年

八十



寒松盒詩
艸弟一集

丁亥仲秋

惟廉



自序

余學詩自十五歲始，迄今已忽忽六十餘年矣，回憶曩年，與方地山澤山昆仲、郭楚生、梁公約同學，訂文字交，茶餘酒後，偶成一句，輒自鳴得意，不自知其狂妄，迨乙未入都，獲與鄉先生游，稍窺詩之奧突，乃知詩非可以拈作也，而有時吟詠，流露於不自覺，都人士許爲能詩，然我詩素無師法，不過如春鳥秋蟲，各鳴其天已耳，厥後宦游皖江，久營軍儲，兩攝縣事，簿書鞅掌，非其素志，而於菱湖獨倦倦焉，花時嘗歌嘯其中，刊有菱湖圖詠記其事，未幾以事去官，北出居庸，至張家口，黃沙白草，蒼涼滿目，先後居塞垣將十年，佐軍治民，理繁馭簡，假旗軍校射地，鬪爲蒙國暇與二三同志，聯膺詠，一洗蒙邊荒陋；又或拉老兵對飲，飲醉狂歌，歌罷繼之以痛哭，塞上胡兒聞之，驚且怪也，改國後閒往來於京張間，家鄉舊雨，集宜南，盍簪之樂，亦有唱和，正如少年在里中于嘔時，又若忘其今世何世，乙丑南下，重游菱湖，旋遇俞濠觀沙祝聲於蚌浦，詩筒往還，有淮上題襟集，既而客歷下，棲秣陵，皆與祝聲偕，和詩稍夥，甲戌後因病歸里門，檢理舊稿，初刊寄天游室詩存，院中作也，續有蛻屨詩鈔，塞上吟也，自悔少作，並晚年所著拙修草堂詩，悉加淘汰，將擬付梓，而中日戰事起矣，丁丑冬倉猝避地北湖，稿未攜出，散失不全，惜哉，戊寅春初展轉至海上，僑寓近十年，流離困苦，以詩自遣，大半憂世思鄉，感舊懷人之作，金山高麗叟見之，謂曰，觀海上詩人多矣，鮮有此作者，過我談詩，遂引爲知己，旅滬老友之酬倡，亦與葩叟爲多，因彙集近年所作，乞刪定後，復自嚴汰，得詩若干首，顏曰寒松齋詩草，詩不足存，紀實而已，門人蔣松亭爲錄副本，請付剞劂，爰述其生平學詩始末如此，寒松齋主自敘。

題辭

二

奉答逸滄先生見贈之作即題其寒松盦詩草

吳門金天翹松岑甫

春秋直以詩亡作，董子江都遺教存，裔孫復作詩壇長，下筆直掃春秋魂，陳古刺今祖風雅，傷時念亂勳乾坤，垂老相識不恨晚，百戲紛乘我道尊。

奉題逸滄先生寒松盦詩

陳含光拜稿

鴈塞三邊地，龍舒八皖山，離經天下半，身得晚來閒，寒意松閒盡，春聲句裏還，詩成看驥子，一笑啓朱顏。

敬題逋齋吟長寒松盦詩集

陳德慈悔癡貢稿

八載纒愁何處寄，案頭詩卷積如山，願將謝朓驚人句，長此流傳江海間，舊游題詠憶菱湖，回首天涯別夢孤，今日寒松發清詠，有人豔說董江都，年來酬倡與方酣，好句遙憑尺素函，我讀君詩倍相憶，夢和春雨到江南。

奉題逋師寒松盒詩集

金山蔣松亭未是稿

挽回風雅百川東，盟主騷壇早屬公，氣概松筠凌晚翠，光芒文字吐朝紅，陶潛樂道筆尤健，匡鼎談詩言更工，忝列門牆多吸引，心香一瓣奉南豐。

自題

江上銅琶塞上箛，古今能得幾名家，滔滔無限東流水，此是恆河一粒沙，
鼙年遊戲在塵寰，歌嘯甘爲木石頑，自悔舟車多率作，枉留題句滿關山，
兀坐沈吟爲忍飢，男兒負米女兒炊，一家淡泊存清白，未受塵縈染寸絲，
酬倡相親狎海鷗，白頭知己老青邱，吟筒來往如元白，秦蜀遙通快置郵。（頻年海上，與高能叟酬倡
最多，高居華山路，書寓成都路，恰合秦蜀也。）
少小昇平晚亂離，須臾雲狗亦何奇，八年一臥滄江曉，博得寒松幾卷詩，
偷生叨作太平民，做帚猶存祇自珍，欲學鄭堂圖募梓，千秋敢說有斯人。

寒松盦詩草卷一

江都董玉

丁丑冬月初三日避地公道橋陶莊

倉皇避亂別家園，暫憩橋西又一村，地近邊隅防虎豹，歲稱中稔足饕飮，久離骨肉能忘情，詩書亦僅存，春伴還鄉期有日，餘生願階定中原。

戊寅春初攜家由北湖繞道抵上海

北湖水闊盪扁舟，兀坐搖搖類楚囚，差幸天公憐我意，春風送到古秦郵，乍投暮宿又晨征，小艇瓜皮緩緩撐，湖上風波愁太惡，舟師不解旅人情，樊汶經過望海陵，黃昏已上市橋燈，回思五十年前事，幾度東來集酒朋，柴灣知有故人栖，一入仙源路轉迷，我到剡溪思訪戴，片帆已過小橋西，（許畫隱住柴灣欲訪不遇）重上樓船氣不豪，人多於蟻滿江皋，眼前都是漂流客，忍看狂風捲急濤，攜杖來登海市樓，隔年烽火壓江頭，安全骨肉聊相慰，也抵還家且暫休。

奎兒自香港歸省

迢遙夢隔海南天，三日歸程萬里船，乍見方欣全骨肉，回思不忍話烽烟，千戈遍地何時息，憂患餘生亦苟延，憐汝勞勞將告別，平安常盼鴈書傳。



哭唐甥伯衡歿於高淳

久客江南值亂離，匪期與世竟長辭，淒涼旅榻歸何日，衰邁高堂病未知，天忌其才偏斲命，情親於我益增悲，子道尙有諸孤在，傷逝哀生老淚垂。

寄巴寒匏徐寒香集華山碑字

自報瑤章至，高歌信有神，來書通一水，游興到三春，猶是山河在，經過歲月新，平生惟二仲，與我樂相親。

記得中秋節，年年設一尊，今時千萬變，古道二三存，仰望雲生水，相思月在門，逢君應有日，重與會斯文。

祥兒抵株州已數月音訊道阻因念及之

客歲方從東海還，烽烟無奈逼鄉關，歸舟幸脫波濤險，賤食堪憐道路艱，只爲家貧清似水，更因國事重如山，音書盼到衡陽雁，念汝孤孀鬢欲斑。

春間抵上海許畫隱寄詩慰問旋以如皋淪陷馳書久不報次韻寄懷

海上秋風起，鷺弓等雁臆，雲山勞北顧，遷徙或南圖，避世遼東帽，移家范蠡湖，有書皆不報，何以

慰羈孤。

重作桃源想，漁舟洞口停，詎期烽火逼，直到露華零，鬢影愁堆白，衫痕淚濕青，幾時能踐約，與子酌仙醪。

秋夜懷人詩四首

杖劍能爲萬里行，老成謀畫趙營平，欲將文化開荒俗，並以屯田督野屯，消息關梅稽驛使，淒涼羌笛起邊聲，玉關生入頭應白，吟社還推舊主盟。（趙仙洲青海）

遙盼衡陽雁影單，修途梗阻寄書難，草堂且住思工部，藜榻將穿念幼安，嶽麓看雲愁變色，瀟湘聽雨夢驚寒，衰年同是離鄉客，何日江頭握手歡。（俞葆觀常德）

柴灣地是小桃源，悔未維舟一訪門，知我遠移江上棹，感君慰問竹西村，一家書畫停雲館，滿目烽烟水繪園，白首弟兄情誼重，避居樂土念生存。（許書隱如皋）

孤征入蜀爲生涯，三峽河流夕照斜，賣卜君平甘市隱，草玄揚子已名家，五男有志持蓬矢，萬里相親慰棗華，欲訴離悰傳鴈訊，但期博望早還槎。（張季易重慶）

答葆之親家有詩見懷

自愧衰庸與世疏，念君歌嘯樂逶廬，晨昏有子能親志，翰墨傳孫亦解書，欲問何時歸里社，應愁無地著樵漁，聊憑朔鴈傳情話，兩字平安祝起居。

七十年回想錄編就賦詩誌感

生逢甲子中興後，晚遇艱屯歷劫多，已是微塵浮宇宙，尙留倦眼看山河，天荒何地容蛄隱，運蹇無方避蝸磨，七十年來一彈指，流光易逝不回波。

憂患環纏識字人，壯齡低首入風塵，散材慚未酬知己，薄祿嗟無逮老親，關塞馳驅千里路，江淮輾轉卅年身，全家危寄孤舟命，化險難忘庇海神。

蓬門息影髮堆霜，每念兒曹客異鄉，賴有故人聯汐社，待刊詩事續雷塘，晚香差幸存園菊，塵世何堪變海棠，累卵可危巢欲覆，攜家避地北湖莊。

去日已多來日難，海隅滯迹豈求安，苦辛世味甘嘗膽，剝復天心盼轉丸，擲筆不勝家國感，編年聊示子孫看，餘生尙冀干戈定，松柏猶堪耐歲寒。

寄懷傅鶴岑武昌

滌上遙傳浹上箋，曾言晤子庾樓前，卜居舊種陶潛柳，避地應乘范蠡船，欲覓青山無樂土，劇憐赤壁又烽烟，未知黃鶴飛何處，西顧蒼茫一喟然。

十憶

漢家宮闕自嵯峨，銅狄摩挲忍再過，燕市酒人已星散，風寒易水起悲歌。（憶北平）
入塞歡榆出塞愁，蒙園小築記淹留，胡塵捲地風雲變，一片寒笳朔漢秋。（憶張垣）

明湖殘柳夕陽斜，烟霧重重四面遮。欲問鵲華無恙否，不知秋色落誰家。（憶鵲華）
九曲青溪夜落潮，綠溪柳色已蕭條，行之惆悵臺城路，風雨沈沈夢六朝。（憶青溪）
盛唐山下有菱湖，三唱菱歌入畫圖，漁父扁舟遊棹去，一湖烟雨已模糊。（憶菱湖）
浪激天門石怒撞，孤舟來往泊鳩江，滙簷不見題襟客，祇剩詩心老未降。（憶鳩江）
會說臨淮子弟兵，徐當躍起迎朱明，濠州本是龍興地，第一山猶聳鳳城。（憶濠州）
風景無殊拙政園，祇看樂罷走吳門，靈胥怒湧濤聲起，夜夜寒驚旅客魂。（憶吳門）
潑泗水邊白雲溪，會結坡鄰得暫棲，老屋藤花無覓處，斜陽冷落亂鴉飛。（憶雲溪）
蘇隄環抱白隄斜，湖水清澄似昔耶，遙憶稽忠墳上柏，枝皆南向老槎牙。（憶四湖）

挽卞孟弢

昆弟交情憶昔年，歸田白首話開天，茶神有癖愁能破，草聖雖顛筆已傳，此夫安知非是福，今生再見竟無緣，昨從海上聞哀耗，雪涕徒吟感逝篇。

自客冬避居北湖已一周年今仍客海上爲之慨然

已廢餘生避亂離，蓬圍湖海髮成絲，驚心夜夢猶鋒鏑，果腹晨餐祇粥糜，十日何堪言痛史，一年不覺鬱深悲，蕪城回首愁風雨，欲買歸舟又緩期。

懷草堂三友

日下舊聞思竹垞，草間偷活愧梅村，瀟瀟夜聽巴山雨，翦燭談詩酒一尊。（巴寒筠）
夜夢池塘春草綠，晚歸門巷夕陽斜，詩成萬首吟何苦，硬語盤空自一家。（謝開軒）
令子彙弧成遠志，外孫絜白得新辭，北湖攜酒歸來樂，醉墨塗雅畫裏詩。（程栖霞）

續懷人詩

中浦東風二月餘，艤舟相遇武陵漁，門前長者先停轍，樓上仙翁夙愛居，有子冬溫不暖席，課孫晨讀未燒書，道家早得修真訣，群鑿神光亦自知。（劉甸侯）
敲角聲中憶去年，聞君早上海陵船，消愁可飲三升酒，避地應耕二頃田，栗里琴書堪嘯傲，桃源鷄犬亦神仙，不知騎鶴歸來未，悵望江城日暮天。（卞猿齋）
菱湖酬倡又明湖，一瞬風雲變畫圖，茂苑就荒臺走鹿，滄江何地暮棲烏，河山歌哭成詩史，烟水蒼茫問釣徒，頭白馮唐年已老，東歸還有草堂無。（馮螿齋）
十年肥遯住吳門，一夕烽傳四野昏，戎馬倉皇將壓境，弓蛇疑似總驚魂，半焦微惜桐經鑿，垂老相憐處處禪，欲寄離懷無覓處，江南塞北忍重論。（孫寒厓）

喜得梅棧兩孫春帖

鴈箋傳到嶺南春，遠慰軍閭二老人，願祝東風齊著力，一爲威鳳一祥麟。

寒齋雜詠

病叟支離畏暮寒，圍爐取暖強爲歡，不知門外風兼雪，多少窮黎短褐單。（圍爐）
日暮江頭雨雪霏，呼童攜取一壺歸，黃金已盡貂裘敝，只爲嚴寒酒作衣。（飲酒）
晚年心已厭菅梁，何況飢啼滿四方，但得長甯容腹飽，雙弓米自有餘芳。（啜粥）
天寒誰有綈袍贈，遮體何嫌服不完，卅載破裘如百衲，補衣容易補天難。（補裘）
搜別殘灰讀泐碑，眼花手硬日臨池，晴窗一紙閒功課，信筆描摹似小兒。（摹碑）
滄桑不管是何時，入定枯僧雪滿髭，念舊懷鄉通寤寐，聳肩寒夜獨吟詩。（苦吟）

讀焦里堂雕菰樓集

著書萬卷是通儒，明月輝生璧社珠，展讀遺編心嚮往，雕菰洵有小樓無。

冬日雜興

流轉成逋客，潛居海上村，夢寒知夜雪，心寂忘塵喧，霜橋香於酒，秋菘嫩到根，終朝惟一飽，無事閉閒門。

去年當此日，城市易村居，寒犬吠鷲豹，水禽飢啄魚，茲爲東海客，夜讀北湖書，今昔雖殊趣，何如返舊廬。

有子亦羈旅，憂時逢亂離，鶴糧支欲竭，鴈訊到何遲，變化觀棋局，親朋負酒卮，寂寥誰與語，病骨

強撐持。

舊雨忽相值，（王蓮友）吟箋數往回，何須貧客過，只愛有詩來，同調酬元白，飛臂捷馬枚，擁爐溫宿火，歌興未全灰。

答徐寒香杭州

年光欲暮日西馳，話到吳山我亦知，放鶴連仙馴雪羽，烹魚宋嫂膾銀絲，將舒柳眼微嫌冷，若畫梅心要入時，寄語定香亭畔客，除吟風月莫深思。

題姚雨丁戊避亂詩後

離巢燕睇劫餘痕，收淚河山語轉溫，回首平蕪閒蔣徑，折腰垂柳種陶門，他人卵翼身偷活，大地玄黃血戰昏，憂國懷鄉託歌詠，浣花聞有草堂存。

得俞濠觀合川書

一雁來西蜀，音書慰問親，崎嶇萬里路，珍重百年身，旅館開哀郢，漁舟去避秦，天涯今白首，嬰鏃尙精神。

自古詩人迹，流傳蜀國多，家家團扇畫，處處浣花歌，美酒巴童獻，吟囊棧馬馱，青春歸作伴，題詠滿幽河。

自題七十歲小象

怪哉汝爲誰，鬚髮皆皓白，滄桑幾變更，尙在世間活，有子又有孫，非仙亦非佛，是竹西村人，爲海東通客，尋坡云靜坐，一日似兩日，幸活七十年，可算百四十。

再題小象

畫圖未必肖坡仙，年歲差堪及樂天，材不材兮誰辨識，我與我也且周旋，朔飢貌似侏儒飽，嵒嶺羞爭鬼魅妍，自贊自嘲還自解，爲莊爲蝶兩蕩然。

七十述懷

老年競說古來稀，白首何堪值亂離，滄海難填銜石恨，草堂惟繫浣花思，倦觀棋局柯將爛，夢訪桃源棹屢移，天地蒼茫身亦贅，放歌徒惜晚晴時。

虛留塵迹在寰區，回想蹉跎隙過駒，祇期未隨仙羽化，閉門甘作酒家逋，兒孫遠客長相憶，松雪寒姿老更癯，人壽河清如可俟，再期春釀一搗壺。

次韻答謝寒香

絲玄不再白，髮白不再玄，人生一過客，瞬息如百年，我自弱冠始，憂患相蟬聯，江淮舟飄盪，關塞車喧闐，俯仰幾何時，只是支離叟，事如縛兩蠶，藥之不龜手，蹉跎無一成，平生負師友，行不逮前

賢，空仰焦半九，（里堂有半九書塾），衰年况多病，無水飲上池，閉戶惟自省，匿迹畏人知，偃蹇耐冰雪，寒松無妍姿，病馬偶一鳴，還與伯樂遇，猥荷貽瑤篇，多勞梅驛使，妙語通玄機，同心貞素履，但願醉太平，重與觥酌兕，俚曲和郢歌，持以謝徐子。

和許畫隱韻

鯨魚手擊碧海中，夸父逐日追其蹤，揮斥八極烟障淨，星月復朗天衢通，宣平颯然建仙骨，眼界豁蒙雲水濛，家山咫尺伴春暹，一切煩惱得解脫，我將風雨訪故人，不惜匍泥雙蹀躞，天許聚會爲良緣，太平歌詠張高筵，酒酣掀髯一大笑，坐隅况有兒孫賢。

自題寒松圖

穹巖百尺挺霜根，盤錯曾經過匠門，聳已蒼然心自直，鱗雖老矣節猶存，天靈雪戰龍馘蝨，地障烟塵鶴避喧，本性由來甘冷淡，幸無阿曲似公孫。

嶽崎獨自庇其根，雲未歸來且閉門，衆壑陰晴觀世變，六朝興廢訪僧存，年荒得免薪樵採，林靜而無市井喧，後起新枝將勃發，支持大廈在兒孫。

紛紛塵撻便移根，曷若高樓道德門，環極常留詩卷在，椒山自有草堂存，凌寒不受諸峯壓，守靜羞隨衆籟喧，俯視荒蹤叢葛蔓，沿緣攀附類胡孫。

蜀岡翠鬢白雲根，夜夢空山掩蕙門，半畝荒園三徑冷，百年喬木幾家存，蚪潛不作婆娑舞，鳥語頻聞格磔喧，若聽琴弦風入定，欲思歸去弄諸孫。

除夕用東坡韻

縱之歡懷亦勿悲，天心潛轉示幾微，夜長如歲還須守，客久爲家可當歸，鶴不語寒知雪斲，鵲猶飛遠看星稀，羈棲何似農村樂，燈下兒孫得暫依。
光陰迅似水東徂，歷歷經過半道塗，是處兒孫貪果餌，幾家歡樂換桃符，不嫌苦荀供饒吻，且詠寒梅撚雪鬚，將酒祭詩循舊習，餘杯何惜醉屠蘇。

己卯春贈答許畫隱卽用其見懷韻

陳迹何須問雪鴻，兩心相印悟皆空，森森松柏凌寒翠，點點梅花澱淚紅，天地爲塵身是客，關河雖隔夢能通，扁舟飄泊風將定，欲向江村訪釣翁。

挽劉甸侯世丈

粉社相親謁若春，又同羈旅海之濱，忽聞白傅歸兜率，終使鸞蘇哭景純，三世交猶存道義，八公山已隔烟塵，逍遙控鶴冲霄去，應勝人間作幸民。

海上元宵卽景寫示奎兒

海市沈沈暮復朝，更堪佳節起歌謠，不辭一夕傾瓊瑤，何惜千金脫玉條，明月似憐游客醉，重樓猶唱念奴嬌，兒曹愛聽春燈曲，知否江南咽恨潮。

答俞濠觀合川

來去飛鴻蜀道通，知君近住瀘西東，詩題驛館銷紗碧，花發江城濯錦紅，情話破愁親武子，（與孫君同寓）客游懷古訪文翁，天教飽看奇山水，都在春風杖履中。

寄示祥兒昆明

六詔稱炎徵，今逢筭路開，隻身憐遠役，努力展良材，衣食知爲累，習書盼早來，點蒼山色好，企望一徘徊。

寄懷商藻亭太史成都

前歲相逢一指彈，無端風鶴促征鞍，牧之已醒揚州夢，太白何辭蜀道難，應有浣花供綵筆，遙知濯錦起文瀾，春來若問江南柳，烟雨淒迷不忍看。

次韻答卞丈猥盦

自從烽火逼南都，舉目河山淚欲枯，盡室偕行困羈旅，餘生愛患諒歡娛，徒增年齒懶擿馬，時繫鄉心豈爲鱸，衰朽何期勞眷顧，不辭詩札到江湖。

書幸

家貧質廡感梁鴻，賢主何期遇伯通，濁世獨存廉讓德，里仁信有古遺風。
倉皇避亂出城隅，付託惟憑穎士奴，不信蒼頭多俠義，猶能愛屋及棲烏。
老馬還知翦拂恩，湖村來往又江村，兒孫遠適吾衰矣，急難堪資一劍存。
可憐弱女不辭艱，歸檢殘餘獨往還，書籍堆牀衣在笥，懣情老婦亦歡顏。
平生著述愧無才，披拾遺聞故紙堆，淮海英靈原不爽，發餘呵護未成灰。
老來結習只貧詩，敝帶堪珍是剗遺，藁梓鄭堂雖有例，靈桐半惜尾焦時。

酬答卞瓊盒海陵

海陵小試憶童年，魚貫如登釣客船，刻燭催詩薄似昔，成林種字早歸田，感時應拭銅人淚，隨地爭迎
玉局仙，贈我瓊瑤情足慰，掀髯一笑話開天。

某以事見挽寫此謝之

出處原難混一塵，信天已許著閒身，安貧不羨鄰家富，守舊何知世態新，壯歲慚爲強項令，頽齡恥作
折腰人，風波未改漁翁樂，終老孤舟守釣綸。

贈王蓮友

夢樓妙筆通禪理，石谷高年老畫師，好語皆如佛說盡，此中三昧耐人思。
道腴健啖花豬肉，心淨常參玉版禪，堪羨眉山蘇玉局，又傳詩學到斜川。

初夏偶成

日長銷盡一罇烟，閉戶無聊理舊篇，半雨半晴梅熟節，乍寒乍暖麥秋天，蠶因鬪縛身將老，燕得巢歸意自便，午夢初回書倦讀，一甌苦茗淪清泉。

述志集放翁句

早畏危機避巧凡，江湖到處著身寬，亦知病得清新健，耶就人求本分官，迂士豈堪新貴使，苦心始識著書難，老來閱盡榮枯事，夢裏都忘兩鬢絲。

午夢

午夢初回日影斜，定心趺坐似禪家，忽逢細雨微風過，鼻觀如聞薝蔔花。

讀吹萬樓日記

恆河沙數萬千劫，金粟如來是化身，苦口不辭常說法，精誠所至自通神，玄談已信龍皈佛，世界何堪

獸食人，普願衆生向覺悟，冤親平等戒貪嗔。

心光不以幽明隔，慈孝何能任謗誹，史筆閑微原有目，文人說鬼未爲非，癡狂速拔泥竿出，安樂當從淨業歸，莫作尋常家乘看，此中三昧是福機。

小疾何妨度厄年陸句也足成一律

小疾何妨度厄年，放翁先我有詩篇，原來知足常生術，卽是安心自在禪，斬斷葛藤須慧劍，鑿空水月總虛船，倘登覺岸從茲悟，冀免沈迷苦海邊。

和許靜存韻

老來何事作閒忙，只愛詩中意味長，吟興藉驅煩惱病，客居聊當水雲鄉，養生砂漫求句漏，忍餓薇應食首陽，但願嘯歌天與健，未妨高枕臥琴囊。

張甘亭畫寒松圖並題句見贈次韻報謝

年來酒負故人卮，一別家山異昔時，筆底蒼髯驚髮鑠，客中白首感支離，千金難得僧繇畫，二妙兼題老杜詩，高韻雲天何以報，桂松長壽兩相期。

寒香游孤山林墓有詩寄示偶成一絕

巢居閣在白雲間，夢落梅軒鶴往還，我愛詩人林處士，此才庶不負湖山。

觀棋

弈棋殘劫未收枰，局外旁觀繫重輕，市錄西鷄時向背，六張五角事分明，蟲沙不惜隨猿化，蝸國猶堪抗觸爭，倘有魯連紛可解，一雷鳴夏是先聲。

題國學叢選呈吹萬

昭明不作瓊樓空，壇坫東南久屬公，湖海詩文傳落落，斗牛光燄燭熊熊，起衰信是中流柱，翼雅猶存正始風，萬匯所歸無派別，搜羅瑣網出奇功。

閑閑遯世有山莊，萬卷圖書一室藏，祇惜陳編遭寇掠，不辭孤詣挽溺狂，杜陵喪亂成詩史，高密傳經在禮堂，膏馥雖殘足沾溉，南豐一瓣蕪心香。

下帷補讀老無功，枕秘奇書頤豁蒙，結習未除縈寤寐，冥心虛想入洪濛，斯文今已如星鳳，往迹何堪問雪鴻，墜緒幸能延一綫，蒼茫回照夢能通。

百年哀樂已無多，塵海茫茫又若何，度世方來茲寶筏，悟因以往是餘波，周情孔思天應格，佛性仙心劫不磨，扇拂春風開覺路，扶輪回復舊山河。

次韻報謝猿盦丈錄示師友遺詩

君從嶽麓侍游歸，師友詩存世已非，逸韻流傳姜白石，臨風懷想謝玄暉，蠅頭字細猶能寫，龍額珠遺幸未飛，搜剔殘灰應感奮，重勞雙鯉寄江磯。

題劉恭甫傳雅堂詩文集後

左氏春秋成絕學，遺書幸未委蒿萊，儒林早已傳三世，風雅從知有別裁，澤衍賢孫能述祖，時無上相孰憐才，右文猶際中興盛，回顧江南事可哀。

九日

風雨頻年感鬢毛，家山何處問登高，園荒久負淵明菊，旅困空持畢卓螯，未必有人來送酒，非關無字輟題糕，每逢佳節愁難遣，閉戶惟堪讀楚騷。

秋夜詠懷

秋夜何會寐，茫茫百感生，江湖髮鬢短，風雨一燈明，漸迫殘年景，難忘故國情，東方猶未白，喔喔聽鷄鳴。

海氣通潮汐，秋深已覺寒，搔頭天夢夢，扣角夜漫漫，飯顆吟詩瘦，柴桑乞食難，四方兵未解，遑論一身安。

回憶離鄉日，湖村偶寄居，鄰春供宿米，霜圃擷新蔬，地僻忘兵燹，農閒講道書，此生謀已拙，悔不混樵漁。

天許從吾願，歸舟亦解纜，旌亭呼舊雨，杯酒話家山，重續蕪城賦，難銷劫火斑，可憐蕭瑟意，空使落江關。

題許畫隱雙池避地圖

避世今何所，蒼茫四顧昏，波仍湧東海，宅可卜南村，有地容棲隱，攜家穩夢魂，故園鄉咫尺，堪以慰生存。

不問人間世，逍遙池閣涼，書巢翁自放，鑑曲客猶狂，竹里有圖書，桃源非渺茫，地饒雲水淨，雙鶴小迴翔。

我亦漂搖羽，江孺偶遷居，思吳歸尚滯，訪戴願仍虛，風雨穿蓑榻，乾坤夢草廬，盈盈隔秋水，欲問武陵漁。

信有霜天鴈，音書旦夕通，詩編年甲子，人在漢西東，願罷山中弈，將收江上箴，披圖應識路，來訪葛仙翁。

姚雨耕攜詩枉過

白頭避地客江皋，何限深心託楮毫，城已就蕪應賦飽，樓原在上合居陶，放懷早自期千古，得句真堪藐二豪，風雨漂搖相慰藉，攜詩過我未辭勞。

小疾

小疾維摩不礙禪，呻吟伏枕亦堪憐，阮囊空洞探何物，山氣微寒墜欲顛，自恐斷腸成寸寸，偶然捫腹又便便，老來薑桂無嫌辣，逐去邪魔得少眠。

書懷

老病經秋似瘦桐，客愁滴碎雨聲中，樽空無計斟東碧，米貴何妨飯二紅，出世惟思虔奉佛，信天猶自強呼翁，不如江上漁家樂，半幅歸帆趁晚風。

詠桃花

潭水桃花盡日流，深情送盡海西頭，東風原是无情物，嫁與東風不自由。

十月二十六日亡室黃恭人七十冥誕祭之以詩

幽明一樣古稀年，翻羨騷鸞作女仙，道是逍遙天上樂，不看滄海變桑田。
溫恭德已荷芝封，錦被珠冠展舊容，早脫塵凡猶是福，清平時代不重逢。
顧我攜家到北湖，知卿靈護避雀苻，頻聞話舊茅簷下，追念遺恩兩僕奴。
魂兮縹緲倘來歸，莫念家貧苦食蕪，昔日兩雛今有子，養成毛羽欲南飛。
今朝杯酒薦清筵，只愧囊無舊俸錢，手寫金剛經一卷，聊資冥福報生前。
卅年永別不堪思，彷彿容顏夢見之，白首龍鍾猶在世，瑤臺相會又何時。

讀蘇詩次魯直畫馬韻戲仿其體

昨宵忽夢出塞行，枕邊驚起笳鼓聲，不知戎馬方縱橫，年來幻態參已透，忍飢何苦吟詩瘦，無田可種

南山豆，蹇蹇安得追青驄，不如湖上之漁翁，朝朝醉酒雙頰紅。

贈秦曼卿兼乞畫寒松圖

夙知五筍館中仙，邃古潛研過昔賢，已幸題詩借惜抱，更因論畫企鄰烟，雪蕉妙筆通三昧，虹月滄江載一船，溲笑蒼髯老無賴，寒姿猶冀附君傳。

寒香贈詩箋書至而箋未達戲作小詩問之

百幅雲箋意疊稠，詎逾十句滯庚郵，先生若化爲烏有，刺史真將失白州，青鳥迢遙何去也，梅花消息可知不；寄書不達尋常事，只爲兵戈尙未休。

夜夢故園梅花，用東坡松風亭下梅花韻

自我一別湖上村，風雨銷損梅花魂，南枝半落北枝稿，月色慘淡天爲昏，夜夢銜書青鳥亟，寒花數點開家園，縞衣雖薄侵雪冷，玉顏不改含春溫，甯甘幽獨到歲暮，豈能媚俗迎朝暾，空山高臥惟鶴守，凡鳥何敢來扣門，清芬郁郁自千載，冰心默契於無言，羅浮夢醒在何許，月落空負花間尊。

望雪夜聞雨聲而無雪用尖叉韻

翻覆陰雲作意織，天寒稍覺幾分嚴，風初入竹疑敲玉，冰欲生花未結鹽，非爲山梅辜野趣，只因宿麥念窮檐，占豐如遂農心願，喜上眉峯直到尖。

瑟縮堪憐繡樹鴉，閉門我亦歎無車，慰情聊勝三更雨，望眼將穿六出花，空見畫蕉留粉本，未聞詠絮壓詩家，衰年漸感吟情退，呵凍應難學八叉。

曉起初見微雪疊前韻

醉翁詩格鄙俳纖，星聚堂中禁令嚴，賓客欲停梁苑筆，兒孫笑撤謝庭鹽，銅龍初凍逼眞節，鐵馬無聲冷檜檐，遙憶灞橋驢背上，舜眉可耐晚風尖。

殘年冷凍似飢鴉，巷僻從無長者車，米價今朝平玉粒，鄉心昨夜夢瓊花，不持寸鐵猶堪戰，獨釣寒江可當家，欲喚奚童沽酒醉，出門恐誤路三叉。

快雪吟用蘇詩聚星堂雪韻

昔年出塞墮落葉，萬里關山亂飛雪，朔風割面冰在鬚，馬足欲僵鳥豎絕，幕中飛檄掃胡塵，一夜寒笳吹斷折，歸來廿載今無家，痛絕匈奴未盡滅，雪端蒼狗有時變，海底鯨魚行可掣，閉門高臥夢初回，搖盪寒光雙眼纒，方鋪萬瓦漏魚鱗，旋落六街瀉木屑，定知今夜李將軍，飛入蔡州電一瞥，勢將破竹下江南，白戰功成吾可說，擁裘起作快雪吟，視凍不辭磨冷鐵。

夜夢至南海兒孫迎接登岸復駕小舟遨遊旋入一茶園見有白

髮蒼顏十數人相邀入席酌酒賦詩席次有小童導引一池沐

浴灑然頓醒歷歷如眞境亦奇事也紀之以詩

春風送我海南游，且喜波平泛客舟，陸賈兒孫迎杖屨，南山仙侶錯餽籌，不期勝負來孤嶼，已有詩名動十洲，一勺天池堪浣垢，灑然清醒臥瓊樓。

寒夜用東坡除夜贈段屯田韻

我生七十一，已如夜過半，流光速於矢，日暮何須歎，客居雖無聊，世態可譚玩，兒孫各雲游，儼僕半星散，弱女儻相依，老妻幸同伴，不必愁貧病，長夜行將旦，有詩兼有酒，循例陳几案，俯仰今何時，中原久喪亂，歷劫詩卷知，薄祭酒堪鹽，我豈不懷歸，人言行可緩，况自鵬腰纏，何有十萬貫，年老交漸稀，道窮志不懦，將典壁上琴，忽送雪中炭，（徐親家借資度歲）聊備卒歲資，且駐志愛館，餘生能幾何，一室暫溫暖，星雲會復光，試看燈花粲。

臘杪祭先

漢祀猶存臘，江鄉已報春，龍鍾憐病叟，扶拜祭先人，酒餉鄰家薄，梅開故國新，枝梧年易過，客久不辭貧。

除夕仍用蘇韻

吾生如寄勿須悲，悟到玄機妙入微，九萬里中鷗暫息，三千歲後鶴應歸，未來焉覺今皆是，雖老何曾古壘稀，翻笑燈檠人不達，胡因劉表欲相依。

詩卷光陰瞬已徂，老年難得是糊塗，但箇飽飯能安枕，不覺新桃換舊符，瘦影猶親燈廝足，小言且賦館蠅蠹，眼前一事堪稱快，臘雪先將病體蘇。

庚辰元旦試筆

斗轉龍躔歲始更，星雲復旦放光明，客居幾忘春正月，舊俗仍從夏小正，世界卽今平戰壘，吾儕猶獲幸餘生，磨厓擬作崦溪頌，快祝黃河萬里清。

雨耕枉和寒雨詩用岑嘉州韻並示誤以蹊爲磻仍用前韻答謝

兩年同客瀟東西，爾倡詩堪證雪泥，老眼君真如月朗，虛心我已望塵低，義疑與折陶彭澤，句妙爭傳李玉溪，一字之師甘北面，春風應許酒頻攜。

濠觀寄示李崧甫詩用鶴岑韻賦贈

雲泥久隔未遙箋，塵夢重溫卅載前，玉塞墮車馬頭雪，金陵斗酒月中船，紅桑見影三生海，白首懷人半化煙，今讀浣花秋興作，靈光西顧獨巍然。

一年老一年用放翁韻

一年老一年，十白難一日，不知蠶繭縛，但覺烏跽疾，海隅一住三年久，囊中無酒樽無酒，縱然人壽

到河清，只恐鄉歸無何有，食不足况其餘、清香一炷水一盃，苦吟入定安我愚，朝來又白幾莖鬚。

和雨耕感事韻

我亦忘機學漢陰，江湖白首豈初心，長房早願隨壺隱，莊舄何堪聽越吟，三月烟花行有約，一天寒雨又相侵，東風狡獪真成恨，恨不能平抵海深。

題丁愚齋坡穎堂

吾讀東坡詩，四海一子由，友愛夙所企，風雅誰爲儔，不圖有愚公，今與猿叟游，（下文猿叟）舊屋嗣松風，詩社開樵榴，兄事即弟畜，此唱而彼酬，同時如伯仲，乃與眉山侔，昔聞有謝陸，聲氣相應求，曾以坡穎况，韻事傳千秋，（謝太史麀伯，與陸太守吾山，以坡穎相况，見之詩中，）風誼無今古，輝映堪吟謳，如登逍遙堂，風雨夜悠悠。

詠妓

幾日春寒未出行，天涯草長亂鸞驚，隔江南女何知恨，大道高樓別有情，絲竹誰陶中歲樂，琵琶已觸關愁生，哀鴻化作鷺鴻影，無處飛花不滿城。

憶北平崇效寺牡丹

記得看花百子坊，與人都解說花王，燕環當日銜肥瘦，姚魏誰家騰紫黃，客館又將逢穀雨，春明幾度

立斜陽，白頭猶夢前朝寺，何處飛來綠鳳皇，（寺中以綠牡丹爲最。）

次韻酬答游止堅泰州

幾番風雨黯神州，荏苒年華逝不留，邊論西雲曾露爪，惟逢東野輒低頭，高名早已知驚座，佳句真堪號倚樓，何日琴樽同聚首，且披珠玉一開眸。

清明

清明無客不思家，（成句）何況三年髮已華，底是子規啼不住，驚回鄉夢又天涯。

游仙四首

偶騎白鳳御風輕，仿佛神游上玉京，圓峽方壺誠異境，琪花瑤草不知名，高寒自勝人間世，汗漫聊爲物外行，忽遇青童來導引，崆峒咫尺訪容成。

此身如跳入壺中，清淨從無水火風，商皓茹芝招舊侶，韓康賣藥化兒童，天姝疑是秦毛女，仙窟還逢晉葛洪，莫問八公山上客，即看鷄犬亦融融。

瓊樓可宅高千尺，雲錦爲裳薄五銖，若聽維山笙引鶴，便隨葉令鳥飛鳧，麻姑珠米皆堪食，王母金漿不待沽，况學赤松能辟穀，無飢無食更何圖。

列仙欲問意如何，但聽天風動玉瑤，得酒可供千日醉，有家合傍五雲居，金丹鍊就長生藥，瑤簡繙開未見書，此是上清真福地，奚須再訪武陵漁。

後游仙四首

莫羨盧敖汗漫游，大羅天上亦生愁，蒼蒼霄漢雲無路，清淺蓬萊水滯舟，誰信赤松能不死，但聞黃竹有哀謳，君平占易知消息，萬古乾坤總一漚。

希夷豈是睡中仙，一睡沈沈不計年，縮地長房將乏術，補天媧后亦無權，巢居難覓三珠樹，石爛全枯十丈蓮，玉局詩詠應記取，海山兜率兩茫然。

天魔十萬鍊瑤京，電掣颺飛震九瀛，道士狼無儲百石，仙翁家孰住青城，蝦蟇蝕月貪無厭，烏鵲填橋絮不成，一例東西感離別，鮫人珠淚瀉河傾。

弱水難瀕萬劫塵，神山宮闕倒金銀，藥偷月裏嫦娥悔，錢貸河間姪女貧，欲作仙人還忍辱，何堪漁父又迷津，殘棋觀罷歸山下，柯爛方知大地春。

回想

回想浮蹤落九寰，少時僥倖老癡頑，詩追白傅東坡後，書在青州北海間，跨馬當年馳絕塞，打包無處訪名山，留侯辟穀吾堪學，鴻寶何須再駐顏。

奎兒有由港入渝之訊

隨行乘樓海乘槎，冒暑西征萬里遐，料與弟兄逢六詔，（時祥兒在滇）將攜兒女入三巴，老懷誠憤猶

憐汝，旅館聞鶉莫忘家，馬上平安應有訊，夢隨明月到天涯。

感逝詩

詞流淮海君稱俊，靈理超然松菊心，身後得遊千載譽，陸增聲價重鷄林。（梁公約）
不信詩人陳大銓，早年豪放晚歸僧，色聲香味俱參透，文字禪通最上乘。（陳孝起）
聯牀風雨讀書堂，猶憶元方與季方，自是當年好兄弟，不堪人物小滄桑。（方地山澤山）
名場百戰數何奇，短簿參軍又一時，小築邈來成破寺，鐘殘不忍讀遺詩。（吳召封）
童子擢科富經筵，孝廉幼學秉慈帷，詩人風雅猶餘事，京洛英雄奉大師。（桂偉丞）
十年憔悴客京華，宦轍重逢皖水涯，不獨疇人工握算，懷荃詞集亦名家。（王翁廷）
靈芬仙館郭頻迦，重過宣南兩鬢華，何意鶴樓人去杳，不聞江上撥銅琶。（郭楚生）
文采風流老擅場，不辭詩酒門清狂，冶春後社今消歇，壇坫何人再主張。（凌仁山）
才華卓絕王無飽，憔悴憂傷未遇時，詩筆週題兩北海，誰從劫後拾殘遺。（王義門）
家在樓西老布衣，平生低首雪谿師，苦吟自不嫌寒瘦，剩有齋齋一卷詩。（翫畏之）
圖書金石恣兼搜，虹月光棍米氏舟，早識魯連蹈東海，不如何遜在揚州。（何芷齡）
風雅原來託附庸，詩壇酒社鎮相逢，今無北海誰尊孔，塵壁猶題飯後鐘。（孔劍秋）

感遇詩

小試嶄然露頭角，搥衣已許立程門，森森公府清如水，始識文章太守尊。（程雨亭太守）

海陵局賦雪飛花，凍墨搗文亂點鴉，幸遇長沙王祭酒，芹香初擷露萌芽。（王祭酒益吾師）
大宗師仰漢楊雄，小草何期入藥笈，記得侯芭同載酒，草文亭下坐春風。（楊蔡圃師）
天潢貴胄老尙書，患愛如春士氣舒，塞北江南恩再造，思源飲水淚沾裾。（溥尙書玉岑師）
虞山相國大司農，吐握賢勞士景從，垂盼不材褒個儒，謬評感戴郭林宗。（翁文恭公師）
丁年秋仲試京兆，鸚鵡曾逢學士蘇，他日竹林閒話舊，不忘滄海有遺珠。（榮相國華卿）
國子先生招館下，歌風賦試萬餘言，文章鑿賞驪黃外，騷首猶瞻泰斗尊。（貽祭酒鶴人）
騫駘戀棧偶依劉，何意孫陽遇壽州，文字因緣推殿誼，爲開道路策驂騮。（孫文正公）
當年新政重農商，幕府初開念溧陽，授簡濫充賓客列，誰知一藁易滄桑。（端忠愍公）
翰林子墨愛文章，課士相期貢玉堂，關鼎丹須經百鍊，欲回風氣沈東陽。（沈太守碧齋）

壽雨耕七十

草亭無日不相見，誰遣吾儕到海濱，風雨未歸同社燕，蓬萊已淺困潛鱗，靜觀屢氣樓臺幻，淡入鷗心
杖履親，白首他鄉差幸健，忘懷卽是葛天民。
斯文宗派衍桐城，不露才華爲避名，獨立不甘隨衆濁，千秋自有以詩鳴，雲烟逼眼人書老，風月娛懷
子鶴清，梅自長春松耐冷，相期堅守歲寒盟。

寄懷寒匏南京寒香瘦匏杭州

未採孤山梅，先憶秦淮柳，寒瘦三詞人，交比金石壽，一者南朝僧，兩者西冷舊，天性愛湖山，清羸

自享受，元白互倡酬，襟袖餘詩酒，妙語如蓮花，香風灌鼻稜，未飲已醉心，相思圖握手，而我老且病，才拙呼負負，蓮社會有期，分題羹待剖。

再用前韻寄友人

不賣召平瓜，不種陶潛柳，忍餓東海濱，誰爲千金壽，風雨神相通，天涯有朋舊，知我寒松寒，哀憐亦不受，結習未廢詩，醉意不在酒，塵淨心觀空，香定鼻忘嗅，無病亦無藥，何聞不龜手，青山與故人，客久兩孤負，千里證素心，疑義一折剖。

葆之親家惠贈小影即題兩絕於扇端交東里甥攜呈

君居北海我南海，憶話雖通隔道塗，何幸展圖獲良覿，春風滿面雪盈鬚。

手執牟尼百八珠，焚香靜坐一塵無，詩禪畫史如相會，應繪香山九老圖（兼謂鴻定之，朱菊坪，宣古愚，諸君子）。

立秋得雨稍涼適葆之寄詩至走筆報之

炎炎苦恨火雲流，一葉飛來忽報秋，暫借清涼支病榻，又妨風雨入危樓，蜉蝣身外乾坤隘，蟋蟀聲中歲月遒，兩地相思頭已白，有詩何忍訴離愁。

丁幼蘭年七十過談索詩

皖水舊游今有幾，申江何意辱君過，山川故國烟雲黯，杖履春風笑語和，重話索心如夢寐，相看白髮已婆娑，忽忽四十餘年事，老健真教閱世多。

題寒松覓句圖集歸去來辭字

吾自寧吾樂，天游任獨行，心將無物物，景亦不生生，矯首流光易，遺懷富貴輕，飄風吹未息，雲翳幾時清。

萬物有時盡，孤松不世生，崎嶇盤路出，清遠自天成，柯獨倚雲矯，心無向日榮，老經春往復，相與引詩情。

邱壑常攜酒，風泉疑撫琴，遐觀歸鳥景，已息倦雲心，鄉入無何有，時知來與今，嘗懷詩未就，扶杖欲追尋。

出門心悵悵，僮僕問何之，已去三春景，常懷幾首詩，既迷期有悟，將得復相遺，不可向人語，無言時自怡。

窈窕松風壑，尋詩獨往還，心常追路遠，顏爲得天歡，盡日懷無已，疑雲覺未安，庭柯景將息，猶自倚窗觀。

向晨胡不樂，既得亦微涓，去去入詩徑，盈盈話酒泉，遐心觀宇內，清嘯出風前，自有琴書趣，消搖是樂天。

不問今何世，風懷老未休，雲柯交絕壑，天景入孤舟，琴趣得三樂，詩心傲萬流，東臯有知我，亦願與之游。

有室可容膝，無田奚問蕪，留春猶老物，親化覺今吾，賦就詩存話，書成酒引壺，撫松非傲世，聊以寓懷孤。

遣懷再集歸去來辭字

去來自悟游心樂，光景將期與物春，宇內萬吹風以息，園西獨往日相親，昨非未覺盡今是，無我何知還有人，扶杖觀雲輕富貴，尋歡猶得及良辰。

往時僕僕悵形役，生入關門懷已舒，流蕙既欣歸有策，倦游休問出無車，南園去就鄉人酌，東觀言尋老子書，萬壑松風琴獨撫，飛來春鳥樂相於。

風雲易化膽天宇，何事萌人欲入關，不悟迷途來未已，欲將追日去無還，萬夫奔命驅車出，三世清時倚杖觀，經盡崎嶇猶自策，生存老幼始歡顏。

歡心有酒安天命，悲感無衣感物情，流寓知經三載遠，問途還候幾時清，孤舟已勝晨將及，萬木交扶室始成，告我老農田可復，壺觴盈路欲相迎。

日將入矣有歸路，泉自流兮無息期，雲出東西知已倦，鳥飛來往念何之，世經幾易松存徑，物不相容菊傲時，與我交游非盡絕，情親就話樂天詩。

吾生字內知焉寄，不問何鄉盡是歸，心悟已迷觀內景，言追既出悵前非，老而還稚顏常悅，我亦猶人命帶微，風駕雲車良可羨，消搖游自任天飛。

三集歸去來辭字

悟微欲問容成子，觀趣還游獨樂園，杖以輕攜來菊徑，琴將倦撫倚松門，書雖絕俗爲形役，詩不求知願自存，未覺候途是何者，既有酒酌盈尊。

倚籬路已徑行遠，孤傲心懷不入時，西出關將迎老子，東海路欲候安期，春來客酌幾尊酒，老去還存萬首詩，吾亦有園寄泉壑，荒蕪已恨化無遺。

世人羨我有三絕，我獨游心萬壑前，矯首倚松雲入岫，關懷問菊徑成田，欲將去日知來日，不事憂天自樂天，春景及時猶未盡，流觴可以引清泉。

田無復有歸奚問，室既猶留憩可安，人得何人時來往，我知與我獨齋桓，良辰酒盞不常設，向日詩成還自觀，於世無求心已化，帝鄉可去亦顏歎。

我出東門日日游，自知歡樂不知憂，未來猶盼春將及，以往休言景可留，懷遠路羅行者問，良常書問老夫求，室人稚子欣相告，亦欲臨流去棹舟。

雲歸西壑倦將息，泉向東流去未還，世路求榮人役役，春風話樂鳥關關，無言自覺得琴趣，不老何知是酒顏，萬物園搖幾欲盡，天猶留命寄遐觀。

榴松竹三友圖下猿叟屬題

我聞獨叟述祖德，榴發多花世蔭福，又聞愚公誦清芬，家有松風舊書屋，我懶生長竹西邨，愛惜三餘老碌碌，何圖愚公偏好事，聯爲三友榴松竹，心交不在形迹間，歲寒三友亦近俗，是誰妙手擅丹青，

著筆寫真竟成幅，（邵君松林，工寫真，以下狷叟，丁愚齋及予三人小象台畫一扇），家家團扇畫春風，狷叟豐神識者熟，愚公自有海鶴姿，不失廬山真面目，我將顧我期何人，自贊豈不笑捧腹，狷叟况是丈人行，道誼相親呼以叔，竹林曾與籍咸游，燕雀何堪比鴻鵠，愚公神契如舊交，談詩未訪愚公谷，乃采虛聲辯嗜痂，江上魚鴻常往復，自來相知貴知心，直諒多聞誼珍篤，形神莫作畫圖看，文字徒供齷齪，久要言不忘平生，只惜光陰如轉轂，秋高又見月同圓，道梗猶期地可縮，他時高會集香山，詩酒琴應列鼎足，同與愚公賦壽朋，交推狷叟爲尊宿，榴紅松翠竹青青，今日聊爲歌一曲。

祥兒函告中秋月夜同阿兄奎兒泛舟洱海

遙憐羈旅逢佳節，昆弟何期在一方，微外共看今夜月，客中應憶舊家鄉，水光入酒搖重碧，山影迎舟露點蒼，但使波平風不起，臥游我亦樂飛騰。

奎兒遠赴滇西有詩卽用其韻寫示

萬里雲車駕馭輕，出關應有野人迎，山環洱海千峯立，天闢蠻荒一柱擎，游記可尋霞客迹，邊氓猶道武侯名，天涯莫漫嗟行役，烟瘴消清月自明。

客居雜興用林逋韻

盤居敢說意超然，水木皆非舊日鮮，欲定松風猶謾謾，初疑梅月故娟娟，硯池易竭惟餘瀝，畫船雖存又化烟，萬事觀空心自在，未妨啓篋理吟篇。

軸

通齋聊避海風腥，天象沈觀入杳冥，霞落半空魚尾赤，山餘幾點佛頭青，腰纏騎鶴揚州夢，書換籠鵝老子經，眼已生花頭似雪，晴窗無事讀黃庭。

神明莫道發羸姦，歸去貧如陋巷顏，交以忘形來話舊，相非貪肉幸生還，得天獨厚容吾拙，與物何求覺自閒，彭澤倘猶食斗米，豈能採菊見南山。

累人債已避無豪，常以書爲引睡媒，挑戰棋將防聖手，聯吟詩可壓狂才，寓言十九巢蚊睫，開歲三千有鶴胎，寸地掃除塵垢淨，焚香一炷奉如來。

久無車轍停門巷，偶得詩箋祕枕函，春樹懷人凌劍閣，病梅伴我老書巖，腹飢甯食空山蕨，骨瘦如支野屋杉，天冷漸愁衣褐薄，濁醪何惜一杯銜。

白首人稱齒德尊，如今衰朽復何云，論詩未敢期千載，尙友聊堪詠五君，幾見丹成仙得道，似聞百戰將銘勳，三年羈旅空搔首，且臥滄江看暮雲。

却後

却後無家不數貧，珍珠數米桂燃薪，眼前憔悴可憐者，餓死多於去節人。

回憶

回憶清晨出北門，小車得得向湖村，三年一夢雷塘路，烟雨今朝正斷魂。

吾生

吾生七十又過二，薄酒還能醉幾杯，游子不歸愁菽水，病妻相對畫爐灰，半枯髓已經三洗，百結腸猶日九迴，衰老漸知塵念淨，不須白髮任情催。

續感逝詩

青蓮學士舊王孫，詩酒豪情想像存，三世淵源師友誼，蒙園回首更銷魂。（毓紹岑）
充國當年出玉關，書琴松雪宮情閒，蔭花久斷春消息，琴軫塵封鶴不還。（趙湘岑）
早年間字晚偕遊，相顧師生已白頭，觴詠忽逢春社散，桃花潭水付悠悠。（汪幼儀師）
攜家會就白雲棲，近接坡鄰隔一堤，詩史畫禪皆物化，草堂猶記浣花溪。（杜滋園）
來尋威鳳舊門闥，不見當年憚子居，塵市已隨桑海變，詩文零落況其餘。（憚季中）
八公山下遇劉安，清鍊將成九轉丹，拋却淮南舊鷄犬，神仙縹緲海天寒。（劉甸侯丈）
夜夢沙鷗淮海邊，題襟猶讀舊詩篇，三年一瞬今何世，不管滄桑自在眠。（沙祝蕩）
宜南風雪老牆根，情話依依酒一尊，訪古曾隨過冷市，夢痕猶繞海王村。（劉說甫）

次韻十狷叟詠物四首

鍾期不作海深沈，何況胡笳四面侵，別調儘多彈續續，鏗材誰識德管管，庭闈已老甯甘廢，靖節無絃自會心，聽取梅村歌慷慨，玉京莫道寡知音。（葉琴）

短劍今無三尺長，須知本性尚堅剛，壯心雖老難爲舞，俠氣常存尚有鋸，得斬萬魔聊一快，卽經百折亦無妨，破銅爛鐵會收買，血迹塵襟寒月涼。（斷劍）

欲將得失淡然忘，賸篋其如弊所藏，紫鳳天吳圖罅補，殘雲缺月事平章，飄零蝶粉疑神化，割裂蛟精有淚行，劫後若逢湯袞措，縱完趙璧亦心傷。（破畫）

讀晉書古鑿前車，自厄秦焚恨孰如，蠹蝕已無文可補，鼠偷况未害全除，欲搜餘燼陶墳憤，不守名山計侮疏，抱缺我猶艱一得，輸君萬卷腹中儲。（殘書）

放翁有六十二翁詩今用其韻作七十二翁吟

大千世界墮塵劫，七十二翁撐破船，風雨何當登彼岸，交游半已隔人天，緣隨文字猶相假，窮忍飢寒不受憐，雪後梅花春意轉，盼俛消息到尊前。

除夕用元遺山甲午除夜韻

客中不覺歲時遷，又見梅花爛欲然，長醉難求千日酒，浮生未繫五湖船，詩刪舊稿餘千首，符換新桃又一年，但願曙光能早現，得揩老眼見青天。

辛巳元夜無月連陰作雨

重陰閉住幾分春，有酒何嫌隔歲陳，樓小愁聽連夜雨，月明羞見異鄉人，萬家燈火三更夢，千里音書一字貧，欲問梅花堪耐否，峻嶒鐵骨性難馴。

和泰州高壽徵湖餐韻

三載愁聽散浦潮，更堪雪虐與風饕，塵喧海市魚蝦雜，夢落蕪城草木驕，笑視沐猴冠不正，自慚老馬乘難超，畏人知我棲孤島，敢謂吟詩志趣高。

井肩詩派衍韓潮，曾諳吟篇賦老饕。（高辛仲井肩居詩，與顏仁卿賦老饕行）風雅又親玄霧隱，塞垣猶記玉駝驕，（乃兄高潤生，同官塞垣，善馳馬）小山何允經年別，（其弟祁民，曾遇於濟南）宿草元方出世超，（潤生兄，已久作古人）不意有緣聆白雪，三峯遙企草堂高。（君家有三峯草堂）

寄卞狷叟泰州

避地仙源已下屆，海陵客是武陵漁，焉知晉魏之間世，不讀周秦以後書，夾岸桃花三月鵝（泰州有桃花鵝）千條柳葉一溪魚。春來白社聯觴詠，逕欲拏舟過草廬。

季易內弟自重慶歸

六年闊別經離亂，萬里迢遙夢寐間，滄海浮家猶苟活，青春作伴幸生還，兵戈未解憂時事，老病相憐改舊顏，正是瀟瀟寒雨夜，聊堪翦燭話巴山。

春愁

十日陰無一日晴，春愁黯黯逐潮生，巴山西顧誰堪話，潭水東流不解情，三月鶯花如夢寐，六朝烟柳幾清明，鴉啼只管催歸急，江上何人送客行。

挽許畫隱

邂逅雙池避亂離，大年應信享期頤。曾呼小字酬佳句，更集同人寄壽詩。聞說維摩因衆病，遙憐白傅繫余思；海濱忽報東坡耗，卷是訛言或可疑。生離卅載已淒然，死別吞聲更可憐。此日早知歸鶴馭，前年悔不泊漁船。屢期後約重相見，詎料今生已絕緣。白首弟兄彫喪盡，蒼涼何忍讀遺篇。

次韻答高壽徵見贈長歌

弱冠吳淩初應試，如牽經師游鴻都。壯歲宣皖識高叟，（子陽）三峯知有草堂居。忝附同舟過淮泗，都梁石梁通一湖，（丙午子陽司樞盱眙，余亦赴天長任）滄桑俄變歎星散，羸馬我出居庸驅。君家伯也如舊識，旋乘薄笨追前車。山城斗大先後至，天寒地凍冰堅鬚，（潤生兄同官察區，先後署興和）繼游陔下遇季子，握手一別今何如，（祁民晤於濟南）明湖聞有君題壁，失之交臂思林逋。詩箋述自猶更獨，吟社兼有愚公愚，天緣假我讀傑作，聲鑿金石辭瓊瑤。陽春白雪乃屬和，欲親道義何敢疏，君如鸞鳳喚天表，我慚燕雀啾林於，郢曲俚歌雖有異，氣求聲應無齟齬。莊惠相知稍恨晚，顏標錯認心尤粗，辱荷匠門施斧藻，高誼直可薄太虛，（前詩誤以祁民爲阿姪，幸改正。）斯文商榷今已渺，直道幸遇古之徒，聞奇逕欲賦酒住，豺狼無奈塞道途，元白詩筒舊有例，常通魚雁眞良圖，何家大小山尺咫，北門回憶扁舟孤，（戊寅春正赴滬，道過泰州北門，旅宿一夕。）巴山話雨會有日，狂歌把盞撫澁蘆。

清明

漫唱歸來動客情，青青柳色又清明，劇憐杜老無家別，不見龐公上冢行。
望眼欲穿遼鶴表，斷腸最苦蜀鴉聲，杏花幾度經風雨，村酒何人酌一觥。

挽吳董卿

憔悴江郎筆，淒涼李白樽，浮生直若夢，死別更銷魂，舊雨凋零盡，遺詩篋衍存，斯人今已矣，千古惜梅村。

得校孫嶺南中學書

嶺南遙隔萬重山，負笈三年久未還，一字平安欣告慰，文辭已改舊癡頑。

壽葆之親家七十

斗宿星輝朗，天都地脈長，通人出徵歎，游轡到淮揚，鴻博祁門馬，儒林越國汪，興家洵有自，遷地亦爲良，况是名賢後，由來孝行彰，詞宗稱玉井，廉吏隱鹽場，平仲楹書在，西華葛帳涼，標鄰遵孟訓，述德表瀟岡，崑巒翹麟角，駿駭邁驪驪，顯親修期望，經世以文章，先德傳三絕，英年傳一覺，咸期成國器，不獨嗣書香，蛾術時逾勉，鷄鳴夜未央，儲胸廿四史，妙手十三行，已夢花生筆，甯能錐處囊，秋風雖踏履，雲路待翱翔，鶉薦爭誇禍，鷹揚或企姜，定看呈杞梓，豈處老菘蔕，抗志期千

載，黃聲達四方，平津初開館，渤海遠乘航，登眺燕山紫，遨遊薊樹蒼，分筵陳酒醴，同調協笙簧，
記室聲華貴，軍書倅億忙，元僚齊入洛，府主又歸梁，人鮮送臨賀，君猶客孟嘗，周南不留滯，汜上
且徜徉，漁唱連樵唱，漚涼貫濁漳，琴歌互酬答，泉石匪膏肓，天意方興漢，民心願附唐，將思頗與
牧，謀賴杜兼房，禪讓開新運，共和慰衆望，蕭朱緩若若，燕許筆煌煌，敏速推枚乘，才華重孔璋，
不言溫室樹，無忝臧書郎，東觀奇文見，西山爽氣將，青雲非所羨，素志詎能償，樊噲原羞伍，留侯
卽浪蕩，兒曹識司馬，絕學守公羊，磊磊棋收子，英英劍斂鋒，清風仰夷惠，高臥託羲皇，歸矣靈先
殿，愴然履道坊，藝林皆仰望，野史必求詳，長者停車轍，諸生獻酒漿，河汾宏教育，桃李溢門牆，
汲古富搜討，餘情歌慨慷，詩樓俯雲海，經宗繞雷塘，考獻年編譜，探奇月裹糧，千篇煥琬瑛，萬本
寫綵繡，人傑良何信，華宗禮戰慶，魚魚仍雅雅，濟濟復踰踰，廡阜高僧遠，東京黨綱滂，碑銘尋有
道，傳誌補襄陽，清學開全局，破齋攬大綱，前規許唐鏡，鴻著賴劬勤，儒術心從孔，詩壇願解匡，
珠擎皆的皪，金奏必鏗鏘，風誼三生友，雕鐫獨誦堂，名山真事業，古消熱心腸，眼底烟雲幻，胸中
得失忘，樂天尊教主，摩詰禮空王，蠶粥仍如范，樛香頓悟黃，梵經勤誦誦，蔬食勝管梁，陶翟賢借
隱，劉樊壽益益，榮雖輕敵佩，情更篤糟糠，禮教循高密，清齋守太常，歲時蘋藻薦，昕夕米鹽量，
酬倡鷓波趙，諧和琴隱湯，主持申饋吉，風雅德門張，吟詠謝庭絮，斑爛萊子羹，小同堪紹述，宗憲
况軒昂，菽水供常潔，門閭卜澆昌，清泉流不竭，通德蔭餘芳，三世乘家範，諸孫進黨庠，拈毫文郁
郁，繞膝讀琅琅，四美春韶秀，雙修福頤頤，鳩扶仙玉局，擊壽佛金剛，君健眼如月，吾衰髮早霜，
少年共游釣，塵夢記微茫，白塔三層上，紅橋一葦杭，崑岡飲泉水，蒙谷聽風篁，春韭秋菘社，衣香
髮影廊，同舟逢季郭，（季瘦生、郭楚生）買醉約方（地山澤山）誠（少蕪），花嶼佳辰賞，茶甌舊學商

分襟憐遠役，策杖踏邊荒，羌笛吟三弄，金盞酌一觴，攜家依北斗，得埽垣東牀，盟已鷗僧驚，鷺會鳳引凰，朱陳聊戚里，韋杜過山莊，彈指流光速，驚心沸海狂，山川仍故土，風雨各他鄉，存問遙來鶴，號寒暮咽螿，浮生一海粟，塵劫幾滄桑，有約鄰朱草，思歸繫綠楊，何人運籌策，迅與掃機槍，同賞二分月，言旋萬里橋，主盟屬林蕙，喫飲話漁洋，哪菊綿千算，綬桃燦九光，團圓秋月滿，嬰鐸老人強，洛下英延集，瓠南嘯隱祥，公歡同母悅，酌兕頌無疆。

張子猛持李北海書葉有道碑索題留觀累日寫此歸之

歐公云曷書，初不若好此，好之在最後，妙以結交比，久則交道全，慎交惟在始，我學北海書，早歲卽心企，嶽麓與雲靡，昕夕臨百紙，忽忽數十年，恍惚夢寐裏，亡書憶良朋，雲烟隨逝水，今讀有道碑，平生未曾視，乍見不相識，繼知北海李，久別如故人，重逢輒色喜，天假我豐緣，坐臥日對几，心慕而手追，神非貌尚似，臨罷題數言，卽以歸張子。

春間聞韓止叟捐館之耗近知猶在人間戲作一律

春寒一陣雨銳風，聞道鄉邦哭魏公，坡老訛言傳海外，戲遠依舊在吳中，原知浩劫人難免，欲返神山路不通，要看中原恢復日，無煩家祭告而翁。

趙甌北有吸烟詩語近佛體余亦有此癖將戒除戲作二律

烟草何年覺朔南，荷包筠管味醺醺，乞鄴曾誦劉文定，常州劉文定公綸家貧以竹編袋乞烟草於鄰鄙人

謂之曰烟草消食勿多食也。走水堪嗤紀曉嵐（紀文達公時，入直，以烟袋插入靴筒中，奏對久，火熾，痛甚，不覺流涕，上詢之，奏曰，靴筒中走水，急揮之出。）不覺氣消胸亦悶。偶然火向口中含，茶餘無事閒能遣，嘗好雖殊助客談。

淡芭品貴舶來遲，搜及杭潮貨益奇，何食可消絳絕粒，有鈞可釣又無詩，人閒烟火愁將斷，室內芝蘭久不知，免得墨悲絲染黑，勸他莫再惹相思。

祥兒由滇入蜀有書報告同時奎兒亦由渝寄資回

滇南久客又巴西，萬里雲山信馬蹄，險阻已通新棧道，亂離暫住舊花溪，親朋應有情堪話，昆季遙知手共攜，慰我老懷奉甘旨，同時寄到百朱提。

小疾

輕寒輕暖麥秋天，人著單衫我著綿，年老半癡還半睡，日長三起又三眠，陳榻遮眼看如霧，舊友傷懷半化烟，只學放翁聊作達，詩吟小疾壓災年。

酬高壽徵祁民昆仲寄贈漢熹平殘甄北魏景明釋迦造象拓本

家有三峯舊草堂，漢甄魏象悉搜藏，弟兄好似珠湖阮，（阮文達公，與弟梅叔，晚年同居珠湖草堂）考證精於蒲褐王，（王述庵著金石萃編）集古歐陽動手錄，同龔彌勒奉心香，（余有景明四年彌勒佛銅造象一區。）老年眼福真非淺，拱璧常增斗室光。

逋齋詠事詩四首

大吠何知主易衣，驚疑服色似而非，坵園誰補天吳錦，破石難支織女機，左衽孔與徵管歎，敝裘蘇自說秦歸，大東杼軸其空矣，鶴結堪憐付一袂。(衣)

敢云辟穀學神仙，忍飯從來不受憐，游子未歸艱負米，良朋有約避登筵，蠶書難易三升酒，買餅真須萬貫錢，(元耶律楚材云，金初行交鈔，與錢通行，至以萬貫，惟易一餅)堪笑人疑非火食，謂余柱腹有詩篇，(食)(陸詩傑作人疑非火食)

陸居無屋坐無氈，避地權牽岸上船，自願立錐徒四壁，堪憐賃廡已三年，歸田陶令將荒徑，醉酒劉伶且幕天，參透佛心無所住，在家惟學出家禪。(住)

鐵鞋踏破萬重山，老去盤旋斗室間，燈壁地方將斷聘，茫茫天步亦維艱，人言口說公無渡，鷄唱難隨客過關，何日芟除荆棘盡，逍遙自在鶴同還。(行)

寒松盒偶成效吳體

老來盤伏寒松盒，敢將長壽期彭聃，管甯何因遜海上，庾信那忍哀江南，不如意事常八九，有素心人惟二三，文字禪參小自在，瓣香日奉一詩龕。

挽趙心培

我昔客齊東，知君早歸里，迨我倦游還，晤君粉鄉裏，雅言詩禮書，達尊爵德齒，淡泊而寡營，心企

葛天民，乾坤一草亭，清談接若几，優游自在行，悠然安素履，年老猶工書，宗法繼承旨，能詩不荀作，聯句亦心喜，與人無所爭，淡交全終始，中原忽多故，社散風雲起，君家山之阿，我避江之渙，起居間鄉人，夢寐思君子，君年政八十，茹芝壽園綺，有子能讀書，家聲班繼美，客歲舉一孫，含飴歌樂只，聞之方可慰，曾寫詩一紙，大年卜期頤，道德鮮與比，昨得故人書，已報靈光圯，將披哭景純，展緘不忍視，老成蓮湖謝，感奮悲逝水，繼思達蒼言，人生如寄耳，况是今何時，魯難尙未已，君爲逍遙游，何管非福社，魂兮倘歸來，則言當唯唯。

夜雨

水底龍吟氣若秋，橫吹玉笛臥滄洲，孤舟一夜灑灑雨，捲起江潮打石頭。

酬答游止堅題寒松覓句圖

天風咳唾珠璣落，陡入清涼辟暑氣，虎氣雖驕能幾日，得將健筆掃殘雲。
徂徠山下偶經過，早聽山東李白歌，尋到明湖題壁句，古來名士濟南多。
扁舟欲返又徘徊，閒却漁磯綠滿苔，回首海陵明月夜，便思載酒過江來。
白石青松志皎然，相期冰雪節同堅，除將衰朽輸閑適，出處依稀似樂天。

高吹萬贈詩文舊刊卽用其答朱遜叟韻報謝

秦火燬詩書，餘籙熾未已，夫若喪斯文，謂必無是理，公今老伏生，傳授經盈几，搜剔壁中藏，文字

存遺旨，連篇來貺予，欲救予心死，試問今何世，波譎又雲詭，鍵戶听夕讀，破涕而爲喜，文旣昌黎四，詩亦澆花似，名山富述作，湖海親杖履，八代已衰頹，一朝復振起，嵩叟久傾心，壺公遠翹趾，祇惜魯賢亡，何況桑海徙，感奮兼懷恩，悵悵空仰跋，猶幸公踴然，靈光屹立此，天意假公手，挽瀾狂庶止，望氣從東來，關尹迎老子，道德五千言，豈可等閒視，摩挲老眼開，竊喜獲福社，讚歎發巴音，操觚慚率爾。

風雨勘詩圖爲吹萬題

冰炮詩亡後，將爲吾道傷，已遭秦火厄，又植海波揚，大雅隨塵滅，雖懸弔國殤，誰聞絲竹響，能啓壁中藏。

獨有高夫子，書城擁大觀，世忘漢魏晉，詩備魯齊韓，三篋雖云失，一經猶未殘，刼餘重檢討，應着羽陵看。

未喪斯文盡，名山道在茲，鄭箋參已意，匡說解人願，錯綜諸家論，蒼茫萬古思，及今延一綫，風雅要扶持。

雨晦風瀟夜，披圖竊慕之，抱殘存國學，校正闕言危，汲古功爲大，掣經志不疲，慚予聞道晚，何足與言詩。

棧孫年二十檢付李北海碑並端硯一方以爲紀念勗之以詩

我昔年五十，初喜得此碑，今汝年二十，傳汝以保之，李崑廣陵人，博學富文辭，書乃六藝一，名猶

至今垂，况汝求實學，努力正及時，盼汝學早成，有守兼有爲，聲名傳四海，可與古人期，更有端石視，不磷亦不緇，長壽是金石，同我享期頤。

次韻答寒匏

百鍊新辭九轉丹，寫將哀樂入毫端，匏雖苦葉猶堪繁，菊有殘枝且耐寒，不役物將爲物役，欲安心卽便心安，此生何處非如寄，秋水南華仔細看。

吹萬枉顧並贈書帖詩文數種

海角同棲數載餘，神交幸獲近通書，論詩奚止避三舍，達古應知富五車，健筆已親君子範，高軒枉過野人廬，瓊瑤疊脫情何厚，衰懶彌慚體法疏。

許靜存七十晉五

聞樞道向靜中參，鶴健應知白髮參，八月將逢十有五，百齡初度四三分，懷鄉楊子江之北，同客春申浦以南，又見仙露添海屋，祝君長壽比籒聃。

俞濠叟歸自桂林

一局殘棋未解圍，忽逢遠客款柴扉，數年奔走心雖苦，萬里歸來貌尙肥，道已猶寵過者化，壽原似鶴健於飛，白頭江上重攜手，忍話滄桑是與非。

秋夜病後作

蠶吐絲將盡，魚濡沫漸枯，腰難折五柳，容已悴三閭，巴蜀兩游子，江湖一病夫，倘沾甘露潤，磨體可能蘇。

酬答朱幹臣見和詠事詩

哀賦江南庾子山，憫身世老兵間，月明空照揚州夢，天步知逾蜀道艱，亭可曝書君且住，門雖近市我常關，不貪客過貪詩至，倘便吟筒願往還。

高郵王蘊之枉和次韻答之

王郎拔劍氣如山，慷慨悲歌蒼莽間，月不常圓雖已闕，天猶可補亦非艱，射三千弩鏡塘水，封一丸泥函谷關，會見風波平壘社，珠光夜照釣舟還。

贈侯病驥年政七十

雪深邊塞相逢日，月冷澄江共話時，桑海屢經新變態，菱湖猶有舊題詩，紀游後客成年譜，絕學亭林錄日知，俯仰何須問塵劫，幸存吾道要維持。

賦贈田魯漁

舊友相違久，浮生感劫餘，昨聞濠上叟，訪到武陵漁，剝復應知數，安閒且寄廬，年未慚老病，風雨閉門居。

廣東金子才七十徵詩作此爲壽

三十年前宰霍邱，隄厓閒說薦名流，早知裴度會青眼，晚遇金農已白頭，蕭瑟江關過題句，後先皖水

忝同舟，乾坤俯仰蒼茫裏，垂老何期聚一涯。

神仙遊戲在塵寰，疑是壺公隱市間，同學少年商賈意（早年與商芸亭藻亭兩太史同學）大名詩老屈翁山，桃源避地停漁棹，花月延秋照酒顏，風義平生師友重，琴音三疊海雲間，（君爲徐花農門下士，徐又爲曲園弟子，曲園贈君詩，有典麗文章邢子才句，是爲再傳，後有唱和，題曰琴音三疊）。

海外

海外徒聞大九州，縱橫風雨捲狂流，藥無可覓不離手，山已難開甯觸頭，蒼莽看雲迷幻景，低昂隨浪挽孤舟，秋潮又長高三尺，霜雁何依繞市樓。

逋齋閒詠

開卷如游盛世，寄廬即是仙源，起居出作入息，服食布衣菜菔，得失忘懷粟里，彭殤齊物漆園。

吟詩聊代琴操，飲水可當酒尊，偶來新雨舊雨，與論今文古文，我醉欲眠藜榻，客去便掩柴門。

吹萬招飲座有夏劍丞金鏡生孫滄叟王蓮生俞濠叟卽席口占

秋高風日自清嘉，好客江村興不賒，正遇故人來遠道，（濠叟自蜀歸，）却將美酒酌流霞，康強難得香英會，觴詠偏宜處士家，今日盍簪須記取，晚香雖淡有黃花。

次韻答翁銅士

園荒三載未曾窺，又轉秋深起夕騷，結習未除詞客老，晨星漸少酒人悲，江南昔有庾開府，海上今無鍾子期，天地蒼茫同一歎，舊游如夢豈堪思。

俞濠叟移居敝廬

羈旅頻年類梗蓬，一漚重聚海之東，貧春我亦如梁氏，避舍今當奉蓋公，歲迫嚴冬親愛日，春生陋室挹和風，素心共樂忘塵世，昕夕談詩笑兩翁。

盼梅棧兩孫音訊不至

荏苒光陰迫暮年，又傳烽火海南天，一廬風雪蒙頭臥，萬里音書望眼穿，偶有親朋來慰問，總期骨肉保安全，未知旅雁依何處，夜卜鰲花盼早旋。

休甯戴松門彝畫水繪園圖爲許畫隱所藏五十餘年來青世兄索題

百代興忘感逝波，騷壇韻事又如何？巢民以往風流歇，觴詠誰能繼永和。
雉臬原屬古維揚，水繪紅橋兩勝場，一自冶春詞社散，何堪載酒話漁洋。

生日述懷

登樓何忍望江南，七十年來已過三，世亂多愁身又病，家貧有女職兼男。
親朋誼重危時見，孫子音疏遠處探，耐得歲寒冰雪苦，梅花清瘦伴詩翁。

祝東坡生日

江水發源入海東，坡公到處生春風，北游蓬萊南儋耳，命雖磨蝎途非窮，當時變法國漸敞，猶勝南渡
驚邊烽，而今九州正頽洞，何從萬壑聽笙鏞，不辨北海與南海，蝸爭兩角誰雌雄，中原青山餘一髮，
公其有靈能無恫，我後千載生同月，衰朽何敢希前蹤，念公遺澤被邗上，隸屬舊部叨旂幟，谷林堂前
思載酒，蕤城奈已荆榛叢，艤舟曾隣顧塘側，藤花老屋憐皆空，餘生寄游臥海上，低昂風浪支孤蓬，
讀公遺集拜公象，心香一瓣遙相通，斯文浩氣亘宇宙，彌補造化筆有功，冀使天驕識麟鳳，狂瀾默挽
寰瀛中，寒齋爲公作生日，故事例仿夏溪翁，梅花春醞進一盞，筭展髣髴來從容，南飛鶴奏公喜聽，
江上峯青一曲終。

謝吹萬贈朱竹垞畫軸

既遇高江村，又識孫退谷，高詩清而奇，聞韶忘食肉，孫書懿且古，商聲聳牙讀，文字有因緣，琳瑯塞破屋，報謝方未遑，又脫畫一軸，竄已高寒天，筆亦勝珠玉，畫者是爲誰，秀水老尊宿，或云竹垞翁，詩文書耳熟，丹青則罕覩，將疑混魚目，余獨謂不然，姑且聽余告，不見玉局仙，信手灑風竹，婁東老詩家，繪事亦稱獨，雖不以畫名，畫爲世欽服，愛畫入骨髓，翁曾書讀牘，（竹垞書檣帖有愛畫入骨髓吐辭含風韻句）愛畫即能畫，金石氣含蓄，文人無不可，偶然畫非俗，孫公精鑒藏，高叟已洞燭，今以移贈余，余願亦頗足，（來函云滄叟所贈，卽以轉贈之）愛護防空廚，失喜不還積，大雪積庭除，灑掃身兼僕，清供蕪蠶熏，展對博眼隔，陸覺室生春，古香散馥郁，窈人忽恭富，炫耀驚鄰曲，寫此一段緣，可補畫苑錄，馳箋報兩公，兩公應捧腹。

自述二百韻

西漢鴻儒起，江都世澤延，華宗雖已遠，述德必禪先，譜牒經道佚，滄桑屢變遷，寒門爲小吏，下溷有蕪田，命義曾災發，安貧不愛錢，高曾傳厥後，鄉里漢其賢，祖考承家範，良醫結習緣，杏紅林麓滿，橋綠井泉涓，鷗社依湖曲，狼星犯斗巔，親知來避難，鄉僻特安便，鳩集盈隱舍，鴻飢餓粥饘，疾皆施藥愈，資不惜金捐，米賊滑郊野，壺公入市廛，歧黃逢再世，園綺望如仙，游釣二分月，琴樽九老筵，一株松矗聳，四世隱綿綿，德已箕裘衍，名將志乘傳，父兮懷遠志，家亦倚中堅，芸案羞埋首，鹽車恥執鞭，乘舟逐北浪，著屐嶺南巔，歸奉兩陵養，歡同棣萼聯，三餘劬勗後，尺木盼趨前，

臣叔非癡也，餽生更勉旃，偕游竹林契，接武藻芹峯，弱冠聲蜚早，秋風詔銀顛，屢經趨鸚鵡，甯肯屈龍墀，作賦摩空日，明經入貢年，茂才虛廩餼，少子博親憐，跋涉游京國，賢良策廣川，揮毫三殿迴，頒詔五花妍，偶儻師門譽，崇高祖德全，重開開壽域，二老侍嘉筵，欲翼門闔犬，還將經術研，咸期成遠到，且作小盤旋，拜孔游南學，依劉客北燕，書傳黃耳犬，轅伏黑唇犍，文字慚無補，農商遇偶然，維新棋變局，出仕卜占筮，滂霍羈卑宦，風塵困破轎，頭銜膺七品，手版聳雙肩，未作文園令，初司武庫權，潘輿迎伯養，毛檄慰情牽，軍府書飛羽，潢池禍肇拳，兵聞犯宮闕，星痛隕庚寅，怙恃恩兼失，呼號涕已漣，奪情千古恨，啓事百叢愆，旁午軍符急，酸辛墨經纏，假歸安窻窻，嚴解靖戈鋌，漢上徵賓布，湖濱棹越蓮，誘兒親筆墨，開局理丹鉛，（創辦正誼書局）有約鄰呼飲，餘閒夜擊篋，服經三載滿，職攝一城專，百里家鄰近，千秋地處偏，（天長舊稱千秋）短才思展驥，小邑若烹鮮，捐俸建圍園，占豐盈陌阡，訟庭清案牘，鄉校起歌弦，桑擬張堪植，魚如羊續懸，救災周故里，（江淮水災，捐助二千金）干祿負重泉，時及瓜將代，園荒草已芊，首塗謁邱墓，手澤撫杯棬，厭聽輦門鼓，旋傷錦瑟絃，風吹釵忽折，月缺鏡難圓，雛鶴憐誰哺，鯨魚憤不眠，續贊調玉柱，瑱鶴迓雲軒，時務才需亟，新猷任敢顯，治安罪警政，令甲輯陳編，苗待除積莠，耜切圃杞楹，蓼城資理劇，（署霍邱縣）淮水又尋沿，風俗成刁悍，方隅互蜿蜒，安民當去蠹，防稼務除蠶，仁欲調馴雉，奸惟擊惡鴿，清談非學衍，（王衍爲元城令，清談而已）強項夙宗宣，下下陽城考，荒荒出塞篇，雪窻昭日月，感德重坤乾，復職重申令，籌防暫備員，再生思救蠖，三世誼聯蟬，（庚戌被議，奉溥師玉岑，在察防案內，奏准開復原官，並留差遣，後以其文孫恆同，來受業）鼎革更新始，師干避位選，器皆移葦簞，冠已裂紘綬，倦宦回孤棹，漁郎扣兩舷，家山歌入破，市政驩聞讓，周室傷禾黍，殿

人託蕙荃，囊空羞阮籍，棧泛值張騫，鹽鐵綱提要，關山月照娟，後先馮婦至，得失塞翁詞，開府雌三術，巖豎廣八埏，遼金元重視，燕趙晉毗連，軍政兼民政，憲邊貴撫邊，人才何落落，記室忝翩翩，馬老途還識，狼貪習必悛，牧羣看蝥蝨，芻論獻箋箋，地缺黃金粟，山藏白玉瑋，屯應效充國，採可及于閔，斥埃靡雖淨，寒灰火或燂，虜情防突厥，羌服化先零，王幕晨飛檄，穹廡夜臥甍，材資文武重，吏令漢蒙鎗，條列官箴肅，書成擊政鐫，遺荒經策畫，椎魯費陶甄，暇日聯屬詠，蒙園葺構榭，門迎川岫嘔，篋引水洞漩，榆柳排牆列，芙蓉出沼嫵，青猿來導引，白鶴舞蹁躚，琴軫停雲撫，書帷待月窈，盞簪今雨集，列炬徹宵焗，雅集無賓主，狂談及獵畋，吟皆工競病，咬不厭脾膾，野菓珍逾玉，深魚膾似鱸，杯擎桑落酒，飯熟保安袖，風雅開荒陋，歡娛釋痛痲，紀聞編瑣瑣，圖畫貌仙仙，（著蒙園紀聞，方子洛畫蒙園雅集圖）冰雪堅瓠磔，風沙刮面扇，欲依三世佛，忽遇九方歎，出宰鳴琴治，登場舞袖揜，平反心折服，元惡首誅駢，地廣時防寇，民艱力拯瑣，意雖求治譜，手奈督空券，已決辭銅綬，言旋坐竹篔，未除渡河虎，又駕出關騶（署興和縣辭職，調寶昌鑿務設治局）政簡專屯壑，氓愚忍削股，蕃兒馳獵騎，胡婦飯耕犍，梵唄朝參佛，村儂歲祀祔（胡神）田無分畎畝，產尙備性怪，游牧常移幕，儒賊不築廨，鳳圍煮羊酪，馬矢當龍涎，山瘠生著草，霜風殺麥稭，戶稀冬卽瑾，徇小夜無鍵，雪皓寒拳足，塵縑瘦露額，恆飢腸百轉，雞錄手重胼，（輯寶昌雜錄）吏隲身容臥，官閒連忘返，草枯羊醫柵，穀匿鼠翻篙，野犬狂吠吠，秋鷹恣攫捩，素懷人不諒，青眼孰相誕，書帛傳蒼雁，垂鞭羸白驂，生還班定遠，羣鑿馬文淵，卜宅西華近，臨流北海澗，孫枝看鳳舞，子舍共蝸蟻，廢市閒情道，溫泉俗垢前，知交集鷓鴣，憐惜比夔竑，話舊烹新茗，招涼就古榻，形皆忘放浪，性不受拘羣，風月閒燕市，關河入楚天，航程千百轉，塵轍再三遍，有盡空傾蠟，無珠可獲蟻，龍

山峯兀兀，蚌浦水潺潺，毫絹寒衾擁，（亳州產絹）祁茶石銚煎，道宗周李耳，祠拜漢梅鉞，（祁門
倒湖，有梅鉞祠，）淮上題襟集，潯陽賦酒船，朔南隨轂軸，上下類鞦韆，皖國游將遍，齊邦俗尙儼
，竿遺吹一一，花已笑嚼嚼，湖滌撐瓜艇，亭陰聳蕙榜，省香泉水潔，柘舞晚風翻，鶯轉喉圓滑，鴉
聲響美鬢，箏鳴金粟柱，東擁寶花鈿，玉饌薄兼筍，晶盤鯉勝鱸，調和鹽味淡，往復馬蹄蹟，東道辭
河獄，南都卜澗瀝，郎曹潛粉署，旅舍對松楸，鮭菜安吾素，鶯花解客悵，偶吟詩百一，空寫牘三千
，祇惜牛同驥，何甘玉混硫，莼鱸縈夢熟，琴鶴載舟扁，歸只餘三箇，居猶賃一椽，院幽花作障，屋
小竹爲枿，靜室生虛白，聞亭草太玄，羊亡空挾策，魚得亦忘筌，人索鍾王字，家藏漢魏甄，臨池揮
楮墨，著古佩珉璫，詩事搜遺稿，叢談啓祕詮，訪求汗墓碣，憑弔史祠墀，開邇來三益，投壺算一純
，囊儲詩句滿，襟瀆酒痕蕭，畫舫搖波瘦，吟筇倚石磨，已堪閒歲月，詎意起烽烟，側聽邊笳急，頻
驚戰鼓驚，蕪城危若卵，胡虜猛於獫，何處雙鳧著，看人萬螻蟻，攜家之海市，避亂宿湖嶼，爭逐中
原鹿，淒涼蜀國鵑，秦當亡自楚，段可克于鄩，家國難忘念，餐飧不下咽，草堂雖可住，覆榻亦將穿
，賣藥述名久，扁門養病痊，枕椰飢食麵，吉貝冷裝棉，甯願爲甌勝，終羞效鄭虔，故人滿京洛，游
子客巴滇，佛未成靈運，仙應學偃佺，嗔懷鷗鷺友，結契畫詩禪，時局如觀弈，天機默運璇，撥棹期
盪掃，滯壑免同填，骨肉重完聚，山河復幅員，還鄉騎有鶴，告廟獻言駢，柯爛逢王質，林深訪善卷
，松凌寒愈勁，梅耐老而嬋，經筵謀貽燕，書堂吉應鱣，騰鶩起誘鳳，飛躍樂魚薦，蕉夢其醒矣，著
龜可決焉，贊非如太史，述竊比彭篋，結習除難盡，長言拙不諶，詩成堪一哂，俯仰雪垂鬢。

寒松盦詩草卷二

江都董玉書逸滄著

壬午春正五日和濠叟用陶詩游斜川韻

密居三四載，萬事心已休。詩鄰近咫尺，晨夕與之游。臘盡春倏至，歲月如川流。仰視媿健鶴，俯觀慚閒鷗。有時招我飲，欣然醉糟邱。入座無雜賓，悉是園綺儔。屬詠止遺作，此唱輒彼酬。我豈不懷歸，能有此樂不，常對素心人，使我祛煩憂。聯吟得共適，千載非無求。

贈劉晦之

劉向傳經心事遠，（杜句）理財已匯衆流歸。五陵裘馬思年少，三月鶯花悵物非。停轍忽逢今過訪，登樓猶記昔相依。滄江一臥成疏懶，話到春明興欲飛。

臘雪凝寒爲近數年所未見春初尤甚

玉馬行空始著鞭，雪花隔歲結冰堅。老翁避地逢鷄日，（呂本中元日詩避地逢鷄日）寒欲呼天問鶴年。已願足無車代步，不繼手以袖籠拳。詩鄰唱和真堪樂，忍慄何辭夜禱肩。

寄懷冶春後社同人疊前韻

探春曾共拂吟鞭，馬上詩成百鍊堅，聯句每教思舊雨，索居不覺換新年，草亭若坐窗三面，山館苔封石一拳，脫有瑤章能寄我，奚囊莫惜壓頰肩。

得梅棧兩孫平安近訊

海雲黯淡路漫漫，日盼音書寄到難，幸得家僮傳竹報，孫男孫女總平安。

俞濠叟年八十吹萬年六十五與書同月生擬倩友畫歲寒酬唱圖用

蘇韻邀兩老同作

歲寒友，忘江湖，古人有偶今豈無，奇哉我儕生同月，六客得半蘇翁呼，同調不避嘔毒學，惟以酬唱常相娛，寄居海上風雨晦，一日不詩心鬱紆，梅花占首春滿廬，詩鄰近接道不孤，寒松中空翹榑櫟，修竹後勁異柳蒲，自笑三老非凡夫，觴詠不覺日易晡，壽蘇更當互爲壽，應倩羅聘補一圖，圖中之人樂有餘，誰夢誰覺誰遠邈，欲徵題詠追詩逋，並將笠屐留傳摹。

贈崑山姚威伯

江上峯青曲未終，又從洛社挹清風，高懷早已希前哲，痛飲何妨號醉翁，司李漁洋詩愛好，名山惜抱道非窮，憂時著述成孤憤，老子韓非傳本同。

夢游瘦西湖疊前韻

小金山，瘦西湖，故鄉風景他鄉無，畫船換作小游艇，隔溪招手遙相呼，癡憨漁婦雜漁孥，聞作戲語以爲娛，白塔紅橋望咫尺，搖搖轉喜波回紆，兩三茅屋誰家廬，林間隱隱炊烟孤，風流好事愛野鶩，得酒狂飲嚼筍蒲，頽然醉倒一老夫，也逐年少樂朝晡，山鐘欲沈歌聲起，冶春韻事續可圖，湖鄉夢醒感劫餘，知非不若伯玉遜，何時攜鶴歸林逋，夢中畫意重追摹。

和季易六十初度韻

六旬已是過來人，時事難言幻失真，著述等身滋萬里，轍環只不到西秦。
狂瀾誰挽障東之，付與青年理亂絲，君有五男皆蔚起，識時俊傑要因時。
訪到仙源避亂人，安貧陶翟樂天真，依依情話良堪慰，不羨新兼不劇秦。
姑妄言姑妄聽之，已知盤觸命如絲，再過六十年來看，應到唐虞極盛時。
吾經滄海示猶人，儼強還存面目真，寄與一貫差可慰，不曾暮楚又朝秦。
幾首詩成偶得之，眼花信手寫烏絲，塗鴉留得他年看，知是香山集會時。

疊韻酬陳含光枉和

養生妙喻牧羊鞭，悟澈南華信道堅，畫不嫌迂瀟祕關，詩能最淡義熙年，殘山一點青餘髮，兒柳重生綠尙拳，願向衆中聽說法，也將偏右袒僧肩。

和卞猷盒丈七十述懷詩茲錄其六

俯仰乾坤是腐儒，少陵不與俗同趨，晚年何意逢兵革，濁世真堪奉楛模，風雨晦冥千劫幻，江湖浩蕩一孤舟，採芝歌詠韓園綺，得隱商山願與俱。

神童名早譽終軍，篤性天成戀白雲，隨節湘閩開府遠，通經詩禮過庭聞，先賢貴至八州督，家法嚴於萬石君，玉步已更網紀弛，如今忠孝有誰云。

啓讀檄書爲報恩，貧郎偶屈亦何論，三冬用足東方朔，百里才非屈士元，文苑畫聲邀月旦，泮宮回首認潮痕，十三年再庶思樂，更慰雙親地下魂。

毀裂衣冠道已淪，涖溜小住且藏身，筆扛萬斛惟稱健，文富千言不算貧，女子驕狂名尙識，故人光武意偏親，從知市上雞韜晦，不若垂竿隱富春。

高樓已倦客中登，詩事常思續廣陵，多饋貧糧聞獲益，敢期紙貴價能增，一觀未報還書酒，五色難成雜組繒，欲買歸舟親問字，囊空喚渡奈無磨。

棋枰爭劫幾時休，白雪歌成且散愁，大作家推甌北趙，老名士讓梅厓尤，陸沈忍視惟莊遠，天夢將醒莫杞憂，善葆餘年常作樂，未妨買醉典貂裘。

許松樵憶廣陵雜游有詩屬和

夢裏湖鄉醉裏天，何堪重話太平年，鐘聲猶聽前朝寺，遙望雲山益黯然。
蕪城草長連天碧，梅嶺花飛滿地紅，十日無人言痛史，但聞啼鳥怨東風。

故人今已遲雲天，清嘯如聞蜀阜前，攜鶴來游會訪舊，相違愧作出山泉。
小坡佳句比陰何，尙憶平山昔日過，我亦離鄉三四載，竹西何忍聽哀歌。

酬答孫滄叟枉顧

君今稱滄叟，我昔號逸滄，同是滄海粟，君精我秕糠，又如滄浪水，我濁君清揚，文字與道德，何故論頡頏，晚遇滄江上，久客鬢眉蒼，早歲已心暮，一水遙相望，君秉寶山鐸，我仕古皖疆，君纘宦西蜀，我又游朔方，君歸狼山側，我滯淮水陽，南北各異轍，眞如參與商，何時獲邂逅，夙願志難償，不謂丁戊際，時局變滄桑，通揚繼淪陷，避地溟濱旁，若非遇高叟（吹萬），幾致失孫郎，清談接席次，傾倒喜欲狂，金石通神契，不辭詩字將，殷墟文古奧，唐律聲鏗鏘，酬倡迭往復，心寫而心藏，愧我病偃蹇，未登君子堂，昨乃勞枉顧，步履老益強，玄談勝揚子，捧觀如蒙莊，古蹟不可及，壽相眞無量，年長當兄事，心奉一瓣香，滄溟望寥廓，願隨鷗鷺翔，噲傲凌滄洲，羨君壽而康。

黃浦灘發現鯨魚一尾長若干丈遍體鱗傷已斃多日漁人見之持刀剖腹欲一嘗異味乃因腐臭棄去噫平日橫行海上亦一時之雄也

爰作鯨魚歌

天容海闢水族多，細則鯢鱗巨蛟鼉，各自得所以類聚，澤國便是安樂窩，胡爲長鯨妄自大，揚鬣鼓鬣掣風波，大魚小魚悉兼併，一口直欲吞江河，鯢化爲鰩忽上下，然犀一照皆么麼，南海北海幾由旬，

三年五年一剝那，龍伯癡聾任翻棹，鮫人暗泣空滂沱，橫行無忌干天譴，吞舟詎能漏網羅，一朝失水陷泥淖，孽皆自作匪由佗，漁翁乍視忽驚駭，繼復狂喜脫烟義，謂此鯨魚吾可膾，當寸寸斷刀盡磨，豈知剖腹已腥腐，儂骸暴日成爛柯，肉何足食棄灘側，途人見之掩鼻過，君不見祖龍遺尸鮑魚莫，那塢燃騰脂橫拖，王侯將相尚如此，何況彼族傷天和，排山倒海威安在，鯨兮鯨兮可奈何。

觀西人演傀儡戲

僂師巧製奉周王，今又翻新出鬼方，笑彼不知何面目，驕人那復有肝腸，居然木偶當場貴，偏附胡兒舞態狂，說破一錢真不值，游絲若斷便身僵，粉飾昇平局面新，喧闐歌舞鬧比鄰，象形半是人兼鬼，變態幾將假弄真，行動本來無我相，拘牽不放自由身，沐猴冠已聞兒戲，朽木都邀入幕賓。

嘲詩傭

先生胡爲苦兀兀，埋首沈吟戶不出，吟詩原以言性情，性情反爲詩汨沒，挽歌昨日慟西州，壽頌今朝祝南極，桃夭灼灼賦于歸，鳥鳴嚶嚶遷且吉，親友人情互往來，秀才半紙免不得，苦心嘔出錦上花，未必見者眞賞識，三分讀到七分圓，旁觀匿笑猶指摘，爲他人作嫁衣裳，眞是一文錢不值，寒既不可衣，飢又不可食，木如交視且擲筆，先生庶幾默爾息。

遣詩魔

營營癡絕一凍蠅，如顯如醉時膏醴，道高一尺魔十丈，相隨形影離何會，羈愁來投孤館客，苦吟入定枯木僧，覆置醬瓿揚子雲，走入醜龜王右丞，退避三舍猶迫促，幾同二豎潛侵陵，枯腸已爲索殆罄，筆秃亦且書難勝，詩耶魔耶真不解，卽詩卽麗偏相仍，四海逍遙正寥廓，何不飛化天池鷗，而乃昕夕不我舍，累我病困廢寢興，我將斬汝揮利劍，否則繫汝以長繩，我倦欲眠且速去，切莫再來干膺懲。

題西湖錢武肅王祠

一覽西湖別有天，猶聞父老道王賢，提戈迹比漢高奮，捍海功侔夏禹傳，版宇歸還州十四，江湖射發弩三千，宋家南渡徒興歎，不及山塘尙姓錢。

割據偏安罔克終，不如天下以爲公，民安耕鑿忘何有，國不兵戎卽大同，三世五王億孫子，九州四海一英雄，我來欲墮碑前淚，嶽嶽蘇文讀表忠。

疊蘇韻和孫滄叟

君不見寧社湖，珠輝照耀無夜無，淮南草木被光采，仙風咳唾通吸呼，陡然驚起漁家孛，欲捉明月騰歡娛，不知老蚌化滄叟，滄浪歌嘯波回紆，詩筒稠疊覓吾廬，雖棲孤島幸不孤，好句如穿珠九曲，招

涼不用風扇蒲，滄叟安樂是整夫，龍叟（吹萬）著述忘朝暉，涼觀老人腰脚健，紀游詩勝臥游圖，冬心同抱歲之餘，直截史魚賢哉選，我見三老不及道，強列四皓圖中寡。

題周湘亭撰董尚書傳後（董恂、字醞卿、甘泉召伯鎮人、官至

戶部尚書）

賦就吾族大司農，崛起孤寒百尺松，身列四朝稱計相，胸羅萬卷是儒宗，故鄉今日懷前哲，列國當年費折衝，青史不應遺列傳，濂溪筆法敘從容。

苦熱起用蘇句並步原韻

苦熱誠知處處皆，洗心願學老僧齋，驕陽鏗骨天何酷，炎海飛塵晝亦霾，安得清涼犀辟暑，便澆塊壘酒如淮，未容餘喘稍蘇息，戴粒艱於蟻上階。

賦贈田魯漁卽用其壽乃兄桂舫韻

浩劫皆由人自造，萬里塵霧將盡掃，天留耆耆待河清，重覩唐虞民皞皞，四海兄弟本一家，蠻觸胡爲苦爭後，吾儕皓首今幸存，莫笑冬烘之頭腦，太平生長老兵閒，（金子才句）此言誠妙堪絕倒，昔聞

鸞鳳噉高岡，繼窮驛驛開遠道，惠政河陽縣種花，佳吟康樂春生草，辭官早隱志田園，忍看鎮嶺移京鎬，紅羊一炬四方驚，烏鵲羣飛三匝繞，孤山處士不安棲，避地海濱作遺老，與君闊別廿餘年，失喜相逢客歲杪，回思皖水舊同舟，君稱報最我下者，遠游寒北望江南，惟羨湖鄉耕小卯，歸來曾頌南山篇，（君七十曾寄詩爲壽）猶恨離多歡聚少，而今同是武陵漁，鷗鷺忘機波渺渺，老人星椽照申江，大慶壽將躋惜抱，願傾海水酌巨觥，醉飲賓筵夜達曉，崢嶸凌雪歲寒姿，松柏長春各自保。

廬江劉述之枉顧爲近編叢書目錄詢及拙著以詩報謝

執別邪江卅五年，淞濱車遇亦欣然，校書知早儒天祿，覆瓿何堪問太玄，頭白彌欽風誼重，汗青將使獻文傳，遺山野史編成帙，應夢衣冠拜榻前。

補題北湖春泛圖

一葉扁舟避世翁，幾番飽受雨和風，炊無宿米憐漁婦，醉覓村沽問牧童，歲月易遷忘甲子，江湖多險任西東，何人指我仙源路，夢醒方知亡是公。

挽陳賜卿

記會白首隱衡門，劫後相親老弟昆，亂世文章猶守法，早年輩行獨稱尊，僅存舊學商量友，不盡家山

涕淚痕，三載賸遠成永訣，大招何處返騷魂。

聞鴈

側耳聞征鴈，頻勞繫帛飛，不辭霜月冷，爲覓稻梁肥，巴蜀無消息，江湖有是非，應憐海上客，莫忘帶書歸。

寄季易桂林

征鴈南飛遠繫思，音書傳到不嫌遲，已知索米疲奔走，莫爲登樓感亂離，久客無家猶復聚，壯游有子各分馳，天涯風雨還存問，且幸平安但忍飢。

清涼山憶寒匏

清涼山色貯詩囊，（來詩有清涼山色迎人好句）掃葉樓頭換景光，是處蒼茫風雜雨，當年歡聚詠兼觴，人如黃菊三秋瘦，夢繞青溪九曲長，猶憶六朝僧尚在，偶逢話舊倚斜陽。

再題葩廬風雨勘詩圖用蘇韻

襟三江、帶五湖，峯仰勝概天下無，閒氣偏鍾書騷子，海內知名爭相呼，梅花爲妾鶴爲孀，常隨讀書與歡娛，家有藏書卅萬卷，鄭堂帶草青縈紆，乃顏所居曰葩廬，稽古何處吾道孤，湖海詩文足千古，

過於山房榻東蒲，自號識字耕田夫，晨鈔往往日至晡，風濤雨晦鏗不舍，詩中品物考且圖，我曾困學勉三餘，未能栩栩兼選選，過而輒忘追已遠，縱見此本難爲摹。

天寒

地凍天寒江水枯，騰騰米價貴於珠，門前積雪盈三尺，不獨袁安一臥夫。

癸未元旦立春

見說承平百歲人，歲朝幾得遇新春，蒼生渴望消兵氣，青帝先聲懾敵神，天似轉機開案籥，佛原平等視冤親，從知四海皆同宇，苦樂須期一體均。

花朝有感

錦城二月海棠嬌，一半春留一半消，柳外儘調鶯舌巧，花前猶駟馬蹄驕，有情潭水深千尺，無限江聲送六朝，三益時勞開徑望，又因風雨阻迢遙。

逋齋雜詠

幾度清明客未歸，思歸又感故人稀，雨絲烟柳蕪城路，春夢隨風化蝶飛。

自笑

流離骨肉尚天涯，自笑龍鍾獨詠詩，悔昔有錢廉不愛，憐今無米巧難炊，空山能忍夷齊餓，亂世非無管飽知，分贈酒資供一醉，澗明且幸遇延之。

上巳用盧雅雨虹橋修禊韻

春寒細雨灑江舟，何處欄柑聽栗留，曲水流觴懷晉代，淞波快剪試并州，鶯花漸共詩人老，屢市難將酒價酬，亦有虹橋名勝地，風光不似竹西頭。（滬西有虹橋）

暇飲難追極盛年，漫談王後與盧前，花如成海酣春夢，筆欲凌風聳塔顛，竹葉青斟缸面酒，楊枝綠拂檣頭船，座中客怕催詩急，山寺鐘聲一杵圓。

桃花漲暖妨能通，底事滯蹤滯海東，故友凋零聞舊社，天公狡獪弄春風，漁樵唱答夷歌起，山水模糊野霧濛，客裏又逢三月暮，閒愁無限入詩中。

參軍疊語未分明，但聽鈎勒格磔聲，觴詠也知將為贈，祓除可得比蘭清，搖搖風柳迎江岸，簇簇烟花滿石城，遐企永和人物盛，不知桑海幾番更。

和葆之病後韻

我亦貧兼病，人皆醉若狂，縱完歸趙璧，幾絕在陳糧，老覺餘生賚，恩難一飯忘，佇看雲海氣，可早化和祥。

寄懷冶春後社諸子

草亭一角俯東皋，三五詩人興致豪，劫後湖山供倦眼，老來文筆湧秋濤，鐘聲近晚催佳句，酒價增高典敝袍，幸有冶春遺韻在，重開吟社續風騷。

讀史

讀史何能盡信書，武成策可概其餘，盾矛兵尙趨之戰，草芥民皆視不如，幻出樓臺噓以氣，爭持龜蚌利於漁，古今一例華胥夢，起問東方白也無。

一笑

一笑老翁無所求，已將往事付悠悠，未能辟穀常炊餅，不爲看山更上樓，煩惱欲除無我相，蒼茫獨立與誰儔，潮頭日日愁增長，風雨扁舟幾度秋。

重陽和葆之韻

北海曾題九日箋，眼前今剩幾詩豪，無人送酒來陶徑，有菊餐英讀楚騷，已近耄期猶自在，不知塵世爲誰勞，年年孤負簪萸約，獨倚重樓百尺高。

虛生

七十虛生又五年，山樗差幸得天全，亡書惜已空三篋，下箸嗟難食萬錢，道義論交今日少，詩文結習幾人傳，老來只有安心法，晚起何妨更早眠。

壽田魯漁八十

環列東西兩大州，無端風雨捲狂流，蓬萊已淺經三度，萍梗相逢聚一漚，飯顆山頭工部笠，桃花源裏武陵舟，請君莫問今何世，但看烟雲海市樓。

淮揚咫尺近鄉關，皖國同舟不等閒，文武衣冠天寶世，縱橫詩酒盛唐山，治絲經術心如水，道濟時艱鬢已斑，驚鈍何堪追驥足，舊游回首亦慚顏。

一枕邯鄲夢醒空，菱湖烟雨渺茫中，投荒我踏榆關雪，避世君高栗里風，會過江干勞駐馬，還從京洛問歸鴻，交深道誼惟知己，白首天涯骨肉同。

南飛一曲壽坡仙，舊雨重逢又十年，皂帽幼安敲榻側，小車康節到門前，放懷湖海歸詩卷，環膝兒孫侍玉筵，拭目太平今不遠，春秋預卜及彭筵。

閒軒和雨耕韻索同作

夜醉黃金瑣，朝餐白雪杭，星雲將復旦，雞犬亦長生，尊俎銷兵氣，承平起頌聲，客中殘夢短，寒雨夜三更。

江樓臥病作懶散吟

懶散真成七不堪，百年已度四之三，小樓臥疾人誰恤，脫粟充飢我亦甘，腕弱偶然書尙健，耳聾還有筆能談，老來何處知安樂，醉後華胥一夢酣。

答滄叟有所示

事不責人如責己，是非便覺易分明，國於螭角儼盤觸，秦與鴻毛孰重輕，老桂倔強猶有性，寒松甯靜本無聲，若論風雅推壇長，吾亦依然附舊盟。

葩叟和我小樓臥病詩有危樓聊以此安枕小疾何妨作快談句躍然而起勝於枚乘七發疊韻報之

我笑書騷豈不堪，輸君文史足冬三，解頤妙語詩多調，苦口方知藥亦甘，久臥江湖增白髮，未忘風月接清談，尖叉門韻雖餘事，病起猶思百戰酣。

新除夕疊堪三韻

肉食原非素所堪，屠蘇酒且飲杯三，晚炊心豈因人熱，鄰餉言猶誘我甘，得句偶尋長慶體，寬懷姑作太平談，六街燈火沈沈夜，海底蛟龍戰向酣。

爲東坡作生日兼以自壽

自、藝、心、香、信、可、通、，歲、寒、攜、句、祝、坡、翁、，秦、黃、夜、夢、來、相、會、，江、海、天、游、寄、與、同、，堂、啓、谷、林、思、舊、澤、，圖、騰、笠、屐、拜、春、風、，面、頰、只、爲、尊、無、酒、，應、笑、顏、非、借、酒、紅、。

我、亦、嘉、乎、月、誕、生、，晚、聞、道、以、拙、修、名、，螭、磨、運、秦、如、同、轍、，鶴、奏、聲、清、合、侑、觥、，敢、望、前、賢、齊、白、傳、，聊、吟、貧、士、和、淵、明、，莫、嫌、介、壽、今、寒、儉、，一、盞、香、分、玉、穆、羹、。

葩叟亦同月生再疊堪三韻爲壽

耕、田、識、字、老、猶、堪、，（葩、叟、以、識、字、耕、田、夫、鑄、印、）蠶、化、神、仙、字、食、三、，壽、世、文、應、傳、不、朽、，聞、韶、肉、已、味、忘、甘、，傾、心、拜、倒、木、上、座、，（叟、崇、率、木、道、人、，而、木、道、人、，亦、極、贊、賞、叟、詩、）抵、掌、羞、從、稷、下、談、，同、是、歲、寒、松、柏、性、，笙、鏞、萬、壑、韻、長、酣、。

甲申春日題吹萬樓望江南詞

詩、中、畫、卽、畫、中、詩、，絕、妙、人、題、絕、妙、詞、，翻、怪、武、陵、漁、好、事、，仙、源、早、啓、外、人、疑、。
聞、唱、江、南、水、棹、歌、，客、心、悵、觸、又、如、何、，竹、枝、也、說、揚、州、好、，輪、與、吳、淞、一、蕩、波、。

春 寒

春、至、初、融、和、，春、寒、復、悽、惻、，山、氣、盼、夕、佳、，僊、臥、陶、抑、寒、，堅、守、防、邪、攻、，麗、高、道、僅、尺、，憂、懷、集、百、端、，何、事

日煎迫，不如飲杯酒，醉入華胥國，時無分煖寒，地不爭南北，耕鑿恆相安，得飽便卽息，此中有真樂，夢寐常相憶。

花朝

遲遲春氣轉和融，見說驚雷起蟄蟲，欲爲百花作生日，依然香國困東風，紙鷲上下飛無定，玉蟻惺忪夢可通，何處賣鴛鴦斷續，但聞甜語誘兒童。

壽震僧七十

策馬偕投萬里荒，蒙園癡詠夢微茫，年來偃蹇寒松老，不及寒梅自在香。
君客津沽訪水西，玲瓏館側我曾棲，儼然南北分壇坫，圖畫輪君續舊題。
我通東海攜家住，君去西冷放棹游，元白倡酬情不淺，詩筒來往遞庚郵。
高躅何期海上逢，河梁握別又匆匆，白雲蒼狗時時見，啼笑皆非客夢中。
江上峯青一笛風，詞家曲譜麗而工，我來學奏南飛鶴，笑倒仙人玉局翁。

懶漢吟

懶懶七不堪，我懶十之九，一懶遂百廢，百懶無一有，足懶不出游，身懶甘臥守，懶問滄桑事，懶訪書畫友，懶懶成聾聵，見懶若盲叟，有病懶覓藥，無資懶飲酒，琴懶撫七絃，書懶課二酉，詩拙懶成

章，字劣懶著手，昔日懶在心，今日懶在口，天地容我懶，恩德誠高厚，友朋恕我懶，交情真耐久，何以將懶醫，精神復抖擻，何以將懶驅，邪魔速遁走，獸叩懶殘師，師答曰否否，與其勞無功，不如靜則壽，且作懶漢吟，一笑驚懶婦。

挽姚雨耕

執別淋漓隣四年，懷君偶寄一吟箋，詎期雲樹成春夢，已隔人天斷俗緣，扮社寂寥傷舊雨，桐城著作紹前賢，亦知此去應無憾，揮淚何堪痛逝川。

題許畫隱楓菊遺畫，卽以酬松濤世兄見贈，用杜詩畫山水障

韻，兼仿其體。

堂上不合生楓樹，（借句）老眼驚奇撥雲霧，初吟霜葉牧之詩，更領東籬彭澤趣，俗工難悉數，妙手不一遇，重畫須重入，罕能心契素，海內紛紛學鄭虔，自詡換骨有金丹，若非脂粉抹，卽是墨水翻，那如瀟灑老畫隱，揮毫臂似靈通猴，卅年一瞥鳥飛疾，秋氣悲哉感深入，是畫是詩淚痕瀟，風雨橫斜歌且泣，憶昔贈我一幅圖，青松之下白鶴立，一期飛去海天闊，零落殘絲成弩末，念君天上已逍遙，願我草間尙苟活，何時見畫如見君，快若伐毛兼洗髓，君家有兒藏手澤，肯分巨幅球圖比，大兒得心傳，書法如鍼裏蘇裏，小兒經口授，兼擅丹青真種子，琴隱園，花之寺，遺筆超然脫塵滓，畫以全交有終始。

次韻酬葩叟辛秋枉和舊作

報我瓊瑤意孔嘉，詩筒不惜道途賒，深情只覺濃於酒，綺思猶餘散若霞，愛客無如今北海，賣書欲問爾東家，推敲得句何嫌晚，常侍才原敵浣花。
情落西風誦孟嘉，墜歡可拾歲云除，老婆自笑成殘客，好景君當愛晚霞，白首放歌猶異地，青山入望是誰家，鄰翁有約如呼飲，且待重陽就菊花。

和閒軒娛園賞杏花

芳叢曾見倚雲栽，六十年光一瞬縈，園主已非隨劫換，（娛園創始於苒氏）詩鄰有約看花來，沾衣雨濕江南憶，隔巷春深夢裏猜，三載瞻君邀獨賞，不辭題石掃莓苔。

寄懷卞猿叟

東風吹暖浴蘭天，會集香山望若仙，芍藥尙酣春作殿，櫻桃初熟夏登筵，忘懷莫問滄桑事，隨意常聯翰墨緣，白首有期重話舊，時清猶憶泰和年。

和陳惠之枉贈

七年不相見，風雨隔江天，衰老憐爲客，迢遙望若仙，尺書通屬訊，喬木幸爲遷，更美才三絕，齊名有惠連。（兼謂含光）

畫蘭冊子爲姚養怡題

荆榛已滿萬山叢，何處能容避雨風，無怪畫蘭不畫土，解人惟有所南翁。

俞壽老重逢拔萃以詩賀之

萃科選士歲在酉，人才搜集江淮藪，十有二年一舉行，往往明經老戶隳，拔轅先登已獨難，周甲重逢更罕有，要當弱冠貢成均，庶早得名晚得壽，鳳毛麟角希見珍，碩果今存淮上叟，高年正及大耋梁，當日已同拔萃柳，（唐柳玭仲鄆子，由書判拔萃，爲盧州刺史）恍如再世慶生申，六十周天一回首，士林佳話播海隅，羣仰靈光高北斗，讀書我已十年遲，學仕無成蹉乎後，自更玉步競維新，黃鐘毀棄鳴瓦缶，分門考試名雖多，碩士博士徒濫取，不崇國學拔真才，根本何由論爲守，挽回世運在吾儒，開氣中興有遺者，君不見有清將相多名賢，起家拔貢如某某，忠烈（江）忠襄（會）戡亂功，文恭（翁）文正（孫）調羹手，誰言科目中無人，功德與言傳不朽，南極一星光復旦，後先輝映垂長久，預徵上壽躋百齡，應勝荀卿三祭酒。

葩叟介蔣松亭周才良來學詩各以近作見示用前和葩叟五絕句

韻兼示蔣周兩子

與君酬倡幾春秋，江上晴霞晚尚留，今日欣然添二客，儼如赤壁賦同游。

門外何人獻酒臨，詩筒遙達覺情深，醺醺領會風騷味，來者焉知不及今。
老去談詩已黯然，江南何地不烽煙，九峯三泖鍾靈秀，繼起風人突過前。
紛紛刻翠與裁紅，鄰衛徒傷大雅風，願挽頽流維舊學，商量實在不言中。
落手珠璣解客愁，溯源有自出青邱，秦黃已列蘇門久，我亦同盟友鷲鷗。

得蔣周兩生和詩寫以示之

劫後風騷幾絕響，何期晚歲得新交，崢嶸並露龍雙角，文采猶存鳳九苞，自有寸心知得失，不辭一字共推敲，倘將石鼎聯吟例，我欲低頭拜孟郊。

立秋後喜雨

火雲鎮日向西流，葉落先知天下秋，一榻清醒眠北牖，半簾疏雨入南樓，初蘇病瘳消煩熱，已沁詩脾浣客愁，記得涼城山氣重，寒翁六月欲披裘。

秋聲

又聞四壁起秋聲，蟋蟀何因徹夜鳴，知否小樓燈影裏，有人兀坐到天明。

如意吟和高郵韓恕存作

吾嘗嘗座隅，不如意八九，韞子云不然，零葉開笑口，是亦反離騷，無獨今有偶，吾憶少壯時，得意

事恆有，入泮年未冠，成均貢列首，曾裁洛陽花，亦種關外柳，菱湖圖詠存，玉壘生還久，往迹何足云，浮名等芻狗，而今遯海濱，且作逋逃藪，餘生近耄齡，相伴惟老婦，兒孫志四方，衣食各奔走，藿蕨苦亦甘，松柏塞耐守，天子健且閒，知足亦幸厚，結習尙未忘，圖左而書右，懷舊兼思鄉，搜輯未釋手，（近編蕪城懷舊錄）筆忝不中書，詩拙自享帚，問字來門人，題襟多舊友，晚歲真知己，四海一高叟，（吹萬）欲乞定吾文，冀附名山壽，誰云千載名，不及一杯酒，聊和如意吟，不自知老醜。

滄叟以元人陳仲仁畫張敞畫眉圖屬題

絕世風流筆一枝，畫眉事亦未爲奇，闔房有甚畫眉者，神妙毫顛一笑之。
翠黛遙看近有無，良工今改十眉圖，若教敝也描新樣，戲筆須防冒老奴。
深淺何須問入時，老婆猶守舊型儀，是誰好事圖闔範，不畫齊眉畫畫眉。
此幅丹青最擅奇，端莊流麗兩兼之，不徒京兆傳眉嫵，治行風稜亦可師。

重陽用進退格

七度重陽江上客，登高興懶閉門居，早知送酒人來少，不獨題籤字說無，斗米價高詩更瘦，家山別久計全疏，四方蒼莽仍風雨，只有黃花對影癡。

贈蘇子衡表弟以今年政六十也

昔在光宣際，一官羈江城，我初守武庫，文化將開明，子從家鄉來，弱冠逾老成，經營資臂助，局以

正誼名，鎔經而鑄史，聚珍出版精，學堂編講義，以之導諸生，更有斷爛報，一時亦風行。（宣城懷舊）

菱湖廣十頃，風定荷香清，與子泛秋水，小艇瓜皮撐，朝迎露氣涼，晚送斜陽明，巴人發浩歌，（鄭丞）和鼓半醉醒，有如游赤壁，二客與偕行，烟柳宛如昨，回首不勝情。（菱湖秋泛）

國步倏以更，滄桑時遞變，大局創共和，選政重鄉縣，其時歸里門，與子復相見，實在名所歸，衆望推老練，縣政互商量，子亦有議建，匆匆出塞門，我尚有餘戀。（梓鄉應選）

十載長城窟，倦游賦歸歎，莊惠樂相知，同觀濠上魚，迷濛悵烟霧，禁令嚴金吾，蚌浦臨淮聞，與子共舟車，明陵鬱相望，萬山俯若趨，懷古發幽情，登眺一歎歎。（濠梁諧樂）

淮水何悠長，黃山亦縹緲，未觀天都雲，先出祁門道，倒湖近浮梁，山水供吟嘯，籌權有餘閒，煮茶品清妙。（司權倒湖）

大江向東去，好山繞白下，我方困郎潛，子適隱市者，因緣常往來，有酒杯重把，攜兒游湯山，溫泉水飛瀾，風浴詠而歸，點狂吾與也。（湯山春浴）

我年六十六，懸車返故里，個園賃三間，與子居尺咫，兒孫海上歸，約游皆色喜，同酌第五泉，共泛虹橋水。（虹橋泛棹）

朝出便益門，午憩禪智寺，葉家橋非遙，儒林墓在此，（汪容甫先生墓）與子下車拜，高山以仰止，石碣太守書，（伊秉綬書碣）牧童猶指視，墓修疏草成，（陳含光撰墓修汪墓疏）倏忽捧烟起。（大儀訪墓）

慨自歲丁丑，一別已云久，子復江南業，我作海東叟，娟娟秦淮月，依依白門柳，魚鴈互往還，感子

情亦厚，先後數十年，弟兄親白首。（江上通書）

松柏凌歲寒，冬心同耐守，有子敏而賢，抱孫富且壽，子年政六十，精神尙抖擞，我今七十六，不自覺老醜，爰賦南山詩，遙進北海酒，相期醉太平，更酌一大斗。（歲寒介壽）

題孫道東所著南通書畫家簡譜（滄叟次公子也）

生子當如孫仲謀，（成句）卽論作述亦千秋，編成耆舊襄陽傳，若數家珍米氏舟，如黍分晷嚴筆削，明清斷代蘭潛幽，經畝樓主傳餘緒，親見汗青慰百頭。

琅峯夙饒人文秀，近世但推張喬公，不有名家成會要，焉知鄉獻有遺風，圖書蕭落滄桑後，淮海英靈寤寐中，我亦手編懷舊錄，兼收三絕未完功。

和寒匏重陽雜憶

詩人雲散酒人空，爲惜餘春念此翁，酒債尋常隨處有，醜躬一笑又東風，（惜餘春）

綠楊城外卽天涯，淪落悲歌怨買茶，未必江州衫濕淚，似聞商婦訴琵琶，（綠楊村野歌老伎）

小樓危倚傍花村，每到重陽泛菊樽，霜葉正甜如醉酒，山家籬落亦朱門，（紅葉山莊舊主）

聽香畫本勝聽秋，（賂佩香有聽秋軒詞）家學師承顧虎頭，繪出重陽好風景，黃花風雨載扁舟，（聽

香室畫史顧升爲吉彝女公子）

耐

詠白菊用禁體

伊誰高尚隱籬東，本色天然迥不同，清到騷心如屈子，淡於詩品是司空，逕荒猶得還初服，香晚方知避濁風，我亦愛花兼愛潔，豈甘隨俗溷塵紅。

近事

未能火食料寒食，不可樓居且穴居，奇事古今窮則變，空觀人我有還無，亦知掘地泉將竭，安得彌天網或疏，此日與君同一笑，談詩忍餓兩忘癯。

喜梅真女孫考送出洋留學美國得七絕四首錄二

今古文辭夙討論，織成文錦似天孫，蜀西開榜黃崇嘏，帖報泥金女狀元。
老人貧病臥江鄉，失喜梅孫遠出洋，負笈特開巾幗例，吾家真是破天荒。

自嘲

糊塗粥薄餐三碗，疙疸湯溫進一甌，有子有孫孤獨命，永朝永夕未薪憂，老而是賊人稱壽，生已無家我尚囚，萬事盾矛何足道，委心任運寄天游。

蔣生松亭饋松江鱸魚

自笑平生爲口忙，（成句）淞濱原近寶鱸鄉，欲充旅食空彈鋏，雖起秋風未返航，喜極四腮鮮味美，頭來十尾老饕嘗，有詩會換尖團兩，那及嘉魚佐一觴。

壽徐仲輔親家六十

家近昭明文潤樓，德門清望重南州，早知樛梓材推俊，連附葭莩誼更周，今日吾儕皆老大，當年京洛共遨遊，依依情話重回首，離合萍雲總一漚。
頻年小住石頭城，來往淞濱自在行，萬利一源資貨殖，九州四海望昇平，肝腸不愧儒而俠，情誼尤逾弟若兄，游子未歸孫幼稚，外家恩義荷生成。

壽坡吟兼壽葩叟還以自壽

年年同月壽老坡，但陳公詩長吟哦，今年滄叟贈公象，拜瞻氣宇高峩峩，莘老通家有舊誼，龍眠畫聖殊凡科，（李龍眠畫公象，滄叟印贈）浩然正氣亘天地，江海之間公會過，寒竇愧乏花豬肉，只有鼎飯公毋阿，心香一瓣翼上達，得詩獻壽舞婆娑，旣爲公壽壽葩叟，還以自壽且自歌，偕與葩叟推公爵，髣髴公醉顏已醺，更願承平祝公壽，明年酒比今年多。

詠雪和滄叟韻

夢踏長城雪，歌呼朔漠風，冰堅鬚磔蝟，地凍爪留鴻，絮影烏頭白，桃花馬後紅，塞翁經得失，何似作漁翁。

除夕遣懷用蘇韻

消起歡娛已釋悲，靜參剝復理知微，須臾石火光中變，咫尺家山夢裏歸，友朋兩三今共健，年將八十古尤稀，夜長無寐天應曙，鄰壁餘輝恥暫依。
東逝川流西日徂，敢云老馬尙知塗，米薪饑貴民艱食，文字虛傳鬼畫符，蛇足已僂餘有尾，虎頭易碎持其鬚，雪中飄去春來早，預卜明年困可蘇。

立春後雪晴示高孫兩叟

嚴寒隨臘盡，晴雪轉和風，破敵驚池鴨，回春救澤鴻，草滋書帶碧，蘆出酒旗紅，正欲尋詩去，騎驢遇兩翁。

乙酉元旦書懷用元遺山己亥元旦韻

七十又加七，頻看景物新，還童忘久客，望氣降真人，歌詠備三老，安危顧四鄰，鷄鳴今始旦，得酒洗胡塵。

題祥兒四十歲小象寄渝

四十年方盛，勞生萬里途，山川雖阻隔，容貌自清腴，八載夢通蜀，三春望返吳，太平今可卜，骨肉聚相娛。

和葩叟元夜韻

久交彌識性情真，佳日高吟造意新，大難能平方是福，寒葩獨隱又逢春，詩聯五老存三老，（涼叟作古耐叟）邊場近同唱和惟滄叟及公與拙三人，筆掃千人抵萬人，今夜月明猶古月，心光照澈本無塵。

耐叟卜居邗上疊韻寄懷

自別淞濱去，邗江已卜居，近邗三日路，念舊一封書，筆老人彌健，襟分道不疏，里鄰應問我，道是病相如。

草萊三徑闢，骨肉一家居，地僻可安枕，年高還讀書，米薪何日賤，燈火隔江疏，康節精通易，行窩樂自如。

次韻和耐叟遷揚雜感

竹西慣有寓公游，近水猶堪問白鷗，最是冶春詩社盛，王揚州勝宋黃州。

廿年前憶駐高蹤，握手傾談似倦翁，（包安吳稱倦翁），湖上園林無恙否，齋聲偷換月明中。

參軍自昔賦城蕪，我欲搜尋筆已枯，只記戊年今日事，攜家風雨過珠湖。
舊交星散感漂零，猶有題詩在畫屏，忽漫相逢黃歇浦，不堪殘淚灑新亭。
小樓臥病月痕斜，四海何時息鼓笳，堪羨故人勸詩興，雪中騎鶴訪梅花。
過江不惜道途紆，社集慳供櫻筍廚，滾上詩翁今鶴化，（謂俞濠叟）黃公莫問舊時墟。
珠玉連篇足慰予，徑交芳草已安居，鱗鴻來往常無定，莫怪梅村遲答書。
地近東閩有舊居，懷歸遙欲與君居，夢中同泛虹橋棹，一笑仍爲海上逋。

紙鳶

又說寰城墮紙鳶，（元遺山句）春風何處不堪憐，慙葳欲覓地中地，變色驚談天外天，捨命拼爲兵死鬼，觀空都是野狐禪，老來我已難安枕，警夜何因攪獨眠。

次韻答龐眉公

滿樓風雨助哀吟，騷雅都成變徵音，建策治安空痛哭，居奇食貨更傷心，艱難朝夕雙弓米，破碎河山百衲琴，逕欲訪君同話舊，竹清海宇豁塵襟。

八月十一日書幸

新秋一夕轉回風，凱奏和平四海同，餘技已知驚鬼域，衆生幸免化沙蟲，河山再造兵戎後，骨肉重逢指顧中，歷盡洪濤驚浪險，扁舟無恙老漁翁。

秋興用杜韻

朝逐扶桑暮鄧林，日沈海氣鬱蕭森，烏夷已樹降旛影，國賊難依惡木陰，千古興亡關劫運，六爻剝復見天心，凱旋軍奏和平曲，不待寒衣夜搗砧。

八年風雨任橫斜，逋客無家兩鬢華，規復神京將返駕，漂搖滄海尚浮槎，六朝春色迷芳草，萬里秋風咽暮笳，付與東流千尺水，情深斷送恨桃花。

回首蕪城歎落暉，家山已破命輕微，紅羊烈火隨塵起，烏鵲傾巢繞樹飛，一息尙存心未死，萬方多難願終遼，痛深十日還思痛，瘦盡西湖水不肥。

成敗如爭劫後棋，南人歡笑北人悲，誰知四海揚塵後，還見三韓復舊時，伐楚借秦先例在，尊周攘狄義聲馳，中原况是炎黃胄，豈許天驕子妄思。

南北騫高萬仞山，淪亡五六年間，勝朝竟忍輸龍塞，苛約難忘立馬關，趙璧尙完堪雪恥，楚弓雖得亦羞顏，當時未揭黃龍府，痛惜全師奉詔班。

何物遼東豕白頭，竟甘傀儡溷春秋，大河早說公無渡，天子終輸妾莫愁，已類楚囚同命鳥，不如海關狎羣鷗，小朝廷事真兒戲，還我燕雲十四州。

運籌決勝兩無功，左右周旋列國中，肉袒乞盟收敗甲，膽寒飛將懾英風，蘆溝月照依然白，櫻島花殘慘不紅，鷓蚌今應知悔悟，爭持反使利漁翁。

河山無恙接逶迤，農業興邦闢為陂，白髮重談天寶世，青松獨有歲寒枝，修明內政兵應解，歌頌中興鼎不移，戰勝光榮開創局，千秋萬歲史昭垂。

得奎祥兩兒蜀中書

邊方已報息傳烽，劍外家書第一封，樂意已多悲意少，墨痕雖淡却痕濃，八年離亂天涯隔，兩字平安馬上逢，寄語當歸期早定，應憐倚望態龍鍾。

中秋月夜

幾經風雨幾虧盈，月到今宵萬里明，燦爛江山光復景，承平雅頌管絃聲，戈船橫海聯尊俎，壯士傾河洗甲兵，不待然犀幽怪遁，放開老眼看澄清。

祥兒自蜀歸省又赴北平

一去八年今始返，亂離如夢達天明，可憐僕僕風塵貌，不盡依依骨肉情，負米東歸艱蜀道，改轍北回又燕京，四方雖是男兒志，歸省何妨縮近程。

感事

塵清大海挽狂瀾，光復齊騰萬衆歡，微管一匡將袵左，如周三握亦才難，民心歸附資生殖，國本衰辱重治安，再造邦家非細事，當思厲益恤凋殘。

奎兒五十生日

行年五十知天命，寡過選賢自可師，已歷艱難蜀西道，正須珍惜日中時，季陵歸計應籌熟，宗武生朝合有詩，願汝身強同我壽，呼孫酒酌太平卮。

憤言

龍虎將軍駕馭來，扶持大廈仗羣才，流亡尙未安家室，鬻殖從何闢草萊，分肉難爲天下宰，借籌須用楚中材，兵戈而後叢荆莽，賦到江南庾信哀。
借助他山資整理，何因同室又參商，誰爲秦伯甘三讓，惟有夷吾出一匡，虜我仇輸撫我后，得民昌省失民亡，從來黨禍能傾國，殷鑒非遙善主張。
擊壁驅除伏莽戎，肅清要克奏全功，中興頌溢曾胡美，流寇憂深闕獻凶，蜀漢自當居正統，曹瞞畢竟是奸雄，人心厭亂非朝夕，呼籲天應鑿厥衷。
家國原來患不均，迭擢外患弱兼貧，浪難淘盡英雄恨，風又吹生野草春，諸夏可如夷狄長，百年願作太平民，無分揖讓征誅局，締造維艱在得人。

不倒翁季易屬和

試看傀儡戲兒童，倔強誰能似此翁，身受推排還自立，胸無城府本皆空，沙搏不作懶眠態，泥塑如參端坐功，難得糊塗博長健，任人嬉笑是癡癡。

異女仿清宮古繡翻新製成錦畫詩以張之

聰明兒女愛餘春，十指能傳院體真，巧奪天機誇織女，美鍾閨秀媿鍼神，錦心妙入絲絲扣，花樣翻成簇簇新，此亦我邦之藝術，寸綵當與壁同珍。

和葆之韻

詩成燭未燼三條，夢到還鄉意便驕，預祝東風春啜茗，綠楊城外泛虹橋。

次韻和葩叟詠近事

近聞和會定山川，但願寒灰莫再然，豎子瘡頭雖握手，殘黎雞肋不勝拳，犬爭投骨何會議，蟲化爲沙劇可憐，億萬生靈瞻馬首，疑神疑鬼下諸天。

賦贈吳江金松岑兼示葩叟

浩瀚大文章，歸趨百谷王，門羅秦博士，殿舜魯靈光，寰宇波濤息，名山歲月長，相逢何礙晚，好景愛斜陽。

齊楚兩雄邦，曹邨望欲降，胸儲書卷萬，氣吐劍鋒雙，論古杯重把，悲時斗怒撞，願余詩太瘦，愧煞賈長江。

和葩叟長歌

葩叟生長三泖鄉，鱸魚特產堪稱良，自誇口腹傲坡老，寄我一詩驚非常，我非孟嘗門下客，已無魚食尤慚惶，昨夢坡老降我旁，髣髴告我爲口忙，花豬竹鮑雖喜食，腹芥亦可以充腸，舉網得魚偶然事，奚須爾雅箋求詳，前思鱸有李應張，後詠鱸比漁洋王，或念吳郡秋風涼，或寫江樹斜日黃，但冒鄉味及風景，並未一一加較量，非我非魚觀始達，濠梁極樂兩相忘，生平文章半嬉笑，已讓彼出頭軒昂，既稱四腮彼獨有，盍分杯羹餉雪堂，我夢忽醒喜發狂，不嫌詩寫急就章，今值坡公之生日，正及鱸美堪侑觴，待叟還鄉始往取，竊恐有負坡公望，何不神通學元放，須臾釣出魚洋洋，否則吳淞僅一水，盍呼門生速寄將，（客冬蔣松亭寄鱸魚數尾）逋也垂涎魚所欲，翼可分惠老婆嘗。

哀江北用田耐叟哀淮安韻

何事稱戈又比干，當衝不獨是淮安，血流赤水沿河下，雨泣蒼天破郭殘，橫野屍遭戎馬踐，傾家糧餉

敵軍餐，蕭條百里無雞犬，凶暴凌人虎戴冠。

天馬西來舉國歡，（美使馬歇爾），調和止戰慮盟寒，淪淮化枳枝生刺，諺蜀飛書墨未乾，黨禍鈞連難化解，淪區廠脫沒遮關，軍屯星火瓜州渡，夢繞家山付一歎。

和耐叟韻

念君曾喫六安茶，垂老流離未返家，赤幟方張真似火，黃臺再摘已無瓜，何堪兵革談天寶，不忍衣冠

憶永嘉，但冀從茲能弭戰，莫教空現鏡中花。

葩叟以詩壽我卽步原韻奉酬

壽坡兼爲葩叟壽，以詩壽我我感叟，同嘉平月生先後，坡公倘許秦黃友，惟叟堪與前賢耦，我當隔坐奉尊酒，叟詩通篇爲我誘，高齊泰岱俯培塿，我將仰視色益扭，苦吟不就呼負負，閉門暫作連逃藪，續報叟詩化烏有，神龍見尾不見首，光燄上天燭牛斗，我是村語唱盲婦，難以牧笛吹信口，人皆厭聽棄勿取，叟偏嗜獅獨曰否，香山正會老友九，猥以拙詩張座右，觀者發噱戲木偶，幕影重重徒獻醜，何如叟詩當寶守，神奇便已化腐朽，私幸歲寒交耐久，祝我吟箋積寸厚，松柏之姿異蒲柳，一笑海濱兩遺耆。

再用前韻戲答葩叟論鱸魚

同月生爲坡公壽，欲乞鱸魚問葩叟，叟云鱸汛時已後，姑俟來年報老友，我云旣與沮溺耦，無魚何物堪下酒，不應徒以甘言誘，豈不視我如培塿，叟若聞之當愧扭，月令魚陟冰已負，松江况是產魚藪，不信叟獨言罕有，鱸惟四腮稱居首，其他僞物如量斗，我恰歸而告老婦，笑我三尺涎垂口，焉能人棄我獨取，叟旣云然何可否，恍然覆品十有九，魚目混珠充左右，叟又引經比擇偶，嬖母西施辨妍醜，不時不食訓當守，始知叟不欺老朽，同是離鄉客已久，思鱸比我意濃厚，且待西風拂楊柳，烹魚酌酒斫黃耆。

次韻酬金松岑題拙集并示近作

是翁早有千秋想，吾道翻因百劫存，孤憤可能除蠹政，高歌直欲返騷魂，要將文字維風化，庶幾河山鎮厚坤，晚歲得逢知己幸，傾心期與一開尊。

丙戌春節偶詠

爆竹喧闐響徹天，家家喜值太平年，尺蘇困厄當安枕，官戒貪婪莫愛錢，論治先除心腹疾，息爭不是口頭禪，時清願作中興頌，譜入春風被管絃。

余年十八補博士弟子員今年七十八又屆丙戌作重游泮水詩

觀場童子亦何知，草草風樞寸晷時，文字有緣知感遇，長沙祭酒大宗師。

小試吳陵報捷回，重開親見笑顏開，竹林差幸咸隨籍，喚作江都小秀才。（乙酉先叔浚清入泮，次年書繼之，鄉人呼之江都小童）

弱冠觀書意自雄，敢將才學比終童，誰知一落名場後，鴛鴦秋風六鹿空。

謔將優行貢成均，月旦評爲個儻人，孤負師門期許意，皖南塞北老風塵。（甲午溥師王岑尙書，拔取優貢乙未入都朝考，常熟翁師文恭公，自爲個儻人，載公日記）

桃花潭上念吾師，曾和重唐樂泮詩，白髮門生今亦老，親承衣鉢幸追隨。（乙亥汪師幼儀重游泮水）
鄉賢香碩阮雷塘，平日心薰一瓣香，講禮今當循舊例，掃星門外謁宮牆。（阮文達公重游泮水，議禮

，定於攝星門外行禮）

已擷芹香六十年，宦心未化老彌顛，欣逢黜陟夷初服，我亦重歌魯頌篇。
澎湃狂翻大海濤，列邦咸仰聖門高，讀書願與吾徒勉，國學重光起俊髦。

蔣松亭自張堰來

國土重光後，欣逢第一回，翦燈春意鬧，入室笑顏開，正助吟詩興，還勞致酒材，留溪風景好，待我杖藜來。

春陰

燦爛春光正放晴，又逢陰雨入愁城，惜花天似期培養，中酒人如未解醒，峭冷何因欺社燕，好音無處聽鄰鶯，重雲遮斷關山路，夢影模糊總不清。

偶成

惻惻春寒襲病軀，小樓坐雨似舟孤，晚來且飲亡何酒，飢極聊嘗爲甚酥，却老已知仙縵縵，送窮還有鬼揶揄，迷離枉說還鄉夢，不獨城蕪徑亦蕪。（爲甚酥，油果名，東坡詞云，已傾漚子錯著水，更覓君家爲甚酥）

周穀人年八十重賡思樂余亦幸附同游寄詩爲壽

童冠相隨昔詠春，如今皆是白頭人，曾游芹水重賡樂，正及花朝合飲醇，天爲斯文存碩果，我因同學附清塵；與君閒話兒時事，更卜期頤老益親。

縱目

縱目關山萬里遙，層層烟幕四周遭，已盟白馬曾猶在，只慮紅羊劫未消，行路維艱泥滑滑，占晴無險雨瀟瀟，寒雲黯淡邊風緊，昨報將軍夜度遼。

苦雨兼旬盼奎兒不至

苦雨兼旬霧四圍，焉從何處展天飛，心雖堪慰家重聚，眼已將穿子未歸，莫信鷓鴣行不得，又疑鸚鵡說皆非，東還好趁春爲伴，我亦龍鍾淚濕衣。

春愁

舊聞蜀道上天難，千里今能一日還，不信烏呼行不得，飛車偏阻萬重山。
青山隱約路迢迢，雨雨風風暮復朝，渴盼飛鴻來有信，平安早日返江皋。
昨宵飛夢皖江邊，飄泊應知劇可憐，倘得天教夷化險，心香默禱保安全。
重重烟霧望迷茫，縮地今無費長房，青鳥不來天又暮，相思一日百回腸。

傷春

既日如年永，傷春感夢長，鶉啼偏不歇，鶴返果何鄉，人命輕螻蟻，天心縱虎狼，存亡今莫卜，殘淚已盈眶。

挽卞猿盒丈

一別滄桑八九年，愛時懷舊寄吟箋，近會通問方春暮，詎料離塵在佛先，萬感早知心已悴，千秋信有筆能傳，故家喬木凋零盡，檢讀遺稿淚泫然。（附丁亥四月一週年，墓已宿草，追挽一聯云，節鉞溯家聲，儒雅風流，直媿明遺四公子，滄桑遭世變，性情猶介，未受秦封五大夫）

端陽

角黍生香蒲艾長，家家今日過端陽，傷心一掬騷人淚，何處招魂弔國殇。

荆棘

荆棘叢生道阻車，野心婪婪欲分瓜，關山寥落爭三衛，淮海淪亡剩魏家，毒物天生雙尾蠍，害人地產兩頭蛇，蒼海流血終貽患，何若抽刀斬亂麻。

將有北平之行留別海上詩友

大兒不返小兒親，去住何從一愴神，反哺尙知憐我老，遠游聊勝在家貧，栖栖誰信仍連客，倦倦難忘是故人，燕北江南倘相憶，好風莫惜寄書頻。

淞濱棗首久嬾親，歌泣無端動鬼神，攜手河梁將惜別，側身天地孰憐貧，詩家元白爲知己，酒市荆高覓舊人，歷劫猶容吾輩在，再期後約唱酬頻。

補遺

乙酉雙十節觀梅蘭芳演戲

不聽何戴唱渭城，落花時節感淒清，河山重整新歌舞，雅頌初聞第一聲。

移情海上得知音，不唱伊涼但越吟，早博聲名馳異國，刼餘未絕廣陵琴。（是日在蘭心戲院演費官人刺虎一齣是嶷曲也）

丁亥季秋

拙修州園賸稿

潛齋楊昭燾題



序

壬戌冬，余自寶昌解職後，遂入塞，攜家寓居舊京東紅門，取東坡下士晚間道，聊以拙自修詩意，顏所居曰拙修草堂，倩陳師曾書額，於是吟韻所託，即以拙修草堂名其集，凡長城笳吹，燕市醉歌，以及菱湖漁唱，邗上竹枝，悉載集中，一年一冊厚積盈尺，途經數千里而遙，時越廿餘年之久，舟車所至，出入必攜，雖不足云著述，已耗去心血幾許矣，惟因丁丑一役，倉猝避亂，未及攜出爲憾，至己卯次女肇異，自滬歸里，收拾餘燼，檢得舊稿數冊，已零落不完全，兵燹餘生，贖此劫灰，摩挲歎息，又何忍拋棄耶，遂重加編

次，列於寒松盦詩草之後，名曰拙修草堂贍稿，并將奎兒紅棉舊館詩存附之，楊子云恐後人用覆醬瓿，則聽之可也。

丁亥秋八月朔拙修老人識。

拙修草堂賸稿

江都董玉書逸滄著

京兆趙湘岑天津張稚軒同至上堡看牡丹（戊午）

駿馬名花一顧空，（上堡市圍內地近馬市）長城楊柳拂春風，出關氣挹東來紫，對酒香分北勝紅，春到邊荒寒尙勒，天留國色晚相逢，回思京洛三年事，古寺斜陽夕照中。（都中崇效寺牡丹不見已三年矣）

題黃莘田藏顧二娘硯拓本（己未）

紫玉彫銜石一方，墨池猶有麝蘭香，摩挲小印留鴻爪，豔說吳門顧二娘，（硯側有吳門顧二娘造六字）

乞假南歸留別塞北諸子時方立秋也

葉落高梧幕府秋，心隨征雁度南樓，鱗莖未必增鄉思，只爲西風動客愁。
浮生何處結茅廬，薄宦當年悔著書，預料歸期無一月，又攜梅鶴卜新居。
暮年欲了向平願，歸路頻分鮑叔金，塞上交游多古誼，臨歧猶戀故人心。

重過都門

大木重陰廣百圍，西山青翠入庭幃，炎炎赤日如張繖，黯黯緇塵半上衣，獨憶江亭詩侶散，偶過燕市酒人稀，十年舊夢重回首，芳草淒迷景物非。

塞上遇孫寒厓同年

吏隱逃名玉鑿邊，但將詩酒送流年，不期舊雨來天末，鴻雪三生話宿緣。江南瑣院搗文日，漠北毵毼草檄時，同是歐陽門下士，相看兩鬢已成絲。

興和郊行感賦（庚申）

夜避萑苻盡避兵，邊氓艱苦憫餘生，頽垣斷壁難安宅，石地沙田半廢耕，春盡萬山無草迹，村荒百里少人行，偶逢父老多含淚，但問何年見太平。

贈江南侯病驥

東登泰岱塞厓返，北望恆峯病驥來，同美壯游腰脚健，關山明月共銜杯。

塞外雜詠（辛酉）

夾道閒花碎錦鋪，驅車入谷路崎嶇，暖風熏得芳香烈，一夜寒霜塞草枯。

團圓醉酒意消閒，寒寒胭脂照玉顏，垂幕不知寒氣早，門前馬糞積如山。

夜寒效放翁長謠並次其韻時在寶昌

半生孤宦癡如蠅，官齋寂寞炊燠凝，狂風怒號夜瑟縮，冰壺厚積皆淒淒，飽餐豆粥雜麥飯，倦偃土甃然穉燈，羊毛颯颯浪雪起，（山中積雪爲風吹起俗呼之羊毛風）夜人肌骨晨未興，朔方健兒策馬全，狐裘獮帽綠青綾，入門箕踞便大嚼，座皆屠狗與販繒；自笑一官等牛馬，耐寒常伴梅花僧。（震僧喜畫梅稱之曰梅花和尚）

張垣晤毓紹岑學士

尙書持節安邊地，公子重來亦黯傷，玉牒猶稱宗室貴，青聽不似少年狂，謫仙游戲詩千首，曼倩談諧粟一囊，回首師門今宿草，相逢白髮淚盈眶。

夜宿蒙園（壬戌）

蒙園春色逞芳菲，轉眼風雲萬事非，塞上絃歌開聊舍，關中鋒鏑動危機，草亭寂寞經三宿，古柳婆娑大十圍，月夜酒闌人半散，青山無恙對書幃。

寶昌解職歸寄趙湘岑都門

塞外歸來逼歲寒，四山冰雪畫中看，濕薪添火鱸猶冷，凍筆題箋墨易乾，久官方知春夢短，薄游不覺客衣單，盤旋斗室乾坤小，萬物何妨作靜觀。

輓毓學士紹岑

青蓮學士舊王孫，身世蒼涼不可論，累代詞林傳玉牒，易朝公子隱金門，劉安拔宅神仙去，（近年學士迭遭喪逝）李賀修文筆札存，誼重通家逾骨肉，餘生無補負師恩。

除夕書懷

去年邊塞逢殘臘，今歲京華度早春，岸柳氣經寒煥變，庭槐枝發子孫新（今秋喜舉桂孫，近卜居東紅門，有古槐甚茂），頻聞爆竹驚山鬼，更譜梅花迓喜神，大酒肥魚堪醉飽，異鄉骨肉樂相親。

和趙湘岑藤花詩用程雲塘冢宰韻（癸亥）

劫後朱藤發幾枝，虬根蟠曲傍階墀，重披游覽燕都志，曾說瓊庵手植時（燕都游覽志云，紫藤二株，一在少宰右署中，吳文定公手植也，一在司廳左署中）。

多情花木屬詞人，陸畫徐詩迹早湮，賴有錢唐吳祭酒，藤花廳事記猶新（吳毅人藤花廳詩畫記云，吳

文定公有手植朱藤已七年句，作於己未，嘉靖己丑，徐文敏公，爲少宰賦七律二首，又後十年己亥，陸包山爲之補圖）。

當年畫省散朝班，嘉樹摩挲不等閒，四百年來風雅事，故人喬木重名山。

大陸龍蛇走蜿蜒，古藤天矯尙依然，雲塘題句今何在，石壁遺鐫乙酉年。

爲賞藤花綻紫苞，羣公剛倡縮心交，六如詩意鷗波筆，點染風華月上梢（唐柳丞首步程韻湘老繼之，和者甚多）。

警衛森森護曲欄，偶詢花事尙輕寒，清陰留得甘棠愛，莫作春風一例看（東部今身爲警察廳）。

崇效寺看牡丹

城南老館鄰花市，每過京華破曉看，卅載滄桑如夢幻（自乙未迄今凡六至都門），一春風雨已闌珊，漢宮露澆天香重，古寺煙藏碧玉寒（寺中有綠色一種，含苞未放），惆悵舊游人半散（昔日同游，有劉侍御誠甫，王太守翁廷今已歸里，王駕部安生，亦改可綏遠矣），爲參色相一憑欄。

贈天津楊子若用嚴範孫先生韻

萍雲聚首憺忘歸，共話滄桑百事飛，塞外春寒花寂寂，水西人杳柳依依，瑣珣仙館清風永（乃祖冷香先生有瑣珣仙館詩鈔），珠玉新詞白雪霏，何似富春江上客，披裘垂釣悟先幾。

清宮災

九霄龍燭光熊熊，禁城百仞朱霞烘，祝融稅駕建福宮，柏梁夜火天無功，高皇隆準鐘聲洪，龍顏日角而重瞳，四海統一歌大風，子孫帝王萬世雄，阿房幽邃奪天工，歷朝御像懸當中，城狐社鼠穿穴空，霹靂一震聲隆隆，神龍上天杳無蹤，星流電灼亘如虹，雲亭月殿排西東，仙樓佛塔摩蒼穹，牙籤錦軸玉玲瓏，商彝周鼎赤董銅，誰何竊玉象盜弓，咸陽焚炬付冥濛，百廿餘檣之簾櫳，劫灰俄頃如飛蓬，發奸摘伏計已窮，炎炎漢室火運終，可憐孱主年尙冲，驚愕失色耳如充，一言誤進蔽宸聰，拘守祖訓慮兵誼，禱武之門閉弗通，金吾施救以水攻，燼餘喬木成焦桐，金元明代易慮慮，殷墟夏屋嗟相同，故宮禾黍生芄芄，百年一瞬瓦礫叢，天威警世發贖墜，中原鼎沸猶昏聩，金牀玉几夜朦朧，不知厝火焚厥躬，焦頭爛額上客崇，猿崩棟折憂心忡，昆明劫後過鑄鄆，銅人夜泣淚雙紅。

追悼溥尙書玉岑師

元日朝天上玉京，心喪三載淚縱橫，門生痛作招魂祭，公死甯留殉國名，周室黍離增感歎，明城竹漚共淒清，烏衣閉巷今非舊，宋玉悲秋無限情（郭春榆先生詩，竹漚殘生痛，注：明宗室術桂，鼎革後，轉徙至台灣，鄭氏歸命，雉經死，明亡三十餘年，今墓在鳳山之竹漚里）。

涼城道中

樹密村墟近，山高古寺敝，平沙車過速，峻阪馬行危，一鴈懸秋影，孤蛩觸旅思，客裝何所有，風雨

半養詩。

正月二十日凌丈仁山明經單味仁觀察陳孝廉大鐙汪太守頤伯黃大令希堯同集會館拜阮文達公生日（甲子）

選樓葬器今何有，頤性遺書亦僅存，陵谷變遷同寄慨，乾嘉文獻獨稱尊，詩翁補祝東坡壽，鄉館叨分北海樽，看舊晨星漸零落，千秋俎豆付公孫（旅京鄉人，惟凌明經七十二，單觀察六十五，是日阮君楚三，號君鄂，暨姪乃毅，爲文達公族裔，咸來陪祭）。

端陽次日攜奎兒邀同傅端長游湯山

劫後昆明瀾濁流，清泉一洗古今愁，亭林舊有昌平記，飲水看山續勝游。

樓臺寂寂淨無塵，花木猶餘上苑春，野鹿自馴魚自樂，清泉今又屬何人（湯山舊有行宮，民國後改爲湯山別墅，京師鎮公，多卜築於此，主人未往，已三徑就荒矣）。

壽于嘯仙母李太夫人七十

巍巍于氏門，科名肯蔚起，世運漸凌夷，道藝隨轉徙，時盛崇高科，時衰重使士，達人在識時，勿徒慕青紫，于母夙賢明，以訓丈夫子，子聞賢母教，受命謹唯唯，幼慧精妙術，藝成道在是，壯歲游四

方，公卿爭倒屣，淵明斗米需，偶亦爲貧仕，小試發新硎，蒙城資治理，心勞拯飢溺，法不容奸宄，寬猛以相濟，東里差同軌，道頌使君賢，政秉慈親旨，捧檄非本懷，仕已無憫喜，玉步倏以更，滬濱暫棲止，成都有君平，竇卜術可恃，韓康游長安，途人識姓氏，自古隱君子，道不隨世諛，人皆五鯨蠹，心甯偕鹿豕，矧彼于子賢，術智神乎技，手弄宜僚丸，核鑽王戎李，運用在一心，神奇出寸指，千里託毫芒，萬言積黍黍，手揮目送鴻，珠細曲穿蠹，螺旋辨纖微，犀鏡增倍徒，不知操何方，寰瀛詫奇傀，梯航踵相求，贈以百端綺，品珍趙州璽，價貴洛陽紙，三致千金術，鳴夷無足比，于子孝且賢，歸以奉滌漣，抵掌傲公侯，大隱居近市，絕藝雖天授，懿訓良可企，媿我學無成，鄉居忝同里，薄宦又同舟，舊游皖江水，曾見板輿迎，登堂奉盤匱，別後來都門，滄桑逾一紀，茲爲壽母壽，辰良觥酌兕，四壁粲琳琅，南山頌樂只，醉歌述母教，以備輶軒史。

過前青廠周文勤公祖培故居懷曉垣塞上

門巷春深燕子飛，路人猶認舊烏衣，槐陰已綠楊花落，塞上王孫客未歸。

追悼亡弟玉堂 玉堂從弟，幼嗣外家，名朱董，年二十四，省高等畢業，獎優貢，自丁未下世，距今十有八年，幸有遺孤，得延一線，今夏，其子長年，自家來京，長身玉立，神采一如亡弟，見之喜慰，因檢行篋存有遺照，暨昔日親友哀挽

詩詞付之，追念手足，轉喜爲悲，爰作長歌，並示長姪。

憶昔甲申歲，春正汝誕祥，（甲申正月初十日生）三歲方在襁，口授書數行，背誦卽了了，反覆無一忘，初隨汝父讀，既學從二方，（地山澤山昆仲）詩書根夙悟，吾祖愛逾常，見汝頭角異，預卜吾家昌，同生兩弟昆，（七弟玉階）旋遭汝母喪，汝父遠游學，撫育勞周章，外家憐汝穉，失恃心慘傷，骨月鬪痛癢，兩家無參商，念汝外祖邁，西河痛十霜，承祧乏近族，祀將絕絮陽，乃與吾祖讓，擇汝續祠管，血肉同一系，教養兼善良，過江擇名師，就學丹徒王，（王君少棠）辛丑汝十八，小試備一費，朱董名日噪，堪爲兩家光，彼時崇實學，儀董開吾揚，（弟入儀董中學校爲高才生）汝以文學進，從容列門牆，金陵翔高等，（江甯省立高等學堂）多士偕濟蹕，分齋以課學，負笈汝日忙，吾正宦皖省，慮汝才輕狂，士貴器識遠，勿徒文采彰，譬彼農樹穀，良苗去莠稂，又如工琢璞，美玉成圭璋，攻錯資益友，指汝師事梁，（公約）報書心差慰，結交皆老蒼，吾偶過白下，風雨夜連牀，嘉汝學猛進，爰汝論慨慷，斂才以養氣，信勿口雌黃，仕學而異轍，一水遙相望，俄屆歲丁未，學成私願償，高材獎優行，展足雲路曠，鄉人倡族學，省會時迴翔，學使多汝能，命汝勘學堂，冒暑避鹽漬，僕僕他不遑，抵省猝遘疾，六時命遽亡，凶電一霎至，驚痛摧肝腸，汝父客盱眙，吾亦官天長，恨吾羈轡守，不克越皖疆，念汝身後事，咄嗟分鶴糧，五弟（玉樹）感懷切，輟泣夜假裝，汝父已先至，汝婦攜女將，仰賴學使賢，哀汝一解囊，恩誼周存歿，戚友咸贊襄，挽歌滿道路，旅棚返故鄉，寡妻與幼女，後路殊茫茫，遺孤幸在腹，一綫延家慶，念汝富才學，方期登廟廊，不謂年廿四，殉學歸北邙，蒼蒼胡不諒，奪我家鳳凰，玉步今以改，往事成滄桑，倘汝猶在世，時艱足濟匡，家國兩不幸，慨

歎空旁皇，日昨汝子來，頽然侍我旁，問年已十八，立志在自強，讀書差解事，論對有紀綱，儒業不濟貧，貨殖計不減，况有中表戚，提挈入商場，吾惟勗汝子，猶勗汝斂芒，吾子長汝子，友愛相頡頏，匪勉各努力，前途殊難量，語訖欣韓戚，何處夢池塘，遺照猶在篋，展對淚盈眶，持以付汝子，率歸善寶藏，更念汝一脈，皆與汝子詳，汝母嗟早逝，遺孀厝高岡，七弟貧且病，八弟（玉峯）仍荒唐，望汝佑子賢，後起吾軍張，富貴勿忘本，兩家保安康。

于嘯仙招飲寓齋座有陳孝起閔葆之朱菊坪

自經離亂後，簪盞倍相親，招飲黃花酒，都成白首人，風雲多變態，身世一微塵，星聚逢良夜，高歌信有神。

賦贈沈太侔祠部

落花舊夢燕城路，小閣幽棲廠市南，勝國名流龔禮部，騷壇盟主法詩龍，歲寒松柏稱三友，劫火圖書曠百函，籬菊未凋梅早發，相從煮茗佐清談。

讀史書所見

挽瀾力障百川東，大樹威聲亦自雄，不信斬關甘叛主，由來誤國是和戎，朝搜兔狗烹燕市，夕擁龍蟠出漢宮，責備難逃狐史籍，此生枉自遜山中。

立春前三日出都留別都中諸子（乙丑）

交游京洛皆蒼老，一聚三年慰客居。蹀躞紅塵難避世，蕭疏白髮渺愁予。東風著力花開早，南浦銷魂草碧初。皖水那堪尋舊夢，天涯回首幾躊躇。

方地山劉容季邀飲津門酒樓座中皆家鄉舊雨

北風吹送鴈南翔，舊雨無端聚草堂。不信揚州明月夜，二分今在水西莊。

京口望揚州欲歸不得

北馬南船未息機，家園咫尺亦思歸。欲憑滄渡寒潮退，爲擇枝棲瘦鶴飛。父老相逢鄉語熟，江山無恙畫樓非。元宵乍過春燈落，小立危闌淚漬衣。

舟次金陵懷梁公約

江南有梁子，昔共少年游。一別經滄海，相思已白頭。河山餘戰壘，書畫隴高樓。咫尺懷風雨，青溪曲水流。

重游菱湖卽題蕭龍樵所繪冊子

我本烟波舊釣徒，一簑一笠一葫蘆。湖中明月還相照，笑問今吾是故吾。

幽棲會傍水雲鄉，萬頃荷香挹露涼，菱芡常供佳客饌，扁舟一葉往來忙。
森森武庫重防閑，湖滸清流繞碧灣，烽火不驚鵝鷺散，藕花深處放船還。
槿之葑蕀不自憐，湖山一別已華顛，寒翁那比漁翁樂，不聽菱歌十六年。
一天煙雨滿湖春，重訪桃源許問津，前度漁郎今又至，青山應笑白頭人。
眼底昆明朕刮痕，舊游零散幾人存，沙鷗穩睡風波定，萬樹垂楊畫掩門。
園依綠水起樓臺，荷菱浮香繞郭開，新闢山門通曲徑，待搜掌故我重來。
放翁團扇詩題遍，垂釣嚴陵渺若烟，涼夢續修鷗鷺約，畫圖早倩李龍眠。
瘦西湖上客忘歸，又見江南柳絮飛，翻說荊鄉無此好，酒香飯熟鱖魚肥。
昔游頰上覽西湖，未必風光勝此圖，詩酒流連歡可拾，敢將韻事比歐蘇。

題懷甯潘強齋印譜

絕學程巴去不還，（程穆倩巴子籍）典型遙企四靈山，（完白山人有家在四靈山水間印）大名方駕翁
（覃溪）錢（辛楣）上，手筆超然秦漢間，儘有倦翁（包安吳）傳法乳，除非讓老（吳讓之）莫追攀
，千秋道藝樹興廢，更許何人足抗顏。

和吳還翁白門車次枉贈韻

久與田園別，浩然歸去來，忽逢吳季子，握手笑顏開，小築堪延月，將離待舉杯，青青白門柳，江上
重低徊。

挽瞿劬安

黃梁一夢困興亡，小築東皋舊草堂，斗米辭官陶靖節，椽書傳女蔡中郎，平生骨鯁瀉盃酒，解悟心禪
蕪瓣香，熱血滿腔家國感，淒涼今日罷端陽（午日逝世）

五月廿九日同吳止齋周夔厂胡淵泉張渭川游菱湖公園

宜城東北隅，菱湖隔塵壤，烟水廓清幽，雲山起蒼莽，佳境豈云遠，端居涉遐想，炎氣日以烈，游賞
與殊曩，屢欲避城喧，性懶不可強，休沐屬清暇，晨興天氣助，同志二三人，僧樂無少長，搖搖坐小
車，穿荻如盪漿，塗狹礙荆榛，雨足肥菰蔣，稻花香滿畦，荷葉平如掌，佳禽掠水飛，鳴蟬過枝響，
湖心躍園亭，龍山時俯仰，登眺眼界寬，延佇襟懷敞，園丁進茶瓜，適口味俊爽，藕絲雪盈匙，荷露
香流盞，但愛境清涼，頓忘塵擾攘，仰瞻山人姿（完白山人象），簞笠存遺像，放鶴夢未還，乘釣月初
上，四靈山水奇，雲烟供眞賞，安得踞芳蹤，逍遙脫世網，坐久暮影移，習靜道心養，游侶倦言歸，
柳疏風澹蕩，途次遇張子，興來方獨往，袖中攜小詩，醉歌慨以慷。

于役徐州

秋高落日柳婆娑，芒碭風雲猛士多，側聽鼙鼓驚思將帥，仰看星斗遯山河，楚王事業今安在，彭祖春秋
壽幾何，過客恩恩眞一瞬，黃樓勝蹟憶東坡。

九月十五日攜子肇夔登鳳陽第一山過龍興寺瞻明太祖遺像

昔花已過重陽節，白首來登第一山，只爲風聲驚鶴唳，偶從蕭寺見龍顏，軍儲已罄餘殘篋，佛座空存掩破關，且與吾兒登絕頂，摩挲碑碣夕陽間。

丹徒徐大令芋僧同年壽招飲卽席賦贈，兼呈袁體明道尹

南州高士梁園客，謬附齊年久別離，旅邸相逢疑隔世，旗亭話舊憶兒時（芋僧寓揚城古旗亭），飄蕭白髮家千里，珍重黃花酒一卮，北顧烽烟閒消息，萬家生命託衰絲。

和閔葆之親家九日瓊島登高韻

江淮勞問訊，風誼感平生，乘老猶縹宦，憂時未罷兵，愴然王內史，愁絕庾蘭成，歸夢思京洛，烽烟萬里橫。

題裴伯謙曉閣詩集

巖崑絕頂小盤旋，匹馬馱裝詩百篇，儼耳五年蘇玉局，夜郎萬里李青蓮，奇冤昭雪天回霧，傑作驚人海倒懸，山閣壯濤書畫舫，白頭歸隱澗河邊。

讀沙祝幡謁明陵詩感賦

鬱勃興雷雨，天生地勢強，太公身藁葬，洪武首稱皇，王氣今安在，荒原客弔亡，匆匆歸轡促，遙顧萬山蒼。

寂寞臺城路，金陵亦黯然，當年埋玉匣，今日化蒼烟，翁仲眠荒草，王孫買墓田，何如方正學，血禍尙流傳。

居庸關下過，曾謁十三陵，伏臘何人祭，山河易代興，杏花春似火（昌平陵二月杏花最盛），泉水暖無冰（地近湯山溫泉），一例歸消滅，歎獻百感增。

袁道尹體明邀赴亳州查勘匪災

狂寇鴟張西復東，北門鎖鑰竟無功，池凝碧血千秋烈（婦女殉難慘烈），劫過紅羊一炬空，縱虎出山心太惡（華旅搶掠出關），引狼入室計終窮（孫匪爲華旅勾引而至），已除大憝伸軍法（華旅張團均伏法），撫問聊堪慰澤鴻。

胡翰生同年招飲蚌埠酒樓晤魏弱叟王小塢沈緯文卽席口占

並轡名場意態雄，塵飛瀛海各西東，晨星落落干戈後，舊雨依依逆旅中，伏櫪在途羈老驥，呼羣隨地戀征鴻，小樓夜話傾尊酒，年少俱爲白髮翁。

丙寅三月十七日陪同袁道尹體明游采石磯登太白樓

流水淙淙去不回，危樓俯瞰石門開，百年征戰英雄老，三月鶯花我輩來，文字倘能消劫運，江山儘許助鴻裁，躡躑絕頂勞延佇，欲問青天把酒盃。

落花飛絮漾晴和，攬勝人來感喟多，世有允文能却敵，才非李白莫高歌，迎江山色排青闥，嵌壁梅花影素娥，東顧石頭西皖口，客舟廿載幾經過。

讀嘯樓詩集贈李範之

平揖蘇黃俯半山，先生題詠滿江關，散原老輩甘低首，興化通儒許抗顏，君與李審言神交最久，面擁百城詩思迥，手摩十硯宦情閒，相逢便話菱湖夢，敢乞名言幸莫慳。

酬朱萃園贈硯

袖攜東海嶺南歸，家住池陽近翠微，金石縮交應恨晚，田園樂志欲相依，衝齋過雨山雲活，染几揮毫墨露飛，江上扁舟迎竹垞，待評書畫坐斜暉。

韓伯韋金魚池落成

地偏北郭羅精廬，雅便臨池書畫詩，一二寸魚三兩竹，買鄰欲傍故人居。

譙陵行爲亳縣譚頌三姬人楊女史殉難作

譙陵城頭雲壓黑，譙陵城下血凝碧，冬十一月入譙陵，更見一泓寒水白，念我欲作譙陵行，執筆屢輟心鬱結，譚侯示我悼姬文，詳述亡姬事慘烈，姬人爲誰楊女史，家本洛陽舊農籍，少小端凝習女紅，十八迎歸侍親席，盤區潔奉高堂歡，星月相隨隨婦婢，荔支旁挺綴蠅蟻，鸞鳳麒麟並秀特，一自譚侯賦遠征，翠樓凝佇垂楊陌，三月偕游梁苑春，七年共踏龍沙雪，解佩只道不如歸，徑荒重理陶潛宅，節衣食性性天成，女布男錢精學畫，清徽若比顧眉樓，應荷天家芝誥錫，詎知福慧忌雙修，鏡破菱花鸞影隻，當日從容就難時，岌岌譙城危旦夕，南八求援苦未還，密遣諸兒付滅獲，偷羅虎口離子遺，曷赴鮫宮免羅織，曹娥渡江江不流，綠珠墜樓樓永寂，淒然惟子泣吞聲，赤脚老奴掩草藉，湛然冰潔面如生，昏宵禱瘞城坡北，譚侯聞耗急還歸，入室驚臍心益戚，招魂新家葬孤鸞，玉匣珠襦閉幽窆，慨自嵩陽狂寇來，謀報鸞馳紛絡繹，兒戲徒揮烏令兵，野心不殺黃巾賊，朝驚風鶴逼南郊，夕詫天垠下東柵，一十八日虎負嶠，高屋連雲恣大索，淒涼張儉已無家，倉猝趙岐藏復壁，騎驢枹將遭劫持，隳馬王孫辱鞭策，封狐踞窟蒼鷲噪，辰虹貫天白日匿，瘠弱難逃溝壑填，倔強甘忍飢骨磔，亦有鄰家姊妹行，蹈義爭鏘完白璧，晉井咽脂素素姿，霜夜婦娥斂皓魄，蘭茝蕙隕總悽愴，賊遁城荒掩血骼，監門圖畫閔流亡，採錄輻軒增歎息，人生朝露只須臾，秦岱鴻毛輕重折，矧我碧玉出良家，大義凜然尤罕覩，皎皎堅操勵雪霜，蒼蒼勁節凌松柏，我勸譚侯休鬱懷，天使幽貞全傲德，君家趙婦昔罵賊，櫻凶殿柱血漬赤，（見宋史）前輝後映家乘光，遺烈扇芬羅史冊，君不見露筋祠靜澗湖清，風節井澄塵滓滌，寒泉合薦水仙王，萬祀千秋永無極，吁嗟滄海今橫流，蒼昊何時厭兵革，頽俗澆漓倫紀亡，

七尺鬚眉愧巾幗，哀哉今作譙陵行，浩劫茫茫天補石。

歲暮返京

鶯魚聽罷荒麻冷，（乙丑寓亳昌咸平寺度歲）幕燕巢危落日斜，泛泛江淮常作客，霏霏雨雪乍歸家，
干戈滿地愁多梗，兒女圍燈笑結花，昨過津橋寒月瘦，照人清夢到京華。

旅蕪月餘春雨泥人遲舟未發賦呈王竹林丈（丁卯）

玉關已隔八年秋，千劫重經聚一漚，同泛江淮偏晚遯，潛研金石恣旁搜，堂堂歲月人磨墨，莽莽烽煙
客倚樓，坐我春風忘旅寂，欲行不得強淹留。

天津雜詠

天津橋上月如霜，車馬喧闐廣樂場，借問芥園何處是，更無人識水西莊。

八月十五夜澄江觀月卽呈寒厓同年兼寄示沙祝髯

一年一渡中秋月，悟澈盈虧衆慮清，昨憶茶香鬪試院（江陰縣署，爲江蘇學院舊址）仰看冰魄照江城，
市爭界餌羣兒戲，影隔河山萬里明，癡鶴夜眠風露靜，夢餘猶聽鼓鼙聲。

史補山邀飲座有俞壽田沙祝髯張止凡卽席次補山韻（戊辰）

淮上德星聚，吟僑得暫留，夜涼疑有雨，詩瘦不禁秋，蔬筍參禪味，風騷繼選樓，連宵腸詠盛，大白與君浮。

挽徐芋僧同年

昔駟詞場出處同，頻分宦轍各西東，濠游魚樂逢莊叟，歲次龍躍厄鄭公，畫舫萍蹤傷往迹，旗亭絮酒哭春風，人間煙火君羞食，跨鶴逍遙上碧空。（哀體明總禁烟禁虛左以待君未至竟永訣）

十月十一日謁明陵

王氣銷沈盡，豐碑迹尙留，興亡關薄數，風雨自春秋，抔土叢荒草，斜陽下市樓，我來憑弔晚，蒼鶴四山浮。

六十述懷

昨始知非悟化遲，江淮蓬轉亦何爲，歲寒敢謂堅松節，藝艷頻嘲舞柘枝，李耳早垂知足訓，蘇尋晚賦拙修詩，兒童不解而翁意，強欲躋堂上酒卮。

夙游京洛博浮名，第一春聲出鳳城，知己感深冀北顧，不才濫竊汝南評，（乙未以僉行應廷試第一謁翁文恭公目之曰僑儻人）摩挲石鼓愴儒雅，蹊踐金門附客卿，三十年前塵夢影，蹇驢席帽未忘情。

少年志氣露崢嶸，一割鉛刀百不能，寬猛衡平三尺法，清貧箴守一條冰，折腰祇爲營微祿，強項知難避俗僧，寵辱無驚心止水，晚來跌坐悟禪乘。

漫云花又種河陽，驥伏鹽車老朔方，風雨幾經茅屋破，關河一別石田荒，墾邊欲效趙充國，縮地空思費長房，生入玉門雙鬢白，坐看塵世話滄桑。（昔建議舉政與築路並行由集甯至滂江再達庫倫未果）
韓康藥竈賣長安，寄隱壺天歲月寬，行樂有時過玉鍊，倦飛無夢振霜翰，滌塵偶試溫泉浴，訪古閒尋夜市攤，乘興游春腰脚健，西山回顧翠雲寒。

重來皖上認巢痕，烽火驚天萬馬屯，權酷職羈蘇學士，拯飢哀動鄭監門，雪中訪戴停詩舸，江表依劉負酒樽，一霎烟雲虛過眼，豈徒偷活愧梅村。

雲溪寄廬且安居，賴有山妻挽鹿車，垂老未完婚嫁累，浪游頓覺友朋疏，淺斟玉碗新蕩酒，重檢巾箱舊著書，更念兒孫南北海，幾時歡樂聚瓊廬。（向著有蒙園紀聞寶昌雜錄已梓行餘如廣陵快聞塞上談藝錄江淮訪舊錄均待梓）

淮上題襟締宿緣，菱湖漁唱又經年，逃禪有地師茶隱，止飲無心鬪酒泉，雪影飛鴻餘爪印，鄉思騎鶴問腰纏，春來擬放西冷棹，竹杖芒鞋學散仙。

元宵卽事（己巳）

春暖春寒院闌城，觀燈節已罷燈明，笙歌子夜思長樂，花月兒時見太平，詩侶隨緣聊訪舊，酒徒強飲不知名，元宵疑是逢寒食，風雨沈沈動客情。

挽黃哲夫

蓮幕相攜江夏黃，衰年運蹇誤文章，陸機在昔游京洛，杜老垂時困耒陽，剩有錦囊詩寂寞，可憐葛屨色淒涼，桐鄉鄰近哀聞笛，絮酒臨風淚濕裳。

卞猿盒寫贈詩扇並倩張甘亭補菱湖圖賦謝兼懷許靜存

盛唐山下有菱湖，收入清河畫舫圖，尺幅鷗波神淡遠，廿年鴻雪影模糊，補題韻事傳歌扇，重話前游遇釣徒，更念蜀岡消夏好，（猿盒諸君，有卞上消夏集）秋風我欲戀莼鱸。

病後喜雨

日燥風火搏，寒懷侵孱軀，微生一不適，偶與常時殊，起念萬物衆，苦旱將就枯，分秧無寸水，村農相嗟吁，三民曷生活，豈獨一病夫，陸聞雷霆作，時雨與之俱，屋上驟飛瀑，灌頂如醍醐，蒼野賴天助，農事猶可圖，但願遍廣漠，萬物皆沾濡，僕病亦霍然，喜雨報粵蘇。

題明程編修遺琴歌有序

明程編修濟，爲建文時，從亡諸臣之一，遺有古琴、漆書，朱文程濟二字，刊有宏仁題詞，及水繪園珍藏字，巢民小印

，信珍物也，程編修事實，略載明史，寄園寄所寄，溯自明
建文遜國，迄今已五百餘年，此琴展轉，爲揚州史閣部祠僧
還元所得，祠僧圓寂後，今藏楊子繩武家，夏四月，書歸邗
上，楊子爲道其顛末，並以拓本見貽，遂作長歌以紀之。

燕塵萬騎逼建康，虞絃龍撫龍潛藏，金川門啓朝士散，化爲白鶴隨翱翔，艱貞蒙難憶明皇，賀老琵琶
泣數行，麻鞋赤服走萬里，白雲庵裏靜焚香，鏗桐尾焦心未死，日夜抱琴待天子，淒然一曲菜根歌，
慘不成聲已變徵，（建文爲僧，居羅榮寨之白雲庵，命程濟築圃，建文作菜根歌）從亡昔有卅餘人，
半匿姓名遺青史，此琴朱漆字斑斑，太史忠貞世罕比，殷墟鐘簋歎何存，換羽移宮漫再論，玉軫珠徽
委塵土，清風明月悄無言，知晉重遇梅花衲，（宏仁，別號梅花古衲）鑿古曾藏水繪園，此物應爲神
護惜，不知流落江南村，江南烽火遠連天，兩代興亡海作田，市隱吹簫行乞食，道賢易服半逃禪，古
晉寢失新聲競，誰奏猗闌理舊絃，邗江老衲隱君子，（史祠僧還元）荒祠棲遯枕琴眠，偶逢春嶺梅花
發，雅奏情移海上仙，祇惜今成廣陵散，維摩怛化又經年，楊侯雅興與方外伍，曾聽道音溯太古，夙語
琴趣與神通，縹緲什襲藏珠柱，我歸海上遇楊侯，爲道源流揮玉壘，拓本封題遠道貽，考證堪爲琴史
補，梅村昔聽玉京琴，詠歎長歌淚濕襟，矧茲五百餘年物，懷舊蒼涼繫客心，風雨幾番經浩劫，改絃
我亦寄長吟，仙雲縹緲黃冠客，流水高山何處尋。

大暑苦熱楊繩武自楊寄吳野人陋軒詩，汪容父遺像見之如嚼冰
雪勝服一劑清涼散也

日長真似歲，何以避炎曦，客館無聊賴，鄉書慰遠思，抗懷容父像，消熱野人詩，如入清涼界，悠然與古期。

追懷史公祠還元上人

一曲廣陵散，千秋太古琴，逃禪餘故物，出世亦遐心，鶴守孤忠墓，雲歸功德林，山中想遺蛻，梅嶺隔春深。

寄懷山陽何子久同年

春明一別卅餘載，鴻雪迷離忍再論，東閣清吟人健在，北窗高臥夢餘溫，晨星落落停琴軫，塵海勞勞負酒尊，忽報故人書札到，漫將遲答笑梅村。

立秋後一日俞濠觀寄詩來同時揚州卅十環盦許三靜存詩函亦至

卽賦一律答之

昨夜階梧葉報秋，莖鄉入夢倦登樓，三君緘札來蒼鴈，兩地盟心證白鷗，冰雪詩清人益健，江淮歲儉

客同憂，自慚班扇將捐棄，猶效塗鴉寄暮愁。（猿盒以扇索書）

濠上趙襄丞德孚昆弟有詩寄示卽以賦答

盛唐山下論文日，宣武城西訪舊時，契闊與君千里別，神交慰我十年思，心堅松柏歲寒節，道寓淩梁秋水詞，自愧江湖猶泛泛，連城拜讀少陵詩。

雪後劉小俊招飲

筍香魚美戀江鄉，觴客今逢小孟嘗，冰膾南烹應久欠，調和羹臠擬商量。

答謝何子久子健昆仲寄畫梅花詩軸

高隱淮陰大小山，筆端春色落塵寰，詩吟東閣君家事，意在冬心二樹間。

青陽道中（庚午）

土潤風柔宿雨餘，薄游恰趁暮春初，鶯飛草長江南路，盡日看山坐筍輿。

度盛家嶺

性愛名山恣勝游，詩材畫稿一簞收，小橋跨澗遙通徑，古寺憑巖半築樓，滿眼野花迎過客，在山泉水

是清流，天風送我青峯頂，俯瞰雲烟萬家淨。

新安紀游

新安故郡多名山，千巖萬壑相連環，黃海白嶽兩奇絕，自非仙侶難追攀，宣平羽化李白往，登高能賦風懷想，平生性縱愛邱壑，千里無從著幾雨，況余拙宦一勞人，滄桑飽閱飛烟塵，自從蘇武轡邊塞，徒羨嚴光隱富春，山川還是江南好，鵲啼勸我歸來早，賈文尚乏草堂資，寄懷擬乞菱湖老，名山有素天爲緣，辨裝須挂杖頭錢，行指孟冬春未發，膽途還顧如惠連，（謝惠連詩，我行指孟冬，春伸尚未發）看山久邀季布諾，清約豈能負林壑，鶯花江上正迎人，直上翠微健腰脚，松崖松磴青巖陀，千回百轉如旋螺，桃花飛雨天外落，香飄蘭徑來風和，羣山萬笏初覩面，一瞬雲封山不見，但聞澗水流淙淙，輿人已道過山縣，山縣城環鳥道斜，沿溪隱約有人家，停車午餉惟燒筍，近市村謳正採茶，茶香筍美滿山谷，飢渴易果旅人腹，山居魚鴨視奇珍，坡仙日啖花豬肉，晨征暮宿心忘疲，兼程乃達湖之湄，湖光山色看無盡，漁樵笑我來何遲，我來山中如過客，賦飲清泉煮白石，紀游聊爾發長吟，若買青山猶未得。

山屋雜興

山林多虎豹，家人戒遠征，我行深山中，道險心自平，習習谷風靜，悠悠泉水清，所遇卽以適，撫物皆有情，晚飢餉筍熟，晨起聞禽鳴，平生守吾拙，何必心營營。

客居偶嗜飲，微飲卽以足，薄酒聊勝無，逾量非所欲，由來醉翁意，只愛山水綠，鄰友常見招，亦感情好篤。

春日倏云暮，天寒苦雨多，潭水日以長，直瀉如江河，舟楫豈不利，而無估船過，津梁忝厥任，難避大吏呵，昨聞樵者語，束手開斧柯，米珠薪匪桂，貴賤懸殊科，西鄰一暹羅，南山徒張羅，斯民常苦飢，長此將奈何，我聞三歎息，聊以寫短歌。

挽郭楚生

詞人老困祕書郎，筆纒經營兩鬢霜，我輩豈堪流俗侮，春風偏助少年狂，遺詩剩有愛時淚，有子能承縮地方，（子楨之續嗣鐵路局祕書之職）溘雨伶懷江水逝，招魂夜夢鶴還鄉。

夏五攜奎兒游覽西湖

吳山越水自清幽，長夏乘閒一快游，西子靚妝窺半面，北峯高處隔中流（登南高峯），曼聲絃索來歌舫，晚飯魚蝦醉酒樓，坐與舟人談往事，茫茫小劫不勝愁。

破塔巋然竦翠微，初陽臺上漾晴暉，偶隨士女觀魚樂，不見仙人放鶴歸，金碧樓臺紛錯列，山川錦繡惜芳菲，登臨別有滄桑感，梅雨霏霏燕子稀。

一路與人唱竹枝，嶺雲穿樹影參差，清心試茗烹泉活，險境披榛露石奇，韓戰秋風賈相宅，鵝啼夜月葛仙祠，校經注子今何在，懷舊淒然有所思（汪容甫先生歿於葛嶺）。

靈隱韜光信可攀，登高四顧小塵寰，靈輿直上雲千級，竹笕斜通水一灣，巖洞佛來天竺國，冷泉客話女兒山，（樂史寰宇記，靈隱山南，有石，狀似人形，兩鬢分明，俗稱女兒山，近日冷泉亭茗社，以女子招待，類及之）僧徒祇近人隨喜，略捨金錢石點頭。

山角湖唇好墓田，曇曇黃土冷荒烟，莊嚴世只僧尊佛，零落山邱鬼亦仙，處土梅花誰與比，美人香草總堪憐，更思秋夜多風雨，倚檻蒼涼一悵然。

漫說當年王氣鍾，劫餘秋水浸芙蓉，恨牽隄柳隨流遠，芳送風荷入酒濃，南渡勢難安半壁，西泠雲尚插雙峯，興亡今古渾閒事，警悟塵凡起暮鐘。

自幸湖山有夙緣，來瞻祠宇拜先賢，岳王忠詔金陀史，白傅輝聯玉局仙，萬古英靈于廟肅，百年風雅阮墩傳，更懷昭代三忠蹟，合薦藟香侑玉泉。

名園墨畫水中央，亭榭今非處土莊，石屋烟雲北海市（近年湖上，多築歐式樓屋，非復舊觀），平泉花木趁斜陽，劫來無恙三潭月，小築何人萬柳堂，夜看巖輪隄上過，星星螢火亂湖光（汽車夜馳隄上電光如流螢）。

湖上西泠印社購悲庵贖墨暨印譜回

墨痕斜上逞奇書，文字頻愁飽蠹魚，獨有龍泓開浙派，久留鴻雪溯秦初，社聯石室尊三老，閣近文瀾闢一廡，後起悲庵堪繼武，重搜遺迹習雜餘。

方壽民七來昆仲自陽來語

方氏當年好弟兄，他鄉繼見二難并，家肥不必愁金盡，世濁何妨以畫名（壽民工畫），詩誦清芬應待輯，田餘下溼可堪耕，津門阿伯如通報，道我相思萬里情（謂地山）。

秋日移居蕪湖

倦禽棲木敢求良，轉徙他鄉作故鄉，家有草堂愁屋破，門臨巖社吸湖光，書僮老學吹簫伍，市隱居如質廡梁，春燕秋鴻來有信，偕妻暫覓養生方。

祝髯自姑孰以珍珠蘿蔔見遺

蟄居江上掩柴門，儒素依然咬菜根，翁墨有緣慚乞米，杯羹分我喜開尊，土酥白白金城種（杜詩，金城土酥淨如練），珠貫纍纍玉雪痕，正是老婆妨病齒，好求一飽佐饕飮。

積雪久陰蟄居江上慨然有作用蘇詩除夕大雪韻（辛未）

春回暖意蘇，臘盡寒氣趁，天胡爲玉戲，顛倒如幻夢，羣陰蔽孤陽，造化小兒弄，蟄居以養晦，斯論孰與共，天河水倒流，窮源徒鑿空，苦霧覆高岡，不見朝陽鳳，旅困防沒蹕，居危愁折棟，天意閱飢寒，應爲斯民痛，何時天放晴，春融便耕種，且學灌園叟，無事日抱甕。

段君實招飲園中用蘇詩司馬溫公獨樂園韻

德潤居始崇，道高心益下，先生有名園，山堂啓綠野，樂志理朱絃，愛客斟玉壺，荀香薦新春，松涼健清夏，亭亭玉樹姿，秀發而溫雅，會集皆耆英，時結香山社，于湖有名賢，張（孝祥）黃（左田）古作者，人往迹已微，鶴詠亦云寡，舊德委榛蕪，新態恣妖冶，先生獨嗜古，慕蘭同司馬，翰墨締良緣，把玩手不捨，我來江上過，招飲山對楮，尊酒壓春寒，醉聽音變啞。

春雨泥人將東歸留別江上諸子

江水漫漫雨雪霏，吳波亭外客將歸，滙窳人散閒詩社，石港春陰冷釣磯，帖寫硬黃拋歲月，軒題滴翠想風微，蕪城待續參軍賦，且傍雲溪暫息機。

回思舊夢渺如烟，再到江淮又五年，南浦銷魂芳草碧，東坡舊屋老藤纏，琴書共載扁舟月，饑粥還求二頃田，酬倡尙留鴻雪迹，漫吟春樹隔雲天。

同沙祝髯黃哲生張止凡游鳩磯謁靈澤夫人祠

孤聳危磯浪打門，雲宮水殿倚江村，甯淵久息馮夷舞（宋時磯上建甯淵觀），望帝難歸杜宇魂，片石靈祠猶獨峙，三分霸業問何存，沈江姑聽盲詞曲，斷碣苔封不可捫（祠壁存錢梅溪贊，重修祠記殘碑，有黃左田題名）。

海上遇黃仲英同游江灣葉園

蟻聚蜂屯海市開，黃金競築好樓臺，狂流奔壑無甯息，疾電追風倏去來，自笑微生餘一粟，忽逢舊雨醉千杯，此間要覓清涼地，重過園林百事哀。

夏季抵濟南同祝髯游明湖

塵殿紆迴類轉蓬，白頭自號信天翁，湖山無恙干戈後，杼軸空歌大小東，文化儘堪徵古物，霸圖猶憶表雄風，年來心漸歸平淡，看取酸鹹味不同。

青島海濱卽景

朝暉夕靄萬山蒼，碧海風柔六月涼，雪浪初平宜濯足，冰肌無汗賦霓裳，梯航偶遇談瀛客（遇東台王卓齊）筆纔今成避暑莊，會記一燈芒作伴，膠西槎泛卅年強（乙未航海入都過膠州有斗大一燈芒作伴句）

中元前一日同髯庸鑒青父子吳進思登千佛山覽明湖鵲華諸勝

候馮蟄齋不至

舜耕往迹漫重論，指點齊烟淺淡痕，不見詩仙李供奉，長遺畫史趙王孫（趙文敏繪鵲華秋色圖），湖光略似江南景，暝色初浮郭外村，我輩看山游未足，有人獨樂遜名園。

望華不注山次髯庸韻

一朵芙蓉破石崩，單椒自古地鍾靈，浮嵐晚映湖心月，濃翠朝來壓下亭，九點烟情稱獨秀，半分秋色立空冥，草窗不返鷗波逝，補入吾家舊畫屏（董文敏有臨趙本鶴華秋色圖）。

趵突泉品茗

濟南山水甲齊魯，七十二泉悉可數，其中趵突最清奇，噴玉如花飄亂雨，璇源溯自俗陰來，龍池暗伏驪珠吐，不知雪竇鑿何年，直詔神工與鬼斧，終朝灑灑沿溪流，茶甌安排紛汲取，持符調水效鸞蘇，煮茗品泉來陸羽，吾儕暇日踐清游，不畏炎蒸日當午，城南先訪廣智園，鍵戶未逢舊園主，鳳題過客聊解嘲，半喘與人亦太苦，何如乘興酌清泉，入座涼風生栩栩，雲腴飛潤沁齒牙，雪乳浮甘清肺腑，飲冰難解相如渴，佇想迴風天女舞，箏琶嘈雜隔溪聽，一陣梨花落腰鼓（泉西茶社，有梨花大鼓），勝流昔作曲水游，濁俗今成廣樂劇（泉上有小商場），城市滄桑慨變遷，縹緲蓬萊望仙宇，試傾萬斛之清泉，前被塵污如淨土。

髯庸公潛聽梨花大鼓各賦四絕某見之以爲非真知音因作長歌

以諷之仍用前韻

江南老殘久客魯，紀游歷歷家珍數，黑白分明憶丑娘，姊妹花妍帶春雨（老殘游記，述黑白丑事，

掩映，登場結束姿媚，輕啓櫻唇蘭靨吐，初語法曲按霓裳，妙解靈心琢月斧，梨花春落涉南城，
簫笛牆陰多竊取，教歌清脆調鶯喉，學舞差池舒燕羽，幽客雅有顧曲癖，神搖魄盪忘夜午，玉環朝醉
李三郎，璧月宵迷陳後主，試看嬌豔引蜂忙，究爲誰甜爲誰苦，我來泉上偶入聽，茶餘欲倦夢栩栩，
曼歌未歇聲漸細，淒怨詞真出肺腑，青衫紅粉等飄泊，藝賸何堪柘枝舞，洪武災荒年復年，沈落腰懸
風陽鼓，盲詞村唱總堪憐，聲咽寒蟬泣秋圃，君不見長安女兒嬌如花，歌吹瓊樓沸玉宇，量珠博得錦
纏頭，揮霍黃金賤如土。

明湖夜泛

一水漣漪爽氣迎，畫船如在鏡中行，笙歌憶醉紅橋月，星火疑鑿赤墜兵，北極樓臺雲影亂，南皮瓜李
夜談清，柳邊風露侵衣薄，祇有眠鷗夢不驚。

秋日感事

金甌一夕動危機，驚起遼陽海鶴飛，臥榻何人竟野睡，劫棋選爾困重圍，同根豆泣然箕急，利吻鳴張
攫肉肥，薪膽無忘今在莒，誰滄奇恥改前非。

九日登千佛山

湖柳颯蕭霜菊黃，強將杯酒熱燒腸，萬人空巷酬佳節，千佛山坐夕陽，天問可能回劫運，鬼謀詎已
襲邊疆，登高無限悲秋意，倦眼愁看海上桑。

和髯庸抒憤韻

誰填汝長城，虛張北府兵，無人滿國恥，孤憤策軍情，龍塞支危局，蟲沙憫衆生，獨拚尸裹革，一戰有餘榮。

將軍一咤叱，黑水退鯨波，鬼賊鷄驚膽，萑符顛倒戈，胡沙黃撲馬，塞雪白於鵝，破虜資天助，冰堅夜渡河。

和公潛自蘇寄懷韻（壬申）

科峭春寒不出門，客貽雙鯉夢猶溫，湖山勝賞迫邕甫，京洛才名壓祖袁，憤擊鯨鯢看落日，暫親鷗鷺息征驂，烽烟未淨流亡慘，萬點梅花血淚痕。

次韻和葆之自北平寄詩問訊

狂潮鼎沸黑風吹，慘絕寒禽墮雪枝，管膽雄心甯肯息，裹尸馬革亦何辭，陸驚飛將從天下，敢有驕兒傍水嬉，一射九鳥隨矢落，島夷應饒漢旌旗。

二月中旬歸里答許靜存客歲寄懷卽用其韻

久別詩人水部何，梅花零落冷烟莎，青山笑我還鄉晚，白社逢君載酒過，館近玲瓏話塵劫，橋通丁卯託微波，海濱春訊愁風惡，且讀新詩飲碧蘿。

江南贈趙仙洲

獨山精絕學，貴筑撫吾邦，繼起君堪匹，論才世寡雙，蘭舟同皖水，芙蓉冠黔江，應憶少年事，崢嶸未肯降。

治民先歎士，殺賊必擒王，豈獨雕龍手，誰當擊雁行，江城比鄰魯，泗上頌翬黃，試問今何世，肝衡話海棠。

白門遇俞濠觀

五年未覩濠觀面，失喜相逢逆旅中，聞一牛鳴居隔巷，與羣鷗伍笑生風，月涼散步神逾王，星紫傾襟酒不空，濁世如公能有幾，勸余入海早收鋒。

中秋後二日同髯庸寒匏登掃葉樓

飄飄落葉不勝愁，聊倚危樓豁倦眸，大地烟塵誰一掃，名山畫史自千秋，枯苔破壁支殘照，衰柳荒江障亂流，舊日詩人多宿草，淒聞蟲語悵前游。

挽孔劍秋

舊社冷春前曾往，賴君開纜作中堅，每逢酬倡才無敵，偶涉談諧世亦傳，北海招魂虛野祭，東塘輟響贖遺編，江南蕭瑟悲秋氣，重遇黃墟感逝川。

登雨花臺

清秋當暇日，懷舊一登臺，說法三生悟，埋忠萬古哀，潮痕鏡石瘦，雲影隔江來，劫後山無恙，興亡付茗杯。

莫愁湖卽景

巾車偶出石城西，露冷殘荷覆水低，山色湖光秋易老，英雄兒女迹俱迷，漁娃打槳翻新調，過客登樓覽舊題，欲問鬱金堂在否，斜陽不照燕雙棲。

重九前二日傅築岩丈沙髯叟甯紹唐巴塞匏同登鷄鳴寺豁蒙樓

佛巖曾與登高會，（客秋九日，登濟南千佛山，）障眼邊塵未解憂，佳節易逢驚過客，層樓無恙豁吟眸，臺城遙接千山暮，湖水難消六代愁，且幸五君腰脚健，年年有約續清游。

明孝陵步髯庸韻

鍾陵蔥鬱大江濱，疑冢朝天辨孰真，萬世山河恢漢業，九邊鼓角起燕塵，龍顏圖表開基象，燕子燈殘故國春，從古興亡同結局，何來魑魅尙騙人。

九月移家揚州

秋宇澄清夜月斜，又隨陶令共移家，金焦有約停吟屐，梅鶴相攜上釣車，（內子同祥兒異女，自上海來，會於京口同歸），瓜步潮通揚子驛，草堂露洗少陵花，卜居幸近街南屋，訪舊應看兩鬢華，（賃黃氏舊居）

封崇寺訪純一上人

冒雨尋僧來古寺，清齋強爲我留餐，禪參蔬筍儻風趣，筆著梅花耐歲寒，（上人工畫梅），瓦甍道存供客笑，津梁佛倦臥樓看，獨山孤裔逃名久，（上人是莫獨山後裔），應共南朝石不刊，（寺有六朝石）。

迎水臺同鬻庸茗坐（癸酉）

山遙迎水檻，波暖漾風幃，茶味徐徐透，香車緩緩歸，春燈元夕過，燕子隔江飛，漫憶秦淮夢，層樓掩月輝。

清明渡江歸里

已下歸期屢變更，扁舟江上過清明，一簪花柳寒猶勒，萬疊雲山畫不成，聽雨竹樓縈別緒，聯吟蓮社競新聲，朋儕笑我常爲客，又見霜髭白數莖。

立夏移居小松濤巷

病癩如僧欲退居，還從人境寄靈廬，斜通曲徑花枝亞，虛聽寒濤松影疏，憶昔典裘曾賃酒，（新居舊爲賃庫）而今泛宅未懸車，垂簾暫可消長夏，一卷黃庭手自書。

試浴湯山溫泉

北海波同百沸湯，南風蛙又亂池塘，病狂無計消塵劫，瘵弱何人砲酒漿，春氣如回黍谷暖，頽齡試鹽菊溪香，世間那得泉如許，一起沈疴滌濁腸。

夏初奎兒侍游無錫梅園縱覽湖山兼懷孫寒厓同年

衆綠環山簇翠屏，湖光搖盪入簾青，雲飄香海三春了，水浸雲天萬象冥，隱隱歸帆漁市晚，茫茫塵夢酒人醒，城闌遙隔後來鶴，知否江南過客星。

滌陽紀游

晴光曉放微陰斂，展調遺型六一翁，勝賞豈徒林壑美，流風念與故鄉同，孤亭獨立層雲表，疊嶺深藏萬綠中，山水信留遺愛在，一龕並祀兩丈忠。（醉翁亭謁歐公遺象）。

諸峯遠抱西南秀，屢過征陰未一停，太守文章遺石碣，故人尊酒話山亭，時危竟欲投林密，翁醉還應勝菜醒，乘興探幽腰脚健，解衣磅礴笑忘形。（曹酒峯邀飲古梅亭）。

清泉幽谷古滄陽，夏木陰濃一寺藏，殿宇不隨塵劫換，山僧翻說出家忙，清談禪理多名士，暫憩祇園入衆香，石徑盤陀歸轡晚，隔江星火爛生光。（瑯琊山開化寺）。

歲豐民樂太平時，別有荒亭繫我思，觀政再無財力富，紀游應歎物情移，欲尋坡老摩崖字，怕讀羊公墮淚碑，一樣看山兩心曲，問誰獨往去題詩。（豐樂亭已荒涼欲往游未果）。

和許靜存湖上吟用原韻

塵袂倦暫憩，鄉夢歸初圓，幸結君子鄰，就岸將船牽，乃蒙君枉顧，具道思綿綿，嘉招愜幽賞，清謳脫瑤篇，逍遙湖上游，白髮神飄然，緬自菱湖別，題詠追前緣，君歸我遠役，一管飄雲烟，松巢開海鶴，露飲咽秋蟬，卑棲企高躅，離合皆由天，晚年眷故舊，物態逞新鮮，雲沈慘北顧，河溢愁南遷，赤氣熾未斂，誰爲飢鴻憐，名流恣游眺，林谷車軫聯，吾儕同一漚，隨遇安餘年，湖山愛夕陽，顧影霜盈顛，行樂在及時，濟勝體健全，竹西歌互答，街南屋相連，茲游興不淺，卓哉支度賢。

水西訪舊圖爲徐震僧題

街南老屋水西莊，南北平分風雅場，問道徵君樊榭老，半居沾上半維揚。

移家我近玲瓏館，久客君猶問蔗塘，同有平泉懷舊念，詩人一例感滄桑。

襪被曾過七二沽，念君迹尙滯燕都，斜陽小立公園路，古寺荒莊問也無。

津門掌故豈無徵，好事誰如嚴子陵，難得名園依綠水，又傳畫本屬青藤。（津門嚴節孫先生，維持風雅，保存古蹟）。

舊蹟迷離花影庵，當年人喚小江南，（蔗塘詩，漫說直沽風物異，有人曾喚小江南）梅花和尙如參偈，應牽蓮坡共一籠。

不問鯨狂湧亂流，閒鷗心獨淡於秋，百梅花外今何世，我亦披圖悵昔游。

魏毓芝三十初度觴客於康山草堂卽席賦贈

石井松風舊草堂，詩人清逸誦遺芳，（魏野自稱草堂居士，子閑號清逸處士），柴門有句承師法，荷露浮香侑客觴，漫說妙才逢濁世，每驚傑作壓詞場，華年方盛偏耽古，追步名賢魏邵陽。（魏默深久寓邗上）

長夏寫金剛經竟成長歌一首

石鑄魏象資天慶，紙寫唐經廣佛緣，目擊衆生淪苦海，身丁多難幸餘年，小胞繕貝塵心淨，深院聞禪月影圓，（內子八月朔生日）私與兒孫同祝福，清齋漫誦老人顛。

寄贈如皋許情荃

神交心契卅年前，一瞬流光海作田，白首猶堪鴻證雪，青溪幸遇鶴歸船，（趙仙洲宰如皋回秣陵見情荃贈序，知情荃白首無恙）郎爵我愧浮塵海，畫隱君宜住剡川，（有畫隱園索題）尺素遙通情不淺，始知離合亦天緣。

次韻答情荃卽題畫隱園圖後

放翁園鬪圖屐笠，神采奕奕逾七十，鹿門高蹈子孫安，舊德相承世下卅，名園况繼樸叟蹤，書畫從心目送鴻，稽呂交情如隔世，徐黃妙手思相逢，鷗盟白首喜重續，千里遺詩吐衷曲，秋高咳嗽落珠璣，名篇狃復不厭讀，桑海而還古誼存，雲材高尚隱衡門，若非松雪歸江上，難遇桃源世外人，念余偃蹇繩塵事，倦羽將還無遠志，傭書未辦買山錢，欲學枯禪修定慧，海濱一叟老猶豪，邗水相通倘見招，雪夜扁舟期訪戴，一傾懷抱貌鴻毛，更羨幽棲同栗里，深柳書堂環綠水，他時應詠集同人，我願舂風待巾履。

次韻和濠觀兼懷靜存

塵海日撥攘，長安居不易，我思素心人，而不見轍跡，詩筒轉郵程，往復情勝昔，雨霽山迎秋，水涼風動夕，將欲理歸棹，又復邁客屐，馳書江南北，寤寐期良覿。

八月朔攜家游焦山登松寥閣題文徵明卷子過碧山庵齋罷歸疊寫

經韻

會倚松寥題浪墨，停雲又結一重緣，恆河沙數萬千劫，彈指聲過廿五年，（己酉游此距今已廿五年）齋飯香炊雲子饌，潮音夢落午鐘圓，歸舟共話漁家樂，笑看雛孫柘舞顛。

中冷泉品茗三十年前與玉堂六弟飲此感賦一絕示長年姪

清泉一勺齒牙芳，曾共而翁話夕陽，夢斷西堂三十載，茶餘今與汝評量。

讀富順張易吾墓誌感賦

人琴痛絕廣陵散，碑碣無慚有道銘，血刺痕凝蜀碧，淚灑抔土哭冬青，冥誅豺虎天昭戒，平等冤親佛信靈，魂倘歸來知雪恨，秋涼一菊薦椒馨。

題蔡壺公重編壺史

宜平久別思風雨，（許情荃）寄我雙魚海角還，作答慣遲吳偉業，詩宗遙企屈翁山，桐焦何意蒙奇賞，豹隱猶能見一斑，萬里蓬壺如尺咫，良緣天假許追攀。

濁世誰堅金石盟，白鷗心迹證雙清，雲霞結契三生約，主客成圖四海傾，歷劫彌徵風誼重，高歌應使鬼神驚，重編甲子壺中史，聲逸長貽不朽名。

葆之親家以清嘉慶癸酉王翁石臞年七十取唐竇中行看春已過清明節，算老重經癸巳年句易已爲酉題聯於楹今歲癸酉既借石臞語治印復用作首句成一律寄示索和

著述輝精閱歲年，詩編甲子楹前賢，頹流可挽資垂教，塵世難寬欲問天，風雅家傳書畫史，浪游我學

水雲禪，瘦西湖上期歸棹，尊酒情親話舊緣。

蔡壺公與許畫隱書有訂交之約卽次其酬畫隱韻歌以報之

子非我兮我非魚，逍遙曾覽漆園書，壺公知我緣畫隱，神交不棄詩才粗，壺公古白傳，畫隱今露蘇，睥睨天地窄，擾擾多凡夫，我亦抗塵走俗子，胡爲招手遙相呼，豈以人海雜穢濁，牛驥不可同一途，天涯海角容接席，歲寒盟作三友圖，我方倦游思避世，三間破屋茅可誅，雲龍海鶴羨公等，風雨不寐侵寒爐，有書不報慮公責，有酒不醉誠予辜，昨夜夢游江入海，蓬瀛樓閣眞仙乎，壺公仰天發長嘯，畫隱登山不用扶，見我珊瑚來何暮，梅花寂寞孤山孤，酌酒賦詩樂無極，雪鬢皚皚顏猶朱，夙契有緣晚相得，入山雖淺交非疏，謂予濁世物情薄，誰爲鮑叔誰夷吾，曷若道義堅金石，雲山不住將焉如，夢醒瑤鏡落我手，喜聆越唱吳歎，我悔不學畫隱畫，差幸跳入壺公壺。

人日思歸（甲戌）

幽蘭宜友竹宜師，夜夢家園一見之，問我王城爲客久，緣何人日獨歸遲，山中病婦梅同瘦，海上雛孫馬不羈，記取二分明月好，元宵相賞莫相違。

乞假南歸留別同曹

久客青溪易煥寒，聲聲杜宇勸歸鞍，修蛇赴壑還遺蛻，倦鳥投林且息翰，花事正逢春雨足，好山留共

隔江看，故人尊酒難爲別，他日重期締舊歡。

壽洪聲儒七十

卅年浪跡各西東，約略平生出處同，皖越分馳曾作吏，江湖歸隱總成翁，讀書有子一夔足，習靜參禪萬象空，偕老白頭天與健，躬耕陶耜見高風。

徐芝軸丈邀飲看園中牡丹

洛陽春色天下奇，姚黃魏紫驕京師，揚州花事夙與匹，繁華無過承平時，劫後惟數吉祥寺，（城西吉祥庵牡丹最盛）傾城士女相游嬉，綵雨三朝花市動，鄰翁邀賞無筵期，詎意天公弄狡獪，今年花訊偏遲遲，風淒雨苦阻游興，吾儕將爲名花欺，夜夢花神向我語，有花不賞將何爲，晨興怦然心忽動，似聞鶯鶯喧晴曦，徐氏竹林來相詔，（芝丈屬震生來約）小園花已盈軒墀，粉白堆雲嬌綠約，猩紅浣露凝胭脂，倚闌延賞日初午，對花酌酒須吟詩，主人本是種花手，歸鋤三徑動護持，不用黃金鑄顏色，自然富貴出天姿，（蘇句）試數名園半易主，好春能放幾多枝，明年預定看花局，常醉春風杖履隨。

四月十日聚飲甘亭齋中汪幼師卽席詩成屬和

鄉飲香賢鶴髮新，花簪紅藥殿餘春，清河坊裏皆書畫，洛社筵中孰主賓，驥尾叨陪真率會，龍頭原屬老成人，（幼師年七十九推居首席）桃花潭水濃於酒，撰杖趨隨晚益親。

海樓

海樓一角臥裁詩，乍暖還涼五月時，剛是江南梅子熟，小風吹雨不成絲。

拙政園攜奎兒梅真孫女同游

園林侈說吳門勝，我獨耽幽此暫休，風定荷香參自在，棋爭殘劫問誰收，詠花人往山茶老，題鏡塵封
賸墨留，（遠香堂，有溥師玉岑楹聯，文曰，此間有鬱林一卷，談往事數千年，攜酒重過魯望宅，我
來值山茶再放，願同志二三子，對花齊和梅村詩）坐淪茗甌儻盡靜，散懷攜鶴一登樓。

重過吳門

風雨瀟瀟夜泛舟，一枝撈盡碧波柔，吳儂軟語猶堪憶，不到楓橋四十秋。（甲午坐夜行船至蘇，有構
歌一夜過楓橋句）

贈殷墨卿同年今年已七十矣

北馬南船話舊緣，雄心收拾遯壺天，縱橫文藻三千牘，離合萍雲四十年，水繪同人新續集，練湖美韻
好開筵，知君詩得江山助，萬首吟成老更妍。

答閒軒枉謝集句書楹帖並次其韻

浪墨淋漓多章造，銷磨歲月付東流，新詞補綴百家稱，老氣縱橫萬里秋，興到筆飛神若助，醉來腕脫鬼將愁，嗜痴不信君同癖，直以狂書比陸游。

寄贈郁老鶴濟南

珂里相逢旋執別，恩恩卅載隔雲天，偶過泉上聞肥遯，喜極壺中別有緣，舊雨得聯新雨約，今吾猶是故吾顛，鵲華可許分秋色，一瓣心香老畫禪。

奎兒東游日本寫此示之

家書昨報踏扶桑，冒暑東浮萬里航，攻錯他山雖有石，補牢今日已亡羊，此行徒發望洋歎，舊恨應無在葛忘，海上秋風吹夢醒，老懷倚盼早歸裝。

贈閒軒用小谷韻

君家斗室白生虛，談龍欲作絕交書，清秋社約開詩賦，覓句爭自探瓊珠，君獨盤空出硬語，羞稱雄文似相如，笑我腸枯艱一得，明日送客游江湖。

閒居用髯庸韻

儲儲絕似老蒼頭，飽飯酣眠物外游，北渚有詩通故舊，南柯無夢到公侯，庭花晚放迎人媚，家釀新籌與婦謀，堪笑兒孫栖海上，三分明月度中秋。

倪蓬仙屬題吳攘之如愚圖圖是萬袖石畫包安吳題額

小小倦游閑，荒荒晚數孳，當年傳習錄，不盡孔顏懷。
香庵惜早逝，季子得師承，此卷餘殘刻，難逢話刻僧。
藝雖學之餘，遂古必讀書，前賢吾所尚，年少今何如。
外家傳硯在，宅相老雲林，寶此詩書畫，白頭多苦心。

謝鳴歧游闕里登泰山還京

側聞北上復東游，無限烟雲一覽收，著屐登高應小魯，升堂觀禮想從周，子能鼓興名山遇，我羨乘風後軫遙，回首嶽雲空入夢，欲將舊事問沙鷗。

京友索書以食品餉我髯叟有詩戲答之

欲學東坡帖換羊，將書乞米已無方，髯參翻笑余癡豎，不惜揮毫爲口忙。

和芝岫丈元日韻（乙亥）

坡仙赤壁縱所如，健啖五日一花豬，歸種梅柳壓北郭，晚收桑榆補東隅，宜春妙詠推孝穆，斷輪巧思伴公輸，我親風雅變詩格，椒盤獻頌醉屠蘇。

震生自北平歸邀同香影廊茗坐過史祠看梅花

故人歸里話幽并，握手深於別後情，淪茗泉甘滋渴吻，落燈風暖賣春鶯，梅英霏雪香俱瘦，草色緣隄綠又生，訪古徘徊祠墓側，斜陽低照遠山平。

挽蔡壺公

自遇中郎後，彌知道誼真，神交愈舊好，不幸失斯人，春暮淒風雨，天荒泣鬼神，千秋壺史在，常若夢中親。

鮑婁先爲徐芝丈畫雪中桃花一幀芝丈屬題

馬後桃花馬前雪，芝仙曾唱出關詞，（徐蘭號芝仙見蓮坡詩話）珊瑚玉樹交相映，白髮紅顏豔一時，天上冰桃應有種，畫中蕉雪可無詩，海棠嬌怯梨雲壓，此老風情妙解頤。

黃仲英以吳斐眉女士畫冊屬題（女士吳竹莊之女何秋輦室也）

彩臂福慧鷗波侶，妙擅丹青染翰柔，執扇工裁摹北苑，（昔曾爲畫繪山水執扇）甌香兼法似南樓，詩人何遜皆塵夢，畫史黃筌話白頭，（仲英館何氏最久亦工繪事）粉本留留重展玩，瓠園花木幾經秋。

贈武進莊仲咸同年時年八十一重游泮水

天章復興三代學，香儒猶抱六經遺，巋然屹立靈光殿，思樂重磨泮水詩，後起菁莪當北面，賓筵瓜果譙南皮，海濱遺佚道遙者，知是蘭陵祭酒師。

白蓮花用尖叉韻

此花不受一塵纖，小立亭亭品格嚴，疑是靈根分太華，自然本色勝無鹽，清波微步涼羅襪，蕪髮羞簪側帽簷，絕憶菱湖香十頃，月斜欲墮曉風尖。

湖上漁娃豔掠鴉，採蓮打槳似飛車，淨因妙悟終成果，過雨初香已著花，但抱秋心如此水，不知畫舫自誰家，延涼忍割漣溪愛，白戰詩煩手八叉。

胡顯白邀看白蘋花與社中諸子同賦

會記晴光綠轉春，晚風又起澗之濱，已聞采采歌聲短，但見溶溶月色新，涼意初添三尺水，詩心不著一微塵，汀州昨有歸來客，淡泊鷗盟近可親。

挽徐芝岫丈（丙子）

高才徐孝穆，名吏宋黃州，一自歸田後，悠然與世儔，詩書付諸子，金石有千秋，城北園林好，曾隨杖履游。

搜殘明道集，（刊程少菽詩）懷古史公祠，（擬重刊史公遺集）餘興吟桃雪，迎春贈柳枝，（元辰贈迎春柳一株）靈光今忽圯，情話忍重思，不獨傷親舊，兼銜知己悲。

贈周穀人同學

少小僕同學，於今五十年，青春一彈指，白雪兩盈顛，舊雨猶餘幾，心交夙有緣，愧余游倦返，不及在山泉。

巖然鄉祭酒，和藹意同塵，桃結千年實，花延二月春，神仙稱橘叟，淮海老詞人，如飲醇醪醉，情親白首新。

上已後三日同寒匏栖厂閒軒出城憩香影廊

東風吹我出城闌，老眼初看景物新，梅破冷紅猶避客，草浮嫩綠欲騙人，聽琴輒有高山想，修禊還宜曲水濱，寒食清明時節近，看花留得幾分春。

高淳施斗南寄詩索書次韻奉報

伏櫪鹽車憶昔年，倦游歸里已華顛，記曾石臼開吟社，幸與嶽山縮夙緣，桑海變遷增感歎，花津浩渺隔雲天，何時同醉湖樓月，柳外牽舟入暮烟。
昨傳尺素到湖濱，鷗鷺忘機尚戀羣，念舊偏耽飛白字，高歌早憶點蒼雲，自慚拙筆書無法，重展吟毫視欲焚，最愛江南山水好，夢隨沙社策詩勳。

自題黃麓采芝圖

簇簇蓮花卅六峯，鬱蟠奇氣盪心胸，山中白鶴如相引，便欲尋仙束短筇。
偶過前山望後山，奇逢雲海不吾慳，宣平似有三生約，想在千巖萬壑間。
早計新安下富春，又聞豺虎阻游人，塵顏恐被山靈笑，轉棹西行問水濱。
服餌虛搜貌不腴，歸餘清夢若天都，臥游亦抵長生藥，贏得蕭臙半幅圖。（蕭臙繪黃山圖最佳）

挽徐養之

南州清望踵前賢，汲古深於玉井泉，芻狗功名拋末代，鹽車身世耗衰年，斯文自有千秋在，久病慳無再見緣，舊雨今如廣漠散，黃鸞感逝淚潸然。

寒匏與謝閒軒蘇幹丞胡芝甫程栖厂年皆六十以同生丁丑同周甲

句分詠爲壽余借用爲首句作歌以壽寒匏並諸子

同生丁丑同周甲，五君難得情宜洽，謝不廢吟富詩才，蘇有心得造酒法，胡已入道稱琴師，程未出家號畫衲，寒匏詩詞無不工，白首江湖三彈鋏，昨從白下寄詩來，筆捲五嶽詞倒峽，怪哉壽人不自壽，忘其爲我似未慙，桐城方（爾止）畫四壬子，陶與杜白坐一榻，（陶淵明、杜子美、白香山）尙友古人千載上，自執詩卷如請業，何況五君今同時，有人無我意近狹，豈其商飭道從同，隴陽一老志不合，或者將詩微示意，待我一詩承其乏，我與五君多親舊，晚歸粉鄉誼稠疊，我如一一贈以詩，枯腸費索膽亦快，記會客院丙寅年，三壽作朋詩在篋，（以三壽作朋一詩壽謝程巴三人）我於此事有先例，五老相逢喜簪盃，曷若並作五君詠，當不以我爲玩狎，荷筒吸露桂醕香，梅醞開尊醉到臘，試告五君切莫慚，有酒先邀我一呷。

爲杭雨巖題鍾馗扇面

昔聞愛畫馬嶰谷，家藏鍾馗百十幅，每逢重午醉蒲觴，懸滿街南之老屋，當時宇宙正清明，大鬼長縮小鬼伏，而今鴟魅斗鴟張，猙獰怪狀異我族，若使兩峯生今日，卽圖鬼趣亦驚目，我知作者有微意，朱筆寫真仿若木，欲將正氣驅羣魔，以一直可抵十百，果能揮劍鬼僞服，寢其皮而食其肉，我亦酬之酒百斛。

七夕次日與內子奎兒巽女棧孫泛舟瘦西湖子衡昆仲招飲徐園酒

後同登蜀阜

新秋打槳瘦湖西，荷渚風柔柳拂隄，野艇攜家游極樂，故人呼酒醉如泥，橋邊明月甯廢換，寺外斜陽塔影低，試上蜀岡同話茗，隔江山色與雲齊。

許畫隱繪贈松鶴圖

喬松古幹鶴仙姿，筆底能探造化奇，白髮應徵千萬壽，蒼髯多見子孫枝，歲寒與子期長健，天末懷人慰所思，自笑鞋靴今不舞，雪濤動壁亦軒眉。

次韻答天長郁老鶴（時客濟南）

詩情縹緲詭如環，豪氣嵒峻楮墨間，獨霸齊風雄大國，一登岱嶽小諸山，交深道誼應凡事，天假光陰任我閒，夢逐雲龍真一快，尖叉賸句不辭艱。

移居仁壽里

斜川五日覺春舒，便向南村賃廬居，市近旗亭呼美酒，泉分玉井引清渠，主人風月開三徑，家具琴書載一車，心忝身甯隨所寄，安排几席臥蓬廬。

方地山旅櫬歸里設位妙音庵詩以哭之

風雨江頭逐旅魂，潸然殘淚濕襟痕，三千里外歸骸骨，五十年來老弟兄，終古文章慳一第，此生哀樂忍軍論，白頭空抱人琴感，扶過鄰庵盃酒尊。

寄懷髯叟燕湖

中江回首十年情，旅邸曾逢灞上兵，燕歸滙後巢已換，鶴依酒勑夢偏清，偶邀祠祿非初志，重訪山堂識舊名，聞說太常齋一日，桑榆晚福慰平生。

元日口占（丁丑）

數點梅花雪裏香，一年一度好風光，書多退筆催人老，詩不成篇還句忙，話舊每邀鷓接席，買春欲借鶴支糧，二雞四美叨天幸，杯酒還欣自在嘗。

寄懷趙仙洲南京

勝流高聚草堂星，老長騷壇擬尚青，石鼎遙知柳句樂，霜鐘慣與隔江聽，開山教主周桐野，餘事詩人莫邵亭，欲話巴山同剪燭，會當春水一揚舡。

蔡談月色夫人壽辰徵詩

梅花明月證前身，天謫瑤光墮劫塵，長爪不辭搔背癢，清才多讓掃眉人，茗翻襟上讀成趣，琴隱江南合寫真，隔慧鑿修無量壽，鷗波風雅一家春。

卜猿盒丈以先德光河中丞夜燈圖屬題

風雨三間屋，城南夜讀時，篝燈宵繼晷，勵學母兼師，榴瑞當年事，蘭馨孝子思，北堂劬苦志，圖與後人知。

節鉞起名門，長沙母範尊，笏棠三世重，丸荻百年恩，舊學燈傳祖，清芬硯授孫，甘泉緇道象，圖畫共長存。

江漢驚烽燧，雲烟付渺茫，自遭秦劫厄，一弊顧廚藏，不是羅昭諫，焉逢陳季常，楚弓仍楚得，應感幾滄桑。（辛亥，此圖失去，為陳仙洲所得，羅四峯知下氏物，勸陳歸之）。

廣陵記詩事，曾載斷鉞吟，况此徵三異，題詞遍藝林，世家關掌故，慈孝感人心，燈影南樓夜，披圖企想深。（常州李荆道題云，以柳花之瑞，及南樓夜燈兩圖，失而復得，謂之三異，余探入廣陵詩聞）

穀雨同蘇子衡程栖厂出城謁汪容甫先生墓（墓在上方寺西葉家

橋）

吾鄉經術發文章，嶽嶽儒林是濫觴，天與全才名不朽，世無知己目為狂，欲回風教宗遺獻，祇借山邱

傍上方，村登今猶知有道，指看碑碣話斜陽。

禪智寺

偶來禪智寺，少憩倚枯藤，碑斷苔封壁，春和麥起滕，題詩多感舊，訪古不逢僧，地僻無人到，空明鑿水澄。（寺有第五泉）

淮陰陳石遺枉顧

歸里猶爲賃廡鴻，結鄰何幸與君同，每貪客過蓬蒿徑，早託神交寤寐中，斂手棋枰觀急劫，清談杯茗挹清風，元龍豪氣吾堪羨，不藉丹砂學葛洪。

病後蔬食

衰軀欲覓養生方，病起無如素食良，秋圃擷菘霜甲嫩，童孫呼粥雪杭香，餐莢有菊何嫌瘦，糝玉爲羹自在嘗，枵腹但能供一飽，卽知藜藿勝膏粱。

香山樂府縛戎人有漢心漢語吐蕃身句讀之慨然

香山樂府縛戎人，誰料戎人半漢民，竟被蕃酋驅入伍，漢心漢語吐蕃身。

挽沙祝髯

初逢濠上結詩緣，莊惠相知已十年，同棹江淮隨梗泛，連牀風雨伴鷗眠，身從人海緇塵老，影對郎潛白首憐，一卷題襟詩在篋，不堪重讀感雲烟。
海上過歸定客魂，報曹方慰到江村，詎知送老終成讖，猶夢清談宛若存，解脫塵緣真是福，推辭疑義共誰論，黃墟抱痛揮殘淚，空向于湖酹酒尊。

寄懷許畫隱用其松樵韻

昆弟俱爲白首人，欲傳消息悵烟塵，鳴張海上多狂寇，大隱山中作逸民，君采菊香如靖節，我因蘭悴弔靈均，（沙祝髯作古）眉山有子皆才俊，存問猶勞過比鄰。（來青世兄道過邗上來見）

紅棉舊館詩存

董肇夔孝逸著

二十五年丙子新秋攜棧兒歸省侍 雙親泛舟瘦西湖登蜀岡品茗
是日子衡蔭卿表叔招飲徐園親友相逢留連竟日散步 家大人

原韻

淮左名都數竹西，垂楊依舊拂長隄，移樽竟日耽泉石，歸燕將雛認壘泥，夾岸晚香隨棹遠，隔江晴翠壓闌低，江鄉絮語清如繪，鷗鷺忘機物我齊。

大理訪友

筍輿臥覺一身輕，笑看諸峯列仗迎，襟海稻騰誇早熟，屐山松蓋惜孤擎，樓居應可邀星月，市隱何從識姓名，題鳳人過花影散，晴嵐漸喜發空明。

三至下關過鳳尾樓感賦

浮蹤自比浪花聲（友人近詞，有飄泊孤蹤比浪花句，實有同感），慚媿林樾屢送迎，文筆縱橫吾豈敢，風雷震撼獨能擎，安危孰決隆中策，醒醉甯爭海內名，待到迴黃還轉綠，庭前燭火可生明。

瀾滄江鐵索橋步行而過口占一絕

裂石崩雲白日昏，奔濤脚底震心魂，置身空際凌千仞，絕巖猿啼未許捫。

三十二年梅女考取留美索詩久未成比卅四年秋月抗戰勝利後郵
航暢通奉 堂上手諭並附示喜誌梅真孫女考送出洋詩四首謹
依韻和呈藉誌經過

勝敵還鄉喜並論，老人遠道念諸孫，梅芬桂馥能爭秀，佳節團圓慶上元（國難八年時感離憂所幸子女教育尚未中斷梅女自畢業香港大學來渝後參加中英及中美文化協會旋考取留美孩兒在中央大學攻讀經濟系頻年典賀節用以助其成惟期其能光大家聲上慰慈懷耳，勝利降臨還鄉可待喜何如之）。

飛越駝峯指異鄉，護航雙艦出重洋，金門橋更摩天關，瀛海探奇論拓荒（梅真由渝飛印，候船轉美，時印緬戰事方亟，飛機必須飛經世界著名之喜馬拉耶高峯，以謀安全，嗣接函告，舟行亦多驚險，所乘新船，係處女航，幸武裝時速，均特強，有兩驅逐艦，護航翼進，僅廿八日，即抵北美洛杉磯，而建紐約，金門橋，即舊金山，世界博覽會之遺址，與紐約摩天大廈，並為寰球所矚稱，美國地原荒微，而立國百年，竟雄視一切，我國人士，詎可不亟加奮勉）。

珊瑚壩上送長征，能慰劬勞喜業精，萬國會中論中國，名聞兩校學初成。（梅真初入哈佛女子畢業學院，頗為院長所嘉許，時胡適之，胡政之，蔣廷黻，諸名流在美，時相往還，暑假中，院長特保送，

參加萬國夏令會，與會者廿六國，每國士女一人，外國人士，對於中國認識不深，尙多誤解，適梅真膺膺演之選，對於中美合作，及溝通文化，尤多申論，措詞浹當，旁聽膺集，舉座翕然，猶憶卅二年十月二日拂曉借斐漪送梅真，至重慶珊瑚壩，飛機場，廿餘年來，其母以養以教，未嘗遠離，萬里長征，揮巾送別，時斐漪猶勉以遠大，今則一舉成名，深幸其母遠母教也。

第九題名冠士多，復興關外奏騷歌，文化策源裙屐地，慰冰湖近赫森河（卅二年夏，教育部留學考試，揭曉取六百數十名，梅女以第九名獲雋卅二年春，受訓後，同學騷歌，出洋解禁，冬十月成行，美著名大學，皆在東部，今夏改入惠而士米大學，風景極佳，校中慰冰湖尤勝，湖之中文名，乃謝冰心女士，在該校時所譯題，紐約臨赫森河，東部學府林立，亦人才輩出）。

三十四年十一月十六日寄梅真

雛鳳聲清汝最嬌，韻柳絮開記垂簪，今朝且進茱萸酒，海外蜚英憶孔橋（孔橋，美國地名，學校所在地）。

中央圖書館長蔣君復聰出手冊索題，卽席寫贈

塵海驚濤曠夢醒，當年愛舍共橫經，沙灘日落風樓黯，猶自風搖九子鈴。
武庫森森文府深，羨君家學出林王，宵深手輯中西籍，寶字搜尋盡箭針。

步韻和馮友蘭教授作

爲訪名篇數往還，層樓西枕復興關，南軒一卷法塵障，况挹清風對蔣山（蔣山，在南岸，當圖書館之南窗）。

五十生日

境沸何嫌短髮添，知非漸解責人廉，劫餘中歲憂歡改，病後禪心定蕪兼，閱世眼昏藏霧市，尋巢情怯阻霜檐，慰冰湖水沙坪月，堪報高堂入畫簾（梅女留美未歸，棧兒就學沙坪壩；中央大學，堂上來諭，時承念及，三十五年一月錄稿，時客渝州）。

元日書懷（三十五年二月二日錄稿）

六載嘉陵江上住，今逢勝利祝年新，舟通黃浦遲春水，車止紅巖叩德鄰，欲去還留溫舊夢，知非難遣昧前因，石橋夜話巴山雨，何必桃源始避秦。

詩草卷一勘誤表

勘誤表

| | | | | | | | | | | | | | | |
|---|---|---|---|---|---|---|---|---|----|----|----|----|----|----|
| 頁 | 三 | 一 | 二 | 五 | 六 | 六 | 八 | 八 | 一四 | 一四 | 二〇 | 二二 | 二二 | 三三 |
| 行 | 三 | 九 | 三 | 二 | 七 | 一 | 二 | 七 | 八 | 九 | 六 | 五 | 九 | 三 |
| 字 | 九 | 三 | 四 | 一 | 二 | 一 | 三 | 二 | 七 | 一 | 一 | 二 | 七 | 一 |
| 誤 | 吸 | 遇 | 子 | 之 | 知 | 齊 | 忽 | 忽 | 凡 | 絲 | 旬 | 撲 | 業 | 酒 |
| 正 | 汲 | 果 | 子 | 人 | 如 | 齋 | 忽 | 雨 | 丸 | 斑 | 日 | 撲 | 葉 | 錢 |

| | | | | | | | | | | | | | | |
|---|---|---|---|---|---|---|---|---|---|---|---|---|---|---|
| 頁 | 二 | 二 | 三 | 三 | 三 | 三 | 四 | 四 | 四 | 五 | 五 | 五 | 五 | 五 |
| 行 | 六 | 六 | 三 | 一 | 三 | 八 | 六 | 二 | 二 | 二 | 一 | 三 | 八 | 六 |
| 字 | 五 | 五 | 四 | 三 | 二 | 二 | 三 | 七 | 七 | 八 | 四 | 一 | 七 | 二 |
| 誤 | 折 | 忽 | 忽 | 船 | 食 | 天 | 先 | 嵩 | 生 | 忘 | 習 | 週 | 賓 | 思 |
| 正 | 析 | 忽 | 忽 | 軸 | 食 | 大 | 光 | 嵩 | 友 | 亡 | 善 | 週 | 賓 | 恩 |

| | | | | | | | | | |
|---|---|---|---|---|---|---|---|---|---|
| 頁 | 五 | 五 | 五 | 五 | 五 | 二 | 二 | 二 | 二 |
| 行 | 四 | 一 | 四 | 一 | 四 | 九 | 一 | 一 | 一 |
| 字 | 二 | 一 | 一 | 一 | 一 | 六 | 三 | 三 | 三 |
| 誤 | 王 | 連 | 東 | 薄 | 饜 | 崧 | 崧 | 崧 | 崧 |
| 正 | 土 | 運 | 車 | 蒲 | 饜 | 崧 | 崧 | 崧 | 崧 |

